

RECEIVED
DECEMBER
NOVEMBER
1850

RB 356352



*Thomas Fisher
Rare Book Library*

UNIVERSITY OF TORONTO

Lib 9

Charles Dange

Labourenus

Et fit

Seppius cense

quit Citrons

*venant Dame
Cense met*

Fait pour moi
Alain Jacques
Dulac de la

14

RELATION

DE CE QVI S'EST PASSE'
DE PLUS REMARQVABLE
AVX MISSIONS DES PERES
de la Compagnie de IESVS,

EN LA
NOVVELLE FRANCE,

és années mil six cens cinquante six
& mil six cens cinquante sept.



A PARIS,

Che{ SEBASTIEN CRAMOISY, }
| Imprimeur ordinaire du }
| Roy & de la Reyne. }
| ET }
| GABRIEL CRAMOISY. }
ruë S.
Iacques,
aux Ci-
cognes.

M. D. C. LVIII.

AVEC PRIVILEGE D.V. ROY.

Digitized by the Internet Archive
in 2024 with funding from
University of Toronto



A V R. P. L E P.

LOVIS CELLOT,

P R O V I N C I A L

de la Compagnie de
IESVS, de la Prouince
de France.



ON R. P.

Pax Christi,

*De cinq ou six vaisseaux qui ont esté ce
Printemps dernier en la Nouvelle Fran-
ce, celuy qui en est retourné le premier,
m'a apporté des Lettres du Pere Jean de
Quen Superieur de nos Missions en ces
Contrées ; qui m'apprennent qu'il deuoit*

à ij

enuoier à V. R. la Relation entiere de
ce qui s'est passé depuis un an dans nos
Missions, dont il m'a adressé, par auance
quelques cahiers. Or le Nauire auquel on
l'auoit confiée, ayant esté pris par les Es-
pagnols, & toutes les Lettres qui s'y
sont trouuées ayant esté iettées dans la
Mer, i'ay esté obligé de ramasser dans le
Liuret que ie presente à V. R. ce qu'on
a pu recouurer de ces Lettres, & de quel-
ques autres Memoires qui nous furent
rendus trop tard l'année precedente. Ceux
qui s'interessent pour la gloire de nostre
Seigneur en la conuersion des Infidelles,
seront bien aises de voir comme nos Peres
marchant sur les pas de ceux de nostre
Compagnie, qui ont esté grillés, rostis, &
mangés depuis quelques années par les
Iroquois, sont entrés dans le pais de ces
Anthropophages, avec moins de peur de
leurs trahisons, & de leurs cruautés, que
d'amour & de Zele pour les gagner à

I E S V S - C H R I S T. Le Pere qui a dressé ces Memoires que i'ay receus, assure que qui voudroit agir parmi ces peuples, selon la prudence purement humaine, ne feroit iamais rien de fort avantageux pour leur salut. Il faut se mettre dans les dangers du feu de la terre, pour les deliurer des feux de l'Enfer. Il se faut jetter dans la captiuité, pour les mettre en liberté. Il faut endurer la faim, la soif, la nudité, pour les nourrir, & pour les reuestir de **I E S V S - C H R I S T.** On ne scauroit se figurer tout ce que nous auons souffert dans un voyage fort long, tres-rude, & rempli à tous momens de diuers dangers de la mort; en suite duquel nous mismes pied à terre au bord d'un bois, qu'il fallut faire reculer à grands coups de haches, pour donner place à l'habitation que nous voulions dresser. Mais ces grandes forests estant gardées pendant l'Esté des petits Dragons vo-

lans, ie veux dire par vn million d'escadrons de Mousquittes, de Marigoin ou de Cousins tres-auides d'un sang, qu'ils n'auoient iamais gousté : nous estions contraints de leur ceder la place pendant la nuict, & de nous aller coucher sur des roches au bord d'un lac, exposez à l'air, au vent & souuent à la pluye. Ces trauaux soustenus seulement d'un peu de bouillie faite de farine de bled d'Inde, cuite dans la belle eau claire, nous abbatirent presque tous. Plus de quarante huiet personnes de nostre monde, tomberent malades : Il nous fallut loger sous des roches si à l'estroit, que nous estions presque entassez les uns sur les autres. Pendant que l'un brusloit dans l'ardeur de la fièvre, l'autre trembloit de froid : & pour nous consoler, on nous venoit souuent dire de diuers endroits qu'on nous alloit egorger, que nous serions bien-tost deliurez de tous nos maux. Quotidie

morimur, & ecce viuimus, nous mourions tous les iours, & nous voilà encore graces à Dieu tous viuans: Il est vrai que ceux qui sont alterez du salut des Ames, qui ne s'opere iamais que par la croix, trouueront icy dequoy se satisfaire: mais il ne faut rien craindre, Dieu est partout; c'est icy qu'on le gouste plus purement, & quasi sans mélange des creatures. Enfin salutem ex inimicis nostris & de manu omnium qui oderunt nos. Il nous a sauuez par nos ennemis mesmes & par les mains de ceux qui nous haïssoient à mort. Nous marchons la teste leuée, ils nous ont secourus dans nos besoins, nous preschions, nous catechisions, nous baptisions publiquement dans leurs bourgades: on y dresse des Chapelles, on y prie Dieu, on y dit la sainte Messe; on y reçoit les Sacremens. Un grand nombre d'Iroquois y fait hautement profession de la Foy de

IESVS-CHRIST : *En un mot Deus
Dominus illuxit nobis, c'est Dieu
qui a fait ce grand iour. Voilà mon R. P.
ce que vous verrez en detail dans cette
Relation, & qui sans doute portera V.
R. & tous ceux qui ayment l'Eglise de
I. C. à prier pour ces pauvres peuples,
& pour ceux qui trauaillent à leur con-
uersion, comme aussi pour celuy qui est*

de V. R.

Le tres-humble & tres obeyssant
seruiteur en nostre Seigneur,

PAVL LE IEVNE,
de la Compagnie de IESVS,

*Au College de Clermont
ce 1. de Decembre 1657.*



TABLE DES CHAPITRES

contenus en ce Liure.

Relation de ce qui s'est passé en la Nouvelle-France, es années 1656. & 1657. pag. 1

CHAP. I. Ambassade des Iroquois Son-
nontoeronnonns trauesée par l'Iroquois
Agnieronnon. pag. 1

CHAP. II. Desein des Iroquois Agnieron-
nonns sur la Colonie des Hurons dans l'Isle
d'Orleans. pag. 6

Les Hurons dans l'Isle d'Orleans attaquez
par les Iroquois Agnieronnonns. pag. 15

Voyage des Peres de nostre Compagnie & de
quelques François au pays des Iroquois
superieurs appelez Onnontoeronnonns. 21

Nostre arriuée au lieu où nous auions destiné
nostre demeure, & la reception que nous fi-
rent les peuples du pays pag. 45

Vne partie des Hurons va demeurer à
Agnié. 68

L'autre partie des Hurons va demeurer à
Onontagé. 77

Du voyage du Pere Simon le Moyne, aux
Agnieronnonns. 84

<i>De la residence de S. Ioseph en l'Ance de Sillery.</i>	92
<i>Des Sauvages Hurons deuant leur enleuement de l'Isle d'Orleans.</i>	104
<i>De la nature & de quelques particularitez du pays des Iroquois.</i>	119
<i>Du naturel & des mœurs des Iroquois.</i>	124
<i>Des tesmoignages reciproques d'amitié entre nous & les Iroquois.</i>	134
<i>Des dispositions que les Iroquois ont à la Foy.</i>	139
<i>Des premieres semences de la Foy parmy les Iroquois.</i>	150
<i>De la publication de la Foy aux Iroquois Oïogonhronnons.</i>	157
<i>De la publication de la Foy aux Iroquois Sonnontouehronnons.</i>	166
<i>De la publication de la Foy aux Iroquois Onnerouthronnons.</i>	171
<i>De la publication de la Foy aux Iroquois Onnontagebronnons.</i>	175
<i>Des nouvelles esperances du progres de la Foy dans les Missions de la Nouvelle-Frâce.</i>	183
<i>Lettre escrite au R. P. Louis Cellot Provincial de la Compagnie de IESVS de la Province de France, par le Pere François le Mercier de la mesme Compagnie.</i>	189
<i>Dernieres nouvelles de ce qui s'est passé en la Nouvelle-France.</i>	201

EXTRAICT DV PRIVILEGE du Roy.

PAR grace & Priuilege du Roy, il est permis à SEBASTIEN CRAMOISY, Marchand Libraire Juré en l'Vniuersité de Paris, Imprimeur ordinaire du Roy & de la Reyne, Directeur de l'Imprimerie Royale du Louure, Bourgeois & ancien Escheuin de Paris: d'imprimer ou faire imprimer, vendre & debiter vn Liure intitulé, *La Relation de ce qui s'est passé en la Mission des Peres de la Compagnie de IESVS, au pays de la Nouvelle-France és années 1656. & 1657.* Et ce pendant le temps & espace de vingt années consecutives. Avec deffenses à tous Libraires, Imprimeurs, & autres, d'imprimer ou faire imprimer ledit Liure, sous pretexte de deguisement ou changement qu'ils y pourroient faire, aux peines portées par ledit Priuilege. Donnée à Paris le 3. Decembre 1657. Signé, Par le Roy en son Conseil.

MABOVL.

Permission du R. P. Prouincial.

NOVS LOVIS CELLOT,
Prouincial de la Compagnie de
IESYs en la Prouince de France, auons
accordé pour l'aduenir au sieur SE-
BASTIEN CRAMOISY, Marchand
Libraire, Imprimeur ordinaire du Roy
& de la Reyne, Directeur de l'Impri-
merie Royale du Louure, Bourgeois &
ancien Escheuin de cette ville de Pa-
ris, *l'Impression des Relations de la Nou-
uelle-France.* A Paris, le 28. Decembre
1556.

Signé, LOVIS CELLOT.

RELATION



RELATION

DE CE QVI SEST

PASSE' EN LA MISSION

DES PERES DE LA COMPAGNIE

de IESVS, aux païs de la Nou-

uelle France, depuis l'Esté de

l'année. 1656. iusqu'à l'Esté de

l'année 1657.

CHAPITRE I.

Ambassade des Iroquois Sonnontoeron-
nons trauersée par l'Iroquois
Agnieronnon.

N Ous auons souuent remar-
 qué dans nos Relations des
 années passées, qu'il y a cinq
 Nations Iroquoises, dont les trois prin-

A

2 *Relation de la Nouvelle France,*

cipales sont les Sonnontoeronçons, qui sont les plus nombreux & les plus éloignés des François. Les Onnontoeronçons, où nous auons depuis peu commencé vne bonne Mission. Et les Agnieronçons qui ont commerce avec les Hollandois voisins de la nouvelle Angleterre. Le 19. de Septembre de l'année 1655. le P. Ioseph Chaumont, & le P. Claude d'Ablon partirent de Quebec pour aller recognoistre le país des Sonnontoeronçons, qui nous pressoient de les aller instruire, & d'aller establir en leur país vne habitation Françoisse. Leur voiage est amplement décrit dans la Relation de l'année derniere. Peu de temps apres leur depart de Quebec trois personnes considerables arriuerent de Sonnontoan país des Sonnõtoeronçons, qui nous donnerent aduis que les esprits de leur nation estoient disposés à la paix, & que l'hyuer prochain ils deuoient venir en bon nombre, contracter avec nous & avec les Hurons & les Algonquins vne alliance inuiolable. On ne manqua pas aux presens reciproques de part & d'autre, suiuant la coustume de

ces peuples. Apres quoy, vn des trois se resolut de passer l'hyuer avec nous, comme voulant seruir d'ostage de leur fidelité. Les deux autres se mirent en chemin au commencement de Nouembre de la mesme année 1655. pour porter plus promptement en leur pays les heuruses nouuelles de l'accueil qu'on leur auoit fait.

Ces deux Ambassadeurs furent tuez à leur retour, ainsi que nous l'apristmes par la rencontre qui se fit d'un des cadavres que l'on trouua à trois ou quatre lieües au dessus de Montreal, tout couuert de playes & de sang. Le soupçon de ce meurtre ne pût tomber que sur les Iroquois Agnieronnons, qui jaloux de l'amitié dont les autres nations Iroquoises nous recherchent, la veulent empescher par toutes sortes de moïens.

Cela n'empescha pas que dès le commencement du mois de Ianuier 1656. nous ne vismes icy l'Ambassade dont nous auions parole.

Ils estoient dix de compagnie, dont le chef estoit vn des premiers Capitaines de tout leur pays, âgé de cinquante

4 *Relation de la Nouvelle France,*

à soixante ans , homme sage & adroit dans les affaires , eloquent au delà de ce qu'on en peut croire , dont le cœur estoit tout François , & desia gagné à la foy.

De vingt & vn presens qu'il fit , le plus riche & le plus éclatant , fut celuy par lequel il nous tesmoigna hautement que toute sa nation vouloit se faire instruire ; qu'elle demandoit pour cet effet des Peres de nostre Compagnie , & qu'elle souhaitoit les biens qui ne se voient qu'apres la mort , dont les Chrestiens Hurons captifs en grand nombre chez eux , leur parloient avec tant d'estime , que plusieurs d'entre eux auoient desia le cœur Chrestien , avant que de l'estre.

Les desseins du Ciel ne nous sont pas moins adorables que cachez. Ce Capitaine qui apres Dieu appuyoit le plus nos esperances , nous fut rauy en vn moment. Ces Ambassadeurs pour se diuertir , estoient allez à la chasse du Castor entre les trois Riuieres & Quebec , en attendant la fin de l'hyuer pour leur retour. Vne troupe d'Iroquois Agnie-

ès années 1556. & 1557.

ronnons , qui venoient en mesme temps à la chasse des hommes , rencontrèrent leurs pistes , & ayant surpris à l'escart ce Capitaine , sans l'auoir reconnu de plus pres , ils le tuerent d'un coup de fusil , qui luy perça le cœur.

Après ce coup , capable de mettre la guerre entre ces deux Nations Iroquoises , ils continuerent les vns & les autres dans la confiance qu'ils auoient en nous , n'ignorants pas que nous auons le cœur ouuert pour tous les peuples de ces contrées , & nous considerans comme vne Nation neutre , & comme vn lieu de seureté. En effet vne bande de guerriers Algonquins , s'estant trouuée en mesme temps dans les trois Riuieres , avec l'Agnieronnon leur ennemy mortel , ils s'y parlerent avec douceur , ils s'y regalerent avec ioye , & à les voir , on eust creu qu'ils estoient amys. Ce n'est pas vn mauuais presage , quand le Loup & l'Agneau habitent sous le mesme toict. Quand le Lion & la Brebis paissent ensemble , c'est vne marque que IESVS-CHRIST veut estre leur Pasteur.

CHAPITRE II.

*Dessein des Iroquois Agnieronnons
sur la Colonie des Hurons dans
l'Isle d'Orleans.*

LE vingt-cinquième iour du mois d'Auril 1656. deux Iroquois Agnieronnons, s'estant coulez par les bois au deffous de Quebec, en vn lieu où la chasse des oyseaux de riuere est en abondance; deux Hurons qui y aborderent en vn canot, y furent salüez chacun d'un coup de fuzil: l'un tomba roide sur la place; l'autre, quoy que blessé griefuement, eut toutesfois assez de courage & de force pour pousser son canot en l'eau, & se sauuer heureusement.

Vingt Hurons s'embarquerent promptement à cette nouuelle, pour couper chemin en quelque lieu, aux meurtriers, qui auoient pris la fuitte par terre. A plus de vingt lieues de là, ayant

apperceu quelques pistes sur le riuage de nostre grande Riuiere, ils atteignirēt leur proye; mais comme ces deux fugitifs ne marchotent qu'esloignez l'vn de l'autre, il n'y en eut qu'vn de pris, qui estant mené à l'Isle d'Orleans, y fut condamné à la mort & au feu, qu'il auoit sans doute bien merité.

Nous auions fait avec douceur tout ce qui se pouuoit, afin qu'on luy accordast la vie & que l'on peust se seruir de luy, pour destourner vne troupe de trois cens Iroquois Agnieronnons, dont nous sçauions que la Colonie Hurone de l'Isle d'Orleans estoit menacée: mais les esprits estoient trop eschauffez dans le ressentiment d'vn crime qu'ils auoient vû tout fraischement deuant leurs yeux, & dont le pere & la mere du defunt demandoient instamment iustice. C'estoit les plus riches de tout le bourg Huron, & qui pleuroient leur fils unique, qui estoit vn ieune homme plein de belles qualitez, destiné à la charge de Capitaine, & qui auoit depuis deux ans donné la vie à cinq Agnieronnons, qu'il auoit fait prisonniers de guerre.

8 *Relation de la Nouuelle France,*

Le mesme iour qu'on brusloit ce captif Iroquois, heureux dans son malheur, en ce qu'il receut le Baptisme, & qu'il mourut Chrestien : Quelques François des trois Riuieres rencontrèrent à dix ou douze lieuës de là ces trois cents Agnieronnons, qui venoient fonder sur les Hurons. Ces guerriers traiterent doucement nos François, ils leur firent part de leur chasse, & en les congediant leur firent vn present de Porcelaine, afin qu'on ne donnast point des trois Riuieres aduis à Quebec de leur marche.

Le lendemain trois de leurs Capitaines vinrent eux-mesmes aux trois Riuieres, sçauoir où on desiroit qu'ils campassent, & protester de la continuation de la Paix avec nous.

Pour les arrester en chemin par les voyes de douceur, le Gouverneur des trois Riuieres leur fit trois beaux presents, les conjurant de retourner en leur pays, puis qu'ayants la paix avec nous, & les Hurons estants aussi nos alliez, nous deuions espargner le sang & la vie des vns & des autres.

Les Iroquois respondirent par huit presens de Pourcelaine, dont les quatre plus remarquables furent ceux-cy.

Leur Chef faisant paroistre vn grand collier de Pourcelaine : c'est icy, dit-il, vne cheſne de fer, plus groſſe que les arbres qui naiſſent en nos foreſts, qui liera les Hollandois, les François, & les Agnieronnonſ ensemble. Le tonnerre & la foudre du ciel ne rompront iamais cette chaiſne.

Par vn autre preſent, ie connois, diſoit-il, l'eſprit d'Onnontio, ie ſçay que le François eſt veritable en ſes promeſſes. Si ie voy quelqu'un de mes gens tué ſur la Riuiere, ie n'auray aucun ſoupçon que ce ſoit par la trahiſon des François. Ie te coniure auſſi de croire le meſme de moy; & ſ'il ſe trouue quelque François tué à l'eſcart, n'en accuſe pas l'Iroquois Agnieronnon; nos mains en ſeront innocentes, & ne trahiront pas noſtre cœur, qui ne reſpire que la Paix.

Quand quelque malheur, diſoit-il, par vn autre preſent, arriuera au François, ou à l'Agnieronnon, nous meſſerons ensemble nos pleurs & nos larmes; &

10 *Relation de la Nouvelle France,*
nos cœurs auront les mesmes sentimens:
car ie n'ay plus qu'un cœur avec toy.

Par le dernier de ces presens, i'obeys
à Onnontio, disoit-il, ie m'en retourne
en mon país, & ma hache pour cette
fois ne sera pas rougie dans le sang des
Hurons. Mais ie desire aussi que le
François m'obeisse en vne chose, c'est
qu'il ferme la porte de ses maisons & de
ses forts à l'Onnontageronnon, qui veut
estre mon ennemy, & qui couue des
pensées de guerre contre moy.

Ces presens estoient acheuez, mais
l'assemblée n'estoit pas encore separée,
lors que l'on apperceut trois canots qui
venoient d'en haut. C'estoit Jean-Bap-
tiste Ochionagueras Capitaine Onnon-
tageronnon, qui ayant embrassé la
foy depuis deux ans; & dés-lors ayant
pris un cœur tout François, procura
puissamment la Paix que nous auons
avec les Nations Iroquoises d'en-haut.

Les Iroquois Agnieronnon voyant
cet homme, qu'ils sçauent estre de
grand credit, & grand guerrier, prie-
rent nos François de ne luy rien tesmoi-
gner du present qu'ils venoient de faire,

nous inuitant de fermer nos portes aux Onnontageronnons , & de ne nous ioindre pas d'alliance avec eux.

Le iour ſuiuant , nous reçeuſmes aduis à Quebec de tout ce qui ſe paſſoit aux trois Riuieres : ce fut par des hommes enuoyez exprez , qui firent trente lieues en vn iour avec tant de bon-heur qu'ils tromperent toutes les diligences des Iroquois Agnieronnon , qui auoient mis partout ſur les chemins des corps de garde pour fermer le paſſage.

Il fut iugé neceſſaire pour le bien public , d'enuoyer quelqu'un de nos Peres au deuant de ces trois cents Agnieronnon , pour arreſter leur courſe , nous doutans bien que contre leur parole, ils auroient continué leur deſſein de pouſſer iuſques à l'Iſle d'Orleans , pour ſe vanger de la mort de l'Iroquois Agnieronnon , qui venoit d'y eſtre brulé depuis ſi peu de iours,

Le Pere Simon le Moyne qui aime & eſt aimé tendrement des Iroquois , ſe trouuant à lors à Quebec , par vne heureuſe rencontre , fut preſt en moins d'une heure pour partir ſans delay. Il

12 *Relation de la Nouvelle France,*
fait rencontre en son chemin, au milieu de la nuit, des canots Iroquois qui estoient aux auenuës, pour decouvrir ce qui pourroit passer. On le conduit dans vne palissade, enuiron à demie-lieuë de là, où leur gros estoit campé. Il leur fait dix presens, pour rompre leur dessein, & les faire retourner sur leurs pas. Apres de longues deliberations ils luy tesmoignent que sa voix est toute-puissante sur eux, & pour l'en asseurer par effet, plus que de parole, ils font vn cri dans le camp, qui congedie toutes les troupes : C'est à dire que les petites bandes, de dix ou douze hommes pour l'ordinaire, ayent à se separer. Les vns vont d'vn costé, prenans parti pour la chasse de l'orignac : les autres vont d'vn autre costé à la chasse du castor : quelques-vns au nombre de trois ou quatre font mine d'aller à la petite guerre, pour faire quelque coup à l'escart. La pluspart retournent, disent-ils, en leur pais.

Cette nouvelle donna de la ioye à Quebec, & quelque forte d'assurance aux Hurons de l'Isle d'Orleans : mais

és années 1656. & 1657. 13

qui ne leur osta pas toutesfois toute leur crainte. Il leur resta quelque defiance de l'esprit perfide de l'Agnieronnon: mais pleust à Dieu qu'elle eust esté plus grande. *Voyez le Chapitre dixième.*

CHAPITRE III.

Les Hurons de l'Isle d'Orleans attaquez par les Iroquois Agnieronnonns.

LE 18. de May 1656. ces perfides s'estans cachés dans les bois, à dix ou douze lieuës au dessus de Quebec, où ils voyoient sans estre veus, laisserent passer vne escoüade de François & de Sauvages, qui montoient au país des Onontoeronnonns. Mais les mains leur demangeans, & leur accoustumance au massacre les sollicitant, ils se iettent sur quelques canots qui faisoient l'arrière-garde: Ils blessent, ils prennent, ils pillent, ils mal-traitent ceux qui les conduisent. Mais enfin les Onontoeronnonns & les François les menaçants, ces traîtres firent semblant de s'estre mépris,

14 *Relation de la Nouvelle France,*
comme nous verrons au Chapitre suivant, ils rendirent les prisonniers ; mais à condition qu'ils poursuivroient tous leurs route, sans que pas vn fust obligé de descendre à Quebec.

Cette tempeste estoit essuyée, nos Gens estant passez outre sur le grand Fleuve de Saint Laurens. Mais la nuit du dix-neuf au vingtième du mesme mois de May, ces mal-heureux couverts des tenebres de cette nuit tres-obscure, descendirent sans bruit, passant deuant Quebec sans estre apperceuz. Ils aborderent auant le iour au dessous de la bourgade Huronne, & ayant caché leurs canots dans le bois, ils se répandirent de tous costez aux auenuës des terres, que l'on ensemençoit pour lors de bled d'Inde.

Le matin tous les Chrestiens Hurons ayant assisté à la Messe, selon leur coustume, & par bon-heur la pluspart s'estant confessez, vne partie sortit pour le trauail. Les ennemis qui estoient en embuscade, se ietterent sur eux, en massacrerent quelques-vns sur la place, & en emmenerent quelques autres captifs, le

reste se sauuant dans nostre Maison ceinte d'une palissade de bonne defence, fortifiée pour de semblables occasions.

Après cette deffaite les ennemis se retirerent sur le Midy. Ils auoient environ quarante canots, qui parurent sur nostre grand fleuve, prenant la mesme route pour leur retour, qu'ils auoient prise la nuit pour faire ce mal-heureux coup. Nostre perte a esté de soixante & onze personnes, avec vn grand nombre de ieunes femmes, qui estoient la fleur de cette Colonie.

Les François de l'Isle d'Orleans qui furent rencontrez par ces Barbares, ne furent point faits captifs, les Iroquois disant qu'ils auoient la Paix avec nous. Ce qui n'empescha pas qu'ils ne pillassent quelques maisons abandonnées, dont ils ont fait depuis leurs excuses, condamnant d'une part l'insolence de leur ieunesse, qui par toute la terre est difficile à retenir dans la chaleur de la victoire, & accusant d'autre part ceux de nos François qui auoient quitté leurs maisons; ayant pris, disoient-ils, l'es-

16 *Relation de la Nouvelle France,*
pouuante mal à propos. Il est vray que
les Iroquois ont respecté les lieux qu'ils
ont trouué habitez mesmes par de sim-
ples femmes , s'y comportant avec tou-
te la douceur possible.

Ce mal-heur arriua vn Samedi, le
vingtiesme iour de May, si toutefois les
maux de cette vie sont des malheurs,
lors que Dieu en tire sa gloire & le salut
de ses eleus.

Il se trouua entre ces Hurons captifs
onze Congreganistes qui n'ont pas per-
du l'esprit de la pieté dans l'extremité de
leurs miseres, du nombre desquels fut
Iacques Oachouk, alors Prefet de la
Congregation & le plus feruent de tous
nos Chrestiens.

Ce bon Chrestien se voyant captif, au
lieu de chanter ses proüesses de guerre
selon la coustume, prit pour suiet de sa
chanson ce qu'il auoit plus dans le cœur.
Ne me plaignez point, disoit-il, ne m'e-
stimez pas malheureux, ie seray heureux
dans le ciel. Je ne crains point les feux
que mon sang est capable d'esteindre,
je crains le feu d'enfer qui iamaïs ne s'e-
steindra. Cette vie ne m'est rien, quand
mes

mes pensées me portent au Ciel. Il pouſſoit ce chant d'une voix ſi puiffante, qu'il ſe faiſoit entendre preſque de demie lieüe, l'eau & le vent portant ſa voix juſques à nous. Il conſoloit les autres, & les animoit aux ſouffrances, & ſe voyant brulé en toutes les parties du corps, avec des haches toutes rouges de feu, & des tiſons ardens; ſans jetter aucun cry, ny ſe plaindre des cruautéz qui le faiſoient mourir mille fois, avant que d'en mourir vne ſeulement; il prioit Dieu au milieu des flammes, & diſoit hautement que jetant les yeux vers le Ciel, avec cette parole, I E S U S ayez pitié de moy, il ſentoit chaque fois l'allegement de ſes douleurs, & un ſurcroiſt de force & de courage.

Nous en auons ſçeu toutes les particularitez par un autre Chreſtien qui eſtoit captif avec luy, nommé Ioachim Ondakout, qui s'eſt veu dans les flammes avec luy, y ayant admiré ſa conſtance & ſon eſprit vraiment Chreſtien dans les tourmens.

Ce Ioachim eſtoit le plus conſiderable de tous ceux qu'on auoit fait captifs,

18 *Relation de la Nouvelle France,*
grand guerrier, & dōt la vie n'est qu'une
suinte de victoires & de rencontres, d'où
son courage l'a bien souvent retiré con-
tre toute esperance. Cette dernière fois
ayant desia esté brûlé à demy corps,
ayant les doigts coupez, & étant tout
couvert de sang; la nuit qui devoit
estre sa dernière, n'attendant que le
point du iour auquel devoit acheuer
son supplice, la cabane où il auoit esté
brûlé, étant pleine d'autant de bour-
reaux qu'il y auoit là d'Iroquois, qui
estoient plus de cinquante à le garder; le
sommeil les ayant abbatus, il fut assez
heureux pour rompre ses liens, & pour
trouuer passage: & s'estant veu en li-
berté, le corps nud & déchiré, sans pro-
uisions, sans armes, & sans secours, il
marcha quinze iours entiers par des
routes égarées, pour se sauuer, en se per-
dant, & n'ayant plus de forces, étant
arriué sur les riuages du grand lac des
Iroquois; par bon-heur il y fit rencon-
tre de la bande des François qui al-
loient à Onnontagé: sans eux, il estoit
mort, & par leur moyen il recouura la
vie. On luy donna des viures, vn canot,

& vnieune-homme Huron detaché de leur compagnie , avec lequel il peust acheuer son voyage , & venir à Quebec.

Cét homme auant son mal-heur s'estoit relasché de sa ferueur , & ne paroissoit qu'à demy Chrestien , faisant mesme gloire de tesmoigner qu'il ne faisoit pas estime de la Foy , ny des Chrestiens : Mais ayant veu que c'est en Dieu seul qu'on trouue la consolation, la patience, & la ioye, mesme dans les tourmens, il a si heureusement changé de sentiment, qu'il ne peut assez le benir , ny assez louer les Chrestiens, dont il a veu dans l'occasion des exemples d'une vertu qui ne peut auoir de reproche.

Vn des Peres de nostre Compagnie s'estant trouué aux Trois-Riuieres, lors que les Iroquois y repasserent, & ayant esté heureusement engagé d'aller visiter ces bons Chrestiens, dans les liens de leur captiuité au camp de l'ennemy, en receut vne consolation si sensible, qu'il en escriuit en ces termes.

Bene omnia fecit. En verité, mon Re-

20 *R*elation de la Nouvelle France ,
venerable Pere, les iugemens de Dieu sont
estonnans. I'ay veu la fleur de la Con-
gregation Huronne emmenée captiue
par des Infidelles, avec quantité d'autres,
dont la deuotion passeroit mesme dans
les Cloistres, pour extraordinaire. Qu'il
en soit beny à iamais, puisque *bene omnia
fecit*; Iugez combien cela m'a esté sen-
sible, par la grande affection que i'auois
pour cette pauvre nation. I'ay eu le
bon-heur de les visiter trois fois dans le
camp des Iroquois, éloigné des Trois-
Riuieres d'une demie lieüe. Je les con-
fessay là tous, apres leur auoir fait prier
Dieu. Certes la foy regne dans leurs
cœurs: iamais ils n'ont tesmoigné de
plus grands sentimens de deuotion, ny
plus hardiment qu'ils ont fait en cette
occasion, en presence de tous les Iro-
quois, qui ne firent paroistre aucune a-
uerfion de la priere: Car ayant pris l'oc-
casion par cinq ou six fois dans diuerfes
cabanes, de dire vn petit mot du Para-
dis & de l'Enfer, ils m'écouterent tou-
jours avec grand respect.

I'ay trouué parmy eux vne ieune fem-
me de dix-huit ans nommée Agnes

Aoendoens baptisée par le deffunt P. Ieā de Brebeuf laquelle i'ouïs en Confessiō. En verité ie n'ay iamais rien veu de plus innocent: vne personne enfermée dans vn Cloistre ne se feroit pas mieux conseruée dans la pieté. En vn mot ie n'ay point de termes pour vous expliquer tout ce qui s'est passé dans ce rencontre. Voilà ce que le Pere nous a escrit.

Il n'ya uoit pas huit iours qu'il auoit quitté ces bons Chrestiens à l'Isle d'Orleans, où il auoit demeuré avec eux depuis vn an, son obeïssance ne l'en ayant detaché que pour le ioindre à la troupe de ceux qui sont allez à Onnontaghe.

CHAPITRE IV.

*Voyage des Peres de nostre Compagnie
& de quelques François au pays des
Iroquois superieurs appellés Onnon-
toeronnon.*

Ces peuples nous ayant desirés, on enuoia l'année 1655. deux Peres de nostre Compagnie en leur pays, pour decouurir leurs dispositions pour la

22 *Relation de la Nouvelle France,*

Foy & leurs inclinations pour les François. Après qu'ils les eurent pratiqués environ six mois, comme il se voit dans la Relation de l'année precedente, l'un des deux descendit à Quebec. Quoy qu'il nous parlât avantageusement de la bonne volôté de ces Iroquois, il n'effaçâ pas neantmoins de nostre esprit les défiances que nous auions pris raisonnablement de leurs déloiautés & de leurs trahisons. Si bien que lors qu'il fallut, comme on dit, fondre la cloche, & conclurre l'establissement d'une Mission & d'une demeure en leur païs, nous nous trouuâmes merueilleusement en peine, aussi bien que Monsieur nostre Gouverneur, duquel dependoit l'affaire en premier ressort. On examina meurement les raisons de part & d'autre; Et on en trouuoit de tres-fortes & de tres-puissantes des deux costés. Nous sçauions bien que le mensonge, les fourbes, les déloiautés estoient presque aussi naturelles à ces peuples que la vie. Nous les cognoissions tres-portés & tres-accoustums au sang, au feu & au carnage. Nous nous souuenions de la destruction de

nos pauvres Eglises Huronnes , & des cruautés qu'ils auoient exercées sur nos braues Algonquins . Nous auions devant les yeux les horribles tourmens qu'ils ont fait souffrir à plusieurs de nos Peres, les brûlant à petit feu, leur appliquant des haches toutes rouges sur les endroits les plus sensibles du corps, versant dans leurs playes des chaudieres d'eau bouillante, en derision du Baptesme , coupant de grands lambeaux de leur chair grillée, qu'ils mangeoient en leur presence. La fureur qui anime ces Barbares nous disoit tout bas à l'oreille qu'on nous en preparoit autant.

Vn Huron captif échappé du bourg d'Onōtaghe paroissant au fort de nos deliberations, nous assura qu'il auoit étudié l'esprit de ces peuples, qu'il estoit entré dans leurs pensées, & qu'ils n'auoient autre dessein que de faire venir en leur pais le plus de François & de Hurons qu'ils pourroient pour en faire vn massacre general. Il appuia son aduis de raisons si fortes, que les Hurons ses compatriotes ayans resolu & promis aux Onontoceronns d'aller en leur pais, & de

24 *Relation de la Nouvelle France,*
nous y accompagner, retirèrent leur parole, & nous dirent que l'ardeur de la Foy nous feroit égorger; nous coniurant par l'amitié qu'ils nous portoient, de ne point nous précipiter dans vn danger si manifeste.

Outre ce sujet de crainte les Iroquois Agnieronnons avec lesquels nous auons traité de la Paix depuis peu, faisoient paroistre vne ialousie qui alloit presque iusqu'à la rage de ce que nous voulions habiter parmy ces peuples, ayant vn grand interest pour leur commerce, que les Onnontoceronns fussent tousiours obligez de passer par leur pais.

Nous voyons encore que ces Nations n'ayant aucun besoin des François, ny aucune retenüe du costé de Dieu, qu'ils ne cognoissent pas, ny du costé de la Police humaine, qui n'a autre pouuoir parmy eux que celui de leur interest; ils nous pouuoient mettre à mort impunément par vne boutade.

Tout cela ioint aux dangers & à la difficulté des chemins, & aux despences excessiues & effroyables qu'il falloit fai-

re pour commencer cette entreprise & pour la conseruer, nous mettoit dans vne extreme inquietude ; si iamais l'axiome fut veritable qu'il y a vne crainte capable d'ébranler vne Ame constante ; tous ces sujets de crainte ne pouuoient nous cau- se vne mediocre terreur. On passa toutesfois outre, & la resolution fut prise d'accorder à ces peuples ce qu'ils demandoient si instamment, & de s'aller establis au cœur de leur pays, quoy qu'il en pût arriuer. Voicy les raisons qui nous y porterent.

L'une estoit fondée sur l'autorité & sur le raisonnement de Monsieur nostre Gouverneur, qui voyoit bien qu'il falloit perir pour ne pas perir, & qu'il falloit s'exposer à toutes sortes de dangers pour euitter tous les dangers. Nous auions nouuelles que si nous rebutions ces Barbares, leur refusant ce qu'ils demandoient avec tant d'ardeur, qu'ils auoient dessein de s'vnir derechef avec les Agneronnons, & de venir fondre sur les François pour leur faire vne guerre immortelle, & pour les exterminer entierement, s'il leur estoit possible. Nous

26 *Relation de la Nouvelle France,*

n'estions pas en ce temps-là dans la posture de soustenir la reuolte de toutes ces nations, sans encourir vn danger plus grand que n'estoit celuy d'exposer vne escouïade de François, dont la resolution pourroit donner quelque retenüe à ces peuples dans leur pays mesme.

L'autre raison estoit tirée d'une politique plus diuine qu'humaine. Les Peres de nostre Compagnie qui iusques à present n'ont point blesmy à la veüe de leur sang, qui n'ont point encore redouté les feux & la rage des Iroquois dans leurs plus horribles tourmens, disoient qu'ils baptiseroient bien deuant leur mort autant de moribonds qu'ils seroient de personnes, & qu'en ce cas donnant leurs corps pour des Ames, ils ne perdroient rien au change. Ils alleguoient l'exemple des Apostres qui s'attendoient bien de perdre la vie dans les pays infideles où ils alloient precher leur Maître, & ne laissoient pas pourtant d'y aller. Ils produisoient cet Axiome commun : *Sanguis Martyrum semen est Christianorum*, le sang respandu pour la Foy par les Iroquois crie, disoient-ils, deuant

Dieu, non pas vengeance, mais benediction & pardon pour les mesmes Iroquois. Il se faut confier en celuy qui n'abandonne iamais ceux qui s'abandonnent saintement pour sa gloire : Et la rage & la perfidie des Barbares, ny les despences excessiues ne doiuent point retarder le premier de tous les emplois, qui est la conuersion des Ames. Dieu qui est le Maistre des Grands & des petits, des François & des Iroquois, flechira les cœurs des Infideles pour leur faire receuoir l'Euangile; & ceux des Infideles pour en faciliter la publication.

Enfin la conclusion fut prise sur ces raisons & sur plusieurs autres, qu'il se falloit mettre en campagne, & donner aux Onnontoeronnons la satisfaction qu'ils demandoient. Aussi-tost dit, aussi-tost fait. Voilà vn bon nombre de François qui s'equippent pour s'embarquer avec le Pere René Menard, le Pere Claude d'Ablon, le Pere Jacques Fremin, le Frere Ambroise Broar, & le Frere Ioseph Boursier, que le R. Pere François le Mercier Superieur des Missions de nostre Compagnie en ces con-

48 *Relation de la Nouvelle France,*
trees, prit avec foy pour aller faire la
guerre aux Demons iusques dedans leur
Fort, & pour consacrer ces peuples &
tout leur pais à IESVS-CHRIST : Mais
suiuons de l'œil & de la pensée celuy
qui nous a tracé leur voyage sur le pa-
pier & qui estoit de la partie.

Nous partîmes de Quebec le 17. de
May 1656. Nostre Gros estoit composé
de quatre Nations, de François, d'On-
nontöeronnons, qui nous estoient venus
querir, de Sonnontöeronnons, qui
estoient venus rechercher nostre allian-
ce, & de quelques Hurons. Nous rem-
plissions deux grandes chaloupes &
plusieurs canots. Sortant du port, nous
fusmes suiuis des acclamations de quan-
tité de peuples differents qui bordoient
le riuage dont plusieurs nous regar-
doient d'un œil de compassion & d'un
cœur tremblant, nous croyans autant de
victimes destinées aux feux & à la rage
des Iroquois.

Ce malheur nous pensa arriuer dès
le lendemain de nostre depart. Nos
chaloupes ayans mouillé l'ancre sur
le soir à douze lieües ou enuiron au des-

fus de Quebec, proche d'un lieu appelé la Pointe de Sainte Croix. Nous prîmes resolution d'y descendre tous le lendemain matin, pour y celebrer la Sainte Messe. Nos Matelots s'oubliant de cette resolution, leuerent l'ancre deuant le iour & nous firent poursuiure nostre route. Le danger estoit tres-grand, y ayant en ce mesme endroit trois cents Iroquois Agnieronons cachés qui nous auroient pû prendre sans combat & sans resistance, pource que nos Gens seroient descendus sans armes, croyant que ces Traîtres estoient retournez en leur pais, comme ils en auoient donné la parole à nos François au Lac Saint Pierre, au dessus des trois Riuieres. Nous euitâmes ce danger sans le sçauoir; ces Barbares ne s'estans point produits, quoy qu'ils nous eussent bien apperceuz. Mais ils se ietterent sur nos canots qui se trouuerent separez de nous: Ils en renuerferent vn dans la Riuiere, ils bleferent legerement vn de nos Freres de deux coups de fuzils: ils lierent & garrotterent les Hurons: ils traitterent mal les Onnontoceronons de parole & d'ef-

30 *Relation de la Nouvelle France,*
fet, ne pouuant supporter nostre allian-
ce avec eux. Mais enfin la crainte d'en-
trer en guerre avec ces peuples qui té-
moignoïët leurs iustes ressentimens, ap-
païsa leur colere & les obligea de recou-
rir aux excuses, disant qu'ils croioient
d'abord que ces canots ne fussent rem-
plis que de Hurons avec lesquels ils
n'ont point de paix. Ensuite de quoy ils
mirent tout le monde en liberté, sans en
excepter les Hurons. Ceux qui s'estoient
sauuez dès le commencement du choc
courant tous nuds par les bois, & r'at-
trayant nos chaloupes, nous donne-
rent aduis de ce qui se passoit : aussi-tost
chacun se mettant sous les armes, on ap-
perceut douze canots qui tiroient vers
nous à force de rames. Nous creûmes
que c'estoit l'Auant-garde de l'ennemy,
& comme nous nous preparions à les
recevoir, nous recogneûmes que c'e-
stoient nos Gens, qui n'auoient pas sujet
d'estre fort satisfaits de s'estre separez
de nos chaloupes.

Estans arriués aux Trois-Riuieres le
20. de May, nous les quittâmes le 29.
& le 31. nous entrâmes dans dans l'ha-

habitation de Montreal, d'où on fit partir vn canot le premier iour de Iuin, pour aller donner aduis de nostre marche au Bourg d'Onnontaghé.

Le huietième de Iuin nous nous embarquâmes dans vingt canots, les chaloupes n'estant plus de seruice au delà de Montreal, à cause des endroits rapides & des Sauts qu'on rencontre au sortir de cette habitation. Nous n'auions pas encor fait deux lieues qu'une escoüade d'Iroquois Agnieronons nous ayant apperceus de loing, & nous prenâs pour des Algonquins & pour des Hurons, saisie de frayeur, se ietta dans les bois; mais nous ayant recogneuz à la veuë de nostre pavillon, qui estoit vn grand Nom de I E S V S peint sur vn beau taffetas blanc voltigeant en l'air; ils nous aborderent. Nos Americains Onnontaeronons les receurent avec mille iniures, leur reprochât leurs trahisons & leur brigandage: & se iettans sur leurs canots, ils pillerent leurs armes & prirent ce qu'ils auoient de meilleur dans leur équipage, vsans, disoient-ils, de repressailles; eux mesmes ayant esté pillés.

peu de iours auparauant par ces mesmes peuples : voilà toute la consolation que remportèrent ces pauures miserables de nous estre venus salüer.

Passant dans le Lac Saint Louïs vn de nos canots se brisa , ce qui nous est encor arriué d'autresfois dans nostre voyage ; mais nous iettans à terre, nos Charpentiers de Nauires trouuoient par tout dequoy bastir vn vaisseau en moins d'un iour : c'est à dire que nos Sauuages rencontroient facilement des choses propres pour faire les gondoles qui portoient nostre bagage avec nous. Les Architectes de ce pays ont bien plustost basti leurs Maisons, leurs Palais & leurs Nauires que ceux d'Europe : que si on n'y est pas logé si superbement , on y habite souuent plus à l'aïse & plus ioyeusement.

Nous tuasmes quantité d'Elans & de Cerfs que nos François appellent des Vaches sauuages : mais le treizième de Iuin & les trois iours suiüans nous nous trouuâmes dans des courans-d'eau si rapides & si violents, qu'il falloit se mettre à l'eau pour traïner quelquefois,

& quelquefois porter sur nos espaules nos bateaux & tout nostre bagage. Nous nous mouïillions de tous costez, car nous auions vne partie du corps en l'eau , & le ciel arrosoit l'autre d'une grosse pluye. Nous employons toutes nos forces contre le vent & contre les torrens , portant autant ou plus de ioye dans nos cœurs que de fatigue sur nos corps.

Le dix-septième du mesme mois nous nous trouuâmes au bout d'un Lac que quelques-vns confondent avec le Lac de Saint Louis, nous luy donnâmes le nom de Saint François, pour le distinguer de celuy qui le precede. Il a bien dix lieuës de long & trois ou quatre de large en quelques endroits : il est remply de quantité de belles isles en ses embouchures. Le grand fleuve de Saint Laurens s'elargissant & repandant ses eaux d'espaces en espaces fait ces beaux Lacs, puis en les reserrant il reprend le nom de Riuiere.

Le vingtième de Iuin nous passâmes le grand Saut : la mort de cinq fans de biches massacrez par nos chasseurs, &

34 *Relation de la Nouvelle France,*
cent Barbuës prises par nos pescheurs,
addoucirent nos peines. Nostre bou-
cherie & nostre poissonnerie furent
iufques à lors aussi bien garnies qu'elles
furent depourueuës de tout sur la fin de
nostre voyage.

Le vingt-cinquième, nous baptisâ-
mes, apres auoir celebré la sainte Mes-
se, vn enfant dont la femme d'vn de
nos guides Onnontoeronnonis accou-
cha en chemin: ce qui ne l'empeschap as
de poursuiure comme les autres par vne
grosse pluye qui nous accompagna tout
le iour & toute la nuit suiuiante.

Sur le soir quelques chasseurs nous
ayant découuerts & nous voyant bon
nombre de canots de compagnie, s'en-
fuirent, & laisserent de quoy piller à nos
Gens, qui se saisirent de leurs armes,
de leurs castors & de tout leur bagage:
mais l'vn de ces chasseurs ayant esté pris
nous recognûmes qu'il estoit de la na-
tion des Andastaeronnonis avec lesquels
nous n'auons point la guerre: c'est pour-
quoy nos François leur rendirent ce
qu'ils auoient butiné; ce qui n'obligea
pas nos Sauvages d'vser de la mesme ci-
uilité.

Le 26. sur les neuf heures du soir entendant vne voix d'homme assez forte, mais assez lamentable, Nous nous doutâmes bien que c'estoit quelque prisonnier échappé : Monsieur du Puisbraue Gentilhomme, qui commandoit nos soldats François, fit battre le tambour pour luy faire cognoistre que nous estions François. Ce pauvre homme n'ayant osé nous approcher, accourut à ce bruit le mieux qu'il pût. C'estoit vn Huron nommé Ioachim Ondakout, duquel nous auons parlé au Chapitre troisiéme. Il n'auoit que la peau & les os, s'estant sauué du pays des Agnieronnons à demy brulé : il auoit marché dix-sept iours parmy les bois & parmy les rochers, sans manger autre chose que quelques petits fruiéts sauuages. Nos gens luy firent prendre vn certain breu-uage pour disposer son estomach à prendre sa nourriture sans danger ; apres vne si longue famine. Nous luy donnâmes vn canot & des viures pour descendre vers nos habitations Françaises.

Le 27. de Iuin nous passâmes le dernier rapide qui se trouue au milieu du

36 *Relation de la Nouvelle France,*
chemin de Montreal à Onnontagé, c'est
à dire à quarante ou cinquante lieues de
l'un & l'autre.

Le 29. voguant la nuit aussi bien que
le iour, pource que nos provisions di-
minuoient fort, nous rencontrâmes trois
canots d'Annieronnons qui venoient de
la chasse aux hommes, rapportans les
chevelures de quatre Sauvages de la
Nation des Neds-percez, & tenant cap-
tive vne femme & deux enfans.

Le premier de Iuillet nous donnâmes
la chasse à vn canot qui parut, l'ayant
attrapé comme il estoit du bourg d'On-
nontagé : il nous dit qu'on nous y at-
tendoit, & que le Pere Ioseph Chau-
mont qui y estoit resté seul, se portoit
bien.

Le troisieme iour la famine commen-
çant de nous presser, nous fîmes nos ef-
forts pour arriuer à vn lieu nommé
Otiatanhengué, qui est vn lieu fort
recommandable pour la grande pesche
de poisson qui s'y fait chaque année.
Nous esperions y rencontrer bon nom-
bre de pescheurs & en tirer quelque
soulagement : Monsieur du Puis fit ti-

ret deux petites pieces de canon embarquées dans nos canots deuant que d'y aborder, pour leur donner aduis que nous n'estions pas loing : mais la saison de la pesche estant passée en ce quartier-là, nous n'y trouuâmes personne. Ce qui obligea nos Guides de depescher vn homme pour aller iour & nuict porter la nouuelle de nostre marche à Onnontaghé, & pour faire apporter des viures au deuant de nous. Ce Courier ne deuant pas si-tost retourner, parce qu'il luy restoit encore trente lieuës de chemin à faire, nous enuoyâmes quelques François en vn autre lieu plus proche : mais le poisson s'estant retiré, les pescheurs s'en estoient allez, si bien que ny nos filets que nous iettâmes à l'eau, ny nos industries n'eurent presque aucun effet. La famine cependant nous tenoit à la gorge, & pour comble de nostre affliction nostre Pere Superieur estoit tombé malade depuis quelque temps : nous n'auions autre liêt à luy donner que la terre, ny presque autre abry que le ciel. Nous ne trouuions en toutes nos Hostelleries ny pain, ny vin, ny chair, ny poisson. Dieu

38 *Relation de la Nouvelle France,*
nous dōna vn petit fruit sauuage qu'on
nomme icy Atoka; La ieunesse en alloit
ramasser dans les prairies voisines , &
quoy qu'il n'eust presque ny goust ny sub-
stance, la faim nous le faisoit trouuer
excellent: il est presque de la couleur &
de la grosseur d'une petite cerise.

Nos Sauvages , quoy qu'accoustu-
mez à passer les deux & trois iours sans
manger , ne se contentant pas d'une
viande si mince & si legere , se defiloient
tous les iours : si bien que de quarante
qu'ils estoient à nostre depart , il n'en re-
sta que cinq qui nous asseurerent que
iamais ils ne nous abandonneroient.
Les Sonnontoeronons prenant icy
leur congé, nous leur fismes deux pre-
sens de mille grains de Pourcelaine, l'un
pour nous preparer le chemin en leur
païs, l'autre pour mettre en oubly les
peines & les fatigues qu'ils auoient pri-
ses, venant rechercher l'alliance des
François ; & pour les porter à nous té-
moigner bon visage, quand nous les
irions voir. Nous donnâmes en parti-
culier deux capots & quelques autres
petits presens aux principaux pour les
gagner.

Le cinq & sixième de Juillet nous peschames quelques poissons, mais en si petite quantité, qu'on donna pour tous mets vn brochet assés mediocre à soixante hommes.

Le septième nous arriuasmes sur les dix heures du soir à l'embouchure de la Riviere qui fait le Lac de Gannentaa, sur les riuës duquel nous pretendions establiir nostre demeure; & le lendemain à nostre réueil nous apperceusmes des courrans d'eau si rapides, qu'il les falloit surmōter à tour de bras & à force de rames. Je vous auoie que les visages de la pluspart de nous déjà tout hayres & tout défaits parurent extraordinairement abatus. On n'auoit donné le soir à nostre couchée qu'vne goutte d'eau de vie à tous ceux de nostre suite, & il falloit partir le matin pour combattre tout le iour contre des brisants, qui nous faisoient presque autant reculer que nous auacions. En effet, nous ne fismes qu'vne lieüe ce iour là, vne partie de nos gens tombant malades, & les autres perdant courage, faute de forces. La prouidence de Dieu est admirable,

40 *Relation de la Nouvelle France,*
deducit ad inferos & reducit. Estant entie-
rement abbatu nous vismes paroistre vn
canot chargé de viures qui venoit à nous
plustost à force d'aisles que de rames.
Cette veuë guerit quasi tous nos mala-
des, nos forces rentroient par nos yeux,
& nos fatigues n'attendoient pas que
nous fussions en repos pour s'en aller.
Le regard seul nous rendoit la ioye & la
santé. Nous mettons pied à terre, &
celuy qui estoit Maistre du conuoy, apres
nous auoir fait vn petit compliment,
nous presenta de la part des Anciens &
du P. Chaumôt des sacs de bled d'Inde
& de grand Saumons qui venoiēt d'estre
cuits. Ce petit canot fut suiuy de deux
autres plus grands, aussi bien remplis
que le premier. Nous rendons graces à
Dieu de ce qu'il nous auoit accordé ce
secours si necessaire. On met par tout
les Chaudieres hautes, ce n'est que re-
jouissance. Vn beau iour efface la me-
moire de dix mauuais. Il ne reste plus
rien de nostre famine que la gloire d'a-
uoir souffert quelque chose pour nostre
Seigneur, *qui facit etiam cum tentatio-
ne prouentum.* Il nous fit bien alors ex-

perimenter la verité de ses promesses, nous donnant vne abondance plus grande au centuple, que la disette que nous auions ressentie pour son seruice n'auoit esté pressante. Je pourrois dire qu'il ramena exprés pour nous le poisson dans les Riuieres, l'vn de nos hommes ayant pris la mesme nuit vingt grands Saumons & quelques Barbuës. Et le dixième du mesme mois de Iuillet passant vn fault de cinq lieuës, qui est le plus long que nous ayons rencontré, nos gens prirent en chemin faisant trente-quatre autres Saumons à coups d'espées & d'auirons: il y en auoit si grande quantité qu'on les assommoit sans peine. Sur le soir nous trouuâmes au lieu où nous voulions passer la nuit l'vn des premiers Capitaines d'Onnontaghé qui nous receut avec vne belle harangue, dans laquelle il témoigna que la ioye que tout le païs receuoit de nostre arrivée n'estoit pas mediocre. Que toutes les quatre nations y prenoiēt part, & que tous les Anciens nous attendoient avec impatience. L'onzième de Iuillet nous trouuâmes sur les trois heures

42 *Relation de la Nouvelle France*,
apres midy à l'entrée du Lac de Gan-
nentaa, sur les riuës duquel nous auions
destiné nostre demeure, où les Anciens
sçachant que c'estoit le lieu que les Peres
Chaumont & d'Ablonauoient aggreés,
nous attendoient avec vne grande mul-
titude de peuples.

La grandeur du Lac est d'environ
deux lieuës de longueur, & d'une de-
mie lieuë de largeur. Nous y auons re-
marqué trois choses assez considerables.

La premiere est qu'on trouue du co-
sté du Midy quelques sources ou fontai-
nes d'eau salée, quoy que ce Lac soit
fort éloigné de la Mer, aussi bien que la
Lorraine, où il s'en trouue de sembla-
bles: mais ie ne croy pas que le sel s'y
face avec la facilité qu'on le pourra faire
icy. Car on trouue du sel tout fait sur la
terre aux enuiron de ces sources, & fai-
sant bouillir l'eau, elle se conuertit aise-
ment en sel.

La seconde est qu'au Printemps il s'a-
masse à l'entour de ces salines vne si
grande quantité de Tourterelles qu'on
en prend quelquesfois iusques à sept
cens en vne matinée.

La troisiéme chose remarquable est qu'il se rencontre au mesme endroit certains serpens qui ne se voyent point ailleurs, que nous appellons des serpens à sonnettes, pource qu'en rampant ils font vn bruit semblable à celuy d'une sonnette, ou plustost d'une cigale. Ils portent au bout de leurs queue's certaines écailles rondes engagées l'une dās l'autre, de telle sorte qu'en les ouurant & reserrant ils font ce bruit qu'on entend de vingt pas. Ces sonnettes ou écailles ne laissent pas de faire du bruit quand on les remuë apres la mort du serpent ; mais il n'est pas si grand que celui qu'elles font lors que le serpent est en vie. Les originaires du pais disent que ses écailles sont excellentes contre le mal de dents, & que sa chair, qu'ils trouuent d'aussi bon goust que celle de l'anguille, guerit de la fieure : ils en couppent la queue, & la teste qui est toute platte & presque quarrée, & mangēt le reste. Son corps a environ trois pieds de longueur, il est plus gros que le poignet d'un homme, & tout marqueté sur le dos de taches noires & iaunes, excepté sur la queue

44 *Relation de la Nouvelle France,*
qui est quasi toute noire. Il a quatre
dents , deux en haut & deux en bas
aussi longues , mais plus aiguës que
nos petites aiguilles. Il mord comme
vn chien , & fait decouler son venin
dans la morceure par vn petit aiguil-
lon noir qu'il tire d'une bourse où ce
poison est renfermé. Quand quelqu'un
en est mordu, il enfle aussi-tost , & si il
n'est promptement secouru, il meurt en
peu de temps tout couuert de pustules
rouges. Aussi-tost que ces Serpens voient
vn homme, ils sifflent & battent de la
queue faisant ioier leurs sonnettes , soit
pour épouuanter leur ennemy , soit pour
s'animer au combat , ou plustost parce
que Dieu leur a donné cet instinct, afin
que les hommes soient sur leurs gardes à
l'approche d'un si dangereux animal. Je
ne sçay pas si ces Serpens sont attirés par
le sel ; mais ie sçay bien que le lieu où
nous auons dressé nostre demeure en-
tourré de belles sources d'eau douce,
n'en est point infecté, quoy qu'il soit sur
les riuies du mesme Lac. Mais reprenons
nostre route.

CHAPITRE V.

*N*ostre arriuée au lieu où nous auions destiné nostre demeure, & la Reception que nous firent les peuples du pays.

I'Ay dit au Chapitre precedent que nous entrâmes l'onzième de Iuillet dans le Lac nommé Gannentaa sur les bords duquel nous allions dresser nostre demeure, estant auancez iusques à vn quart de lieuë de cet endroit : nous y mîmes nous mesme à terre cinq petites pieces de canon, dont le petit tonnerre qu'on fit entendre sur les eaux de ce lac, fut suiuy de la décharge de toutes les arquebuses de nos gens. C'estoit le premier salut que nous enuoyâmes par eau, par l'air & par les bois aux Anciens du pays qui nous attendoient avec vne grãde multitude de peuple. Ce bruit rouloit sur les eaux, éclatoit dedans l'air, & resonnoit fort agreablement dans les forests. Nous voguions en suite en bel

46 *Relation de la Nouvelle France*,
ordre, nos canots ou petits bateaux al-
lant quatre à quatre sur ce petit Lac.
Nos François firent à l'abord vne se-
conde descharge, ou vne seconde sal-
ve si adroitement qu'ils rauirent tous ces
pauvres peuples.

Les Anciens auoient fait dresser deux
échaffauts pour nous faire hautement
leurs complimens & leurs harangues,
qui furent interrompuës par vne grosse
pluye qui nous obligea tous de cher-
cher l'abry; les paroles se changeant en
caresses & en tesmoignages de ioye de
part & d'autre.

Si ces pauvres Sauvages nous fai-
soient tout l'accueil possible, faisant
voir dans leurs yeux & leurs gestes les
sentimens de leur cœur tout remply
de tendresse pour nous; nos actions
correspondoient à leur amour, en sorte
que dans tous ces témoignages de ioye
& d'affection reciproque, nous benis-
sions Dieu de ce qu'il nous auoit conser-
uez parmy tant de peines, de dangers &
de fatigues, & de ce qu'il nous auoit
enfin conduit aubout de nostre peleri-
nage.

C'est la coustume de ces peuples d'entretenir durant vne partie de la nuit ceux qui les viennent visiter , soit de complimens ; soit de discours assaisonnez des graces du país, & pleins de gentilleses à leur mode ; soit enfin par des chansons & des dances qui leur sont ordinaires : mais nous voyant assez las de la fatigue d'un si long voyage, ils nous dirent qu'ils se retireroient, de peur que leur ciuilité ne troublast nostre repos, auquel ils disoient vouloir concourir, en chantant à l'entour de nos cabanes les airs les plus doux, les plus agreables & les plus propres pour nous endormir.

Le lendemain matin douzième de Iuillet nous chantâmes le *Te Deum* en action de graces de nostre heureuse arriuée, & prîmes possession de tout ce pays au nom de IESVS-CHRIST, le luy dediant & consacrant au saint Sacrifice de la Messe. Les Anciens nous firent en suite quelques presens pour nous feliciter de nostre arriuée & nous souhaiter vn heureux establissement.

Le Dimanche suiuant, qui estoit le

48 *Relation de la Nouvelle France,*
seizième du même mois, nous accomplîmes vn vœu que nous auions fait dās les dangers de nostre voyage , promettant à Dieu de Communier tous ensemble , s'il nous donnoit la grace de nous voir tous dans le païs que nous cherchions : ayant obtenu cette faueur tous nos François receurent le pain sacré en vne Messe qui fut chantée fort solennellement : Ce fut-là que nous déplîâmes tous nos ornemens, qui seroient pauvres en France , mais qui passerent icy pour tres-magnifiques.

Le Lundy dix-septième on commença à trauailler tout de bon à nous loger, & à faire vn bon Reduit pour les soldats: nous l'auons placé sur vne eminence qui commande sur le Lac & sur tous les endroits circonuoisins. Les fontaines d'eau douce y font en abondance , & en vn mot le lieu paroist aussi beau que commode & aduantageux. Pendant que les hommes de trauail sont dans cette occupation, nostre Pere Superieur à qui Nostre Seigneur auoit rendu la santé, s'en alla avec quinze de nos plus lestes soldats au Bourg d'Onnontaghé,
éloigné

éloigné de cinq petites lieues de nostre
 demeure. Le peuple estant auerti de la
 venuë des François, sortit en foule au de-
 uant de nous. Estant à vn quart de lieuë
 du Bourg, quelques Anciens nous prie-
 rent de faire alte & de prendre haleine,
 pour escouter vne harangue gentille &
 toute pleine de complimens que nous
 fit vn Capitaine des plus considerables
 du païs, lequel marchant ensuite deuant
 nous, nous fit passer au trauers d'vn
 grand peuple qui s'estoit rangé en haye
 des deux costez. Nous le suiuiions dou-
 cement & en bel ordre suiuis d'vn autre
 Capitaine, qui venoit apres nous pour
 empescher que ce grãd monde ne nous
 ferrât de trop près. Nos soldats firent
 à l'entrée de la Bourgade vne belle sal-
 ue qui rauit tous les spectateurs. Nous
 fûmes conduits dans la Cabane de l'vn
 des plus notables & des plus fameux
 Capitaines du païs, où toutes choses
 estoient bien preparées pour nous rece-
 uoir à leur mode : on nous apportoit des
 fruiçts de tous costez, ce n'estoient que
 festins, & dix iours durant toute la pes-
 che & la chasse de cette bourgade fut

50 *Relation de la Nouvelle France*,
employée pour regaler les François ;
chaque famille nous voulant auoir à
l'enuy. Quelques temps apres vne au-
tre escouade de François en bonne con-
che arriuant tambour battant, on ne vit
iamais tant de visages épanouis, il sem-
bloit que les cœurs des Sauvages for-
toient par leurs yeux, & ie ne croy pas
qu'on puisse conceuoir, sans l'auoir veu,
lestesmoignages d'amour & de cordia-
lité qu'ils nous donnoient. Si apres tout
cela ils nous trahissent & nous massacrēt,
ie les accuserai non pas de dissimula-
tion ; mais de legereté & d'inconstance,
qui peut changer en peu de temps l'a-
mour & la confiance de ces Barbares
en crainte, en haine & en perfidie : Ad-
ioustez que les Demons cherchent tou-
tes les occasions de nous perdre, & que
si les hommes persecutent en plusieurs
endroits les Iesuites, ces malheureux
esprits auxquels ils declarent par tout la
guerre, ne les épargneront pas.

Le soir de nostre entrée les deputés
de quelques nations nous vindrent sa-
luër, & pour monstrier l'estime que les
Onnontagheronnons faisoient d'Achié-

es années 1656. & 1657.

51

dase, c'est le nom du Pere superieur, ils voulurent par vn present que sa Natte fust le lieu des conseils & des assemblées, c'est à dire le Palais où on deuoit traiter de toutes les affaires du pais. Les Onnontageronnonns nous firent aussi leurs presens avec grande ciuilité.

Les Annieronnonns ne pouuant se dispenser de la loy commune du pais firent à la verité leurs presents: mais estant piqués au jeu & ne pouuant supporter nostre alliance avec ces peuples, ils firent vne harangue plaine de risées & de raileries contre les François, & se voulant excuser de ce qu'ayant receu des presens à Quebec pour toutes les nations Iroquoises, ils ne les auoient pas distribués, ils dirent que les François estoient assez stupides pour donner des choses qui ne se pouuoient partager, & qu'ainsi ils auoient esté contrains de donner tous ces presens à leur nation.

Le Pere superieur repliqua à leurs impostures d'une maniere si pressante qu'ils se repentirent bien-tost de leurs fausses accusations. Il leur dit que la memoire ne manquoit iamais aux François qui

52 *Relation de la Nouvelle France,*
auoient la plume en main , & que si leur
esprits'oublioit de quelques choses, leur
papier les leur suggeroit au besoin. Il ra-
conta en suite tout ce qui s'estoit passé
au Conseil des François & des Iroquois
Annieronnon , fit vn denombrement
de tous les coliers de porcelaines, de
toutes les arquebuses, de tous les capots,
& en vn mot de tous les presents qui
auoient esté faits par le grand Capitaine
des François. Nomma les nations & les
personnes mesme de consideration à qui
chaque present auoit esté destiné. Puis
demanda au braue Annieronnon si ces
choses ne pouuoient pas estre données
separément. Il s'enquista des deputés
des nations, si du moins la memoire de
ces presens auoit esté portée iusques en
leur païs, puis que l'Anniercnon confes-
soit les auoir retenus. Ce pauvre homme
qui croioit que nous ne faisons que be-
gaier en leur langue , comme les Euro-
peans qui ont commerce avec eux, fut si
surpris entendant le Pere, qu'il recher-
cha depuis tous les moyens de se mettre
bien dans son esprit.

Après cette assemblée nous employas-

mes quelques iours à visiter & à gagner les diuerſes nations qui eſtoient à Onnontaghé, & qui tous les iours y abordoient pour ſe trouuer à la deciſion de deux grandes affaires, & au grand conſeil de guerre qui ſe tient ordinairement en cette bourgade.

Les deputés de Sonnontoüian & d'Oïogouan eſtant arriués, nous les alâmes ſalüer. Les premiers faiſant paroître leur deüil pour la mort de l'vn de leurs Capitaines nommé Ahiantouan tué par les Annieronnonſ au quartier des Trois-Riuieres rempliſſoient l'air de chanſons lugubres. Nous leur fiſmes vn preſent pour ſoulager leur douleur : mais quand il fallut reſpondre, l'Oïogouanronnon prit la parole & dit que la playe que les Sonnontoueronnonſ auoient receüe, auoit changé leur ioye en larmes, & leurs voix en ſoupirs & en chanſon de deüil.

Toutes les nations eſtant aſſemblées il fallut deuant que de tenir conſeil, expier le Bourg à cauſe de la mort d'vn Capitaine arriué la nuit precedente, lequel par grand bon-heur pour luy, auoit

54 *Relation de la Nouvelle France,*
receu le saint Baptesine deux iours au-
parauant, apres vne bonne & sainte in-
struction. Cette expiation se fit par deux
presens, dont l'un seruit pour essuier les
larmes de l'Onnontagheronnon, &
pour luy rendre la parole que cette
mort luy auoit rauie, l'autre pour net-
toier le sang qui pourroit estre tombé du
corps mort sur la Natte du Conseil,
L'Onnontagheronnon respondit par
deux autres presens. L'un pour donner
parole qu'on alloit couvrir ce corps, &
l'autre pour asseurer que le Conseil en
suintte seroit ouuert.

Ces peuples auoient conuoqué tous
les Estats du pais, ou plustost toutes les
Nations alliées pour reconcilier les An-
nieronnonns avec les Sonnontoueron-
nonns qui estoient sur le point d'entrer en
guerre pour la mort du Capitaine dont
nous venons de parler : Pour traiter de
nostre establissement au centre de leur
pays, & pour inuiter tous ces peuples à
mettre quelque chose dans la chaudiere
de guerre; c'est à dire pour auiser aux
moyens d'attaquer & défaire leurs en-
nemis, & fournir à quelques frais com-

muns. Voila les desseins de ces pauvres peuples ; mais Dieu en auoit d'autres bien plus releués. Il vouloit estre annoncé & presché dans vne assemblée la plus celebre & la plus nombreuse qui se puisse presque faire en ces contrées.

On tint ce grand conseil le 24. du mois de Iuillet, où toutes les Nations remirent entre les mains d'Achiendasé (qui est nostre Pere Superieur) le different d'entre les Sonnontouëronnons & les Annieronnons qui fut bien-tost terminé. Elles agréerent en suite avec des témoignages d'une bien-veillance extraordinaire nostre demeure & nostre establisement en leur pays. Chacun enfin mit ses presens dans la chaudiere de guerre. Or ces peuples estant grands harangueurs & se seruant souuent d'allégories & de metaphores, nos Peres pour les attirer à Dieu , s'accommodent à leur façon de faire: ce qui les raut, voyant que nous y reüssissions aussi bien qu'eux.

Nous auions si bien estallé & si bien dressé & rangé nos presens qu'ils paroïssent à merueille: mais le Pere Io-

Jeph Chaumont qui parle l'Iroquois aussi bien que les naturels du pays, sembla en rehausser le prix, en donnant l'interpretation.

Il ne fera pas hors de propos de remarquer en passant que ces presens ne sont autre chose que des colliers de porcelaine, des arquebuses, de la poudre & du plomb, des capots, des haches, des chaudières & d'autres denrées semblables qu'on achète des Marchands avec des castors, qui sont la monnoie qu'ils demandent pour le payement de leurs marchandises. Que si vn Iesuite en reçoit ou en recueille quelques-uns pour ayder aux frais immenses qu'il faut faire dans ces Missions si éloignées, & pour gagner ces peuples à I E S U S-CHRIST & les porter à la paix, il seroit à souhaiter que ceux-là mesme qui deuroient faire ces despences pour la conservation du pays, ne fussent pas du moins les premiers à condamner le zele de ces Peres, & à les rédre par leurs discours plus noirs, que leurs robes; ils deuroiét laisser ces sortes de medisance à la basse populace toujours mal informée de ce qui se passe, &

dont l'ignorance semble excuser les calomnies. Mais faisons bien, & laissons mal parler : puisqu'aussi bien les calomnies sont le ciment de la vertu. On nous écrit de France qu'on ne sçauroit plus fournir aux grands frais que nous faisons dans ces nouuelles entreprises. Nousy donnons nos trauaux, nos sueurs, nostre sang & nos vies : Si faute de secours nous sommes contrainsts de quitter vn poste si auantageux pour la Foy & pour la conseruation du pays, ceux qui nous persecutent n'en seront pas plus riches, & Dieu en fera moins glorifié.

Retournons, s'il vous plaist, à nos presens. Deuant que d'en donner l'explication, tous nos Peres & nos François se jetterent à genoux, mirent bas leurs chapeaux, & ioignirent les mains entonnant à haute voix le *Veni Creator* tout au long: ce qui surprit & rauit toute l'assistance à laquelle nous fismes entendre que nous ne traitions d'aucune affaire importante, sans demander auparavant le secours de l'Esprit qui regit tout l'vniuers.

Le Pere Ioseph Chaumont se leuant

38 *Relation de la Nouvelle France,*
en suite expliqua huit ou dix presens
faits pour adoucir les regrets de la mort
de plusieurs Capitaines, & pour faire re-
uiure dans la Foy de leurs enfans & de
leurs amis quelques braues Chrestiens
& Chrestiennes passées depuis peu de la
terre au ciel. Il ioignit les Algonquins
& les Hurons dans ses presens pour ne
faire qu'un cœur & un peuple avec tou-
tes ces Nations. Il dit à haute voix que
Onontaghé estant comme le Parlement
de tout le pays, & Agochiendagueté le
plus considéré dans toutes ces contrées,
Achiendase se venoit ioindre à luy com-
me la bouche d'Onontio, afin de l'ai-
der à releuer les maisons renuersées, à
resusciter les morts, à maintenir ce qui
estoit en bon estat, & à deffendre le pays
contre les perturbateurs de la paix.
Pendant que le Pere expliquoit toutes
ces choses en detail, ce n'estoit qu'admi-
rations & acclamations de tous ces peu-
ples ravis de nous voir si versés dans
leurs façons de faire.

Il fit un present en action de graces
de ce qu'on auoit fait part à Onnontio
des dépouilles qu'ils auoient rempor-

rés sur leurs ennemis , luy ayant enuoie deux enfans qu'ils auoient pris & emmenés de la Nation de Chats.

Il en fit deux autres , l'un en reconnaissance de ce qu'ils nous auoient reçus en leur pays avec autant de courtoisie, qu'ils nous y auoient inuité avec instance; & l'autre pour leur faire mettre le canot à l'eau, pour faire sçauoir à Quebec de nos nouuelles.

Enfin le Pere prenant vn ton de voix plus élevé & animant sa parole, s'écria: ce n'est point pour le commerce que vous nous voies paroistre dans vostre pays, nos pretentions sont bien plus releuées: vos pelleteries sont trop peu de chose pour nous faire entreprendre vn si long voiage avec tant de traux & tant de dangers. Gardés vos castors si vous le trouués bon pour les Hollandois; ceux mesmes qui tomberoient entre nos mains, seroient employés pour vostre seruice, nous ne cherchons point les choses perissables, c'est pour la Foy que nous auons quitté nostre païs, c'est pour la Foy que nous auons abandonné nos parens & nos amis; c'est pour la Foy que nous auons trauersé l'Océan; c'est pour la

60 *Relation de la Nouvelle France,*
Foy que nous auons quitté les grands
Nauires des François pour nous embar-
quer dans vos petits canots; c'est pour
la Foy que nous auons laissé de belles
maisons, pour nous loger sous vos écor-
ces, c'est pour la Foy que nous nous pri-
uons de nostre nourriture naturelle, &
des mets delicieux dont nous pouuions
jouir en France; pour manger de vostre
bouïllie & de vos mets, dont à peine les
animaux de nostre país voudroient gou-
ster: & prenant vn tres-beau colier de
pourcelaine artistement fait: c'est pour
la Foy que ie tiens en main ce riche pre-
sent, & que i'ouure la bouche pour vous
sommer de la parolle que vous nous dō-
nastes lors que vous descendites à Que-
bec pour nous conduire en vostre pays.
Vous aués promis solemnellement que
vous presteriés l'oreille aux parolles du
grand Dieu, elles sont en ma bouche,
écoutés-les, ie ne suis que son organe.
Il vous enuoie donner aduis pas ses
Messagers que son Fils s'est fait homme
pour vostre amour, que cét Homme
Fils de Dieu est le Prince & le Maistre
des Hommes; qu'il a préparé dans les

Cieux des plaisirs & des delices eternelles pour ceux qui obeïroïent à ses commandemens, & qu'il allume d'horribles feux dans les Enfers pour ceux qui ne voudront point recevoir sa parole. Sa loy est douce: elle deffend de faire aucun tort ny aux biens, ny à la vie, ny à la femme, ny à la reputation de son prochain. Y-a-t'il rien de plus raisonnable? Elle cōmande de porter respect, amour & reuerence à celuy qui a tout fait & qui conserue l'vniuers; Vostre esprit est-il choqué d'une verité si naturelle? I E-
S V S- C H R I S T qui est le Fils de celuy qui a tout fait s'estant fait nostre frere & le vostre en se reuestant de nostre chair, a presché ces belles veritez, il les a fait peindre & escrire dans vn liure, il a ordonné qu'elles fussent portées par tout le monde: voilà ce qui nous fait paroistre en vostre pays, voila ce qui ouvre nos bouches; & nous sommes si certains de toutes ces veritez, que nous sommes prests de perdre nos vies pour les soustenir. Que si tu les rebutes en ton cœur qui que tu sois Onnontagheronnon, Sonnontoueronnon, Annieronnon,

62 *Relation de la Nouvelle France*;
Oneïogonemronnon, Onneïontchron-
non, sçache que I E S V S-CHRIST qui
anime mon cœur & ma voix te precipi-
tera vn iour dans les Enfers. Mais pre-
uiens ce mal-heur par ta conuersion, ne
sois point cause de ta pette, obeïs à la
voix du Tout-puissant.

Ces paroles de feu, & quantité d'au-
tres semblables poussées d'vne vehe-
mence toute Chrestienne ietterent vn
tel estonnement dans ces pauvres Bar-
bares, qu'ils paroïssent tous transpor-
tez, la ioye & la crainte partageant leurs
esprits. Et l'approbation fut si generale
& si vniuerselle, qu'on eût dit qu'ils
vouloient tous mettre le Pere dans leur
cœur, ne sçachant quelle caresse assez
grande luy faire. Les larmes tomboient
des yeux de nos François voyant nostre
Seigneur si magnifiquement annoncé
en cette extremité du monde. Pour moy
i'auouë que ce que i'ay veu & entendu
en ce rencontre, passe tout ce qu'on en
peut dire ou escrire. Si apres cela le
demon renuersant la ceruelle à ces pau-
ures peuples les porte à nous mettre à
mort, *Iustificabitur in sermonibus suis.*

Nous aurons du moins iustificié nostre Dieu en ses parolles.

Le lendemain qui estoit le 25. de Juillet, à peine estoit-il iour que les Deputés de toutes les Nations nous vinrent faire des remercimens les plus aimables & les plus cordiaux qu'on puisse s'imaginer. Je ne sçay si l'Annieronnon qui cōmença, vsa de ses fourbes & de ses dissimulations ordinaires, ou si Dieu luy auoit touché le cœur; mais il rapporta fidelement tout ce que le Pere auoit dit de la Loy de Dieu, loüa hautement nos desseins, protesta qu'il ne pouuoit resister à nos raisons, & qu'il se vouloit faire Chrestien. Il nous fit les presens aussi bien que les autres Nations qui nous presserent fort de les aller instruire en leur pays.

Le 26. les Annieronnon nous demandant des Lettres pour porter aux Hollandois, avec lesquels ils ont commerce, nous loüasmes à la verité leurs Anciens qui paroissent portés à la paix: mais nous blasmasmes extremement leur ieunesse, de ce qu'elle auoient pillé plusieurs maisons à l'entour de Quebec,

64 *Relation de la Nouvelle France*,
nous leur dîmes que ces desordres les
auoient mis en guerre avec les peuples
nommés Mahinganak & avec les An-
dastahoneronnons, & qu'ils pourroient
bien tomber dans vn mesme malheur à
l'égard des François.

Le 27. Iuillet nous retournasmes sur
les riués du Lac où vne bonne partie de
nos François trauailloient à nous dres-
ser vne habitation que nous appellerons
saincte Marie de Gannentaa.

Le 30. veille de saint Ignace les prin-
cipaux d'Onnontaghé, nous vindrent
visiter & nous firent quelques presens
pour nous lier si estroitement avec eux,
que nous ne fussions plus qu'un peuple;
& pour nous dōner aduis qu'il ne falloit
pas se fier à l'Annieronnon que cette
Nation estoit fourbe & trompeuse, &
qu'ils nous prioient de nous bien forti-
fier, & de rendre nostre maison capable
de les receuoir & de les mettre à l'abry
de leurs ennemis en cas de necessité;
qu'au reste ils alloient prendre la hache
pour faire vn canot qui allast porter de
nos nouuelles à Quebec.

Le mois d'Aoust nous fut vn temps
d'exercice

d'exercice en toutes façons, nous auions basti vne Chapelle à Onontaghé; vne partie de nos Peres y estant attachés, les autres alloient par les Cabanes. On ne cessoit presque depuis le matin iusques au soir de Prescher, de Catechiser, de Baptiser; d'enseigner les Prieres, & de respondre aux demandes des vns & des autres: tant ces bonnes gens témoignent d'inclination pour la Foy. Les François qui estoient à sainte Marie du Lac de Gannentaa, faisoient tous les mestiers d'une ville pour nous loger tous, & nous conseruer au milieu de ces Nations barbares. Tout cela ne se faisoit pas sans peine, il falloit beaucoup traualier, peu dormir, coucher sur la terre à l'abry de meschantes écorces, ne manger pour l'ordinaire que de la bouillie faite avec vn peu de farine de bled-d'Inde cuittée en l'eau, sans pain, sans vin, sans autre ragoust que la faim, & estre importunés iour & nuict de certains mouchérons ou cousins, qui assaillent là de tous costés, & à toute heure. Tout cela ioint au changement d'air & aux grands trauals du voyage, altera tellement nos

66 *Relation de la Nouvelle France,*
constitutions dans les plus grandes cha-
leurs de l'année que nous tombâmes
tous malades : c'estoit chose pitoyable
d'en voir quelquesfois iusques à vingt
entassés presque les vns sur les autres, dâs
vn temps & dans vn pays où nous n'a-
uions autre secours que du Ciel. Mais
celuy qui auoit fait nostre playe, y mit
bien-tost vn bon appareil. Il enuoia dans
le fort de nostre disette tant de gibier &
tant de poisson dans nostre Lac, auant la
saison ordinaire, que les malades furent
soulagés, les conualefcens fortifiés, &
ceux qui estoient guéris, soustenus dans
leur traual. Il toucha tellement le cœur
de ces peuples qu'ils nous apportoint
avec grand amour de leurs bleds & de
leurs docteurs qui sont des faifolles &
des citrouilles du pays qui sont plus fer-
mes & meilleures que celles de France.
Ils nous presentoint aussi des espics de
leur bled nouveau, qui ne sont pas mau-
uais. En sorte que nous en fumes tous
quittes pour quelques accez de fièvre
tierce, qui nous fit esprouuer toutes les
marques possibles de bonté, que nous
donnerent les sauages pendant nostre
maladie.

Ils abordoient de tous costés , les vns nous apportant du poisson , d'autres nous reprochant que nous n'enuoions pas assés souuent au lieu de leur pesche, pour en prendre selon nos besoins : l'un des plus considerables d'Onontaghé se vint loger pour vn peu de temps aupres de nous, il fit des presens à nostre Pere Superieur pour le bon traitement qu'auoit receu son fils à Quebec , il voulut lier avec luy vne amitié de frere, & pour la nouïer estroitement il luy presenta vn colier de porcelaine.

Vn Sonnontoüeron non estimé grand chasseur, luy vint offrir vne couuerture pour conseruer la chaleur de l'amitié qu'il venoit contracter avec luy.

On nous a rapporté iusques icy que les Hollandois nous vouloient amener des cheuaux & quelques autres commodités , se réjouissant de nostre demeure en ces contrées.

Vn anciẽ Capitaine d'Oïogoen homme intelligent & employé dans les affaires publiques, nous est venu voir de la part de toute sa Nation, pour prier Achiendasé de luy accorder quelques-

68 *Relation de la Nouvelle France,*
vns de nos Peres, l'asseurant qu'on leur
feroit dresser vne Chapelle & que le peu-
ple demandoit d'estre instruit en no-
stre creance. On luy a donné le Pere
René Menard, & deux François no-
n obstant nostre grande disette d'ou-
riers. Le Pere Ioseph Chaumont le
doit accompagner iusques à Oiogoen,
& de là passer à Sonnontouan pour iet-
ter de loing les fondemens d'une belle
Mission, & d'une grande moisson qu'on
espere recueillir, s'il plaist à Dieu de nous
conseruer la paix, & de nous enuoier des
ouriers.

CHAPITRE VI.

*Vne partie des Hurons va demeurer
à Agnié.*

A Pres la defaite des Hurons dans
l'Isle d'Orleans dont nous auons
parlé au Chapitre troisiéme; ceux qui
restoient demanderent la paix à l'Iro-
quois Agnieronnon, qui leur fut accor-
dée, l'Automne dernier, à condition

que le Printemps prochain ils monteroient tous à Agnié (c'est le nom du pais des Iroquois d'en-bas) pour n'habiter d'oresnauant qu'une terre , & ne faire qu'un peuple entr'eux. Le Contract en fut passé : Et pour le ratifier trois Hurons le porterent aux anciens du pays des Iroquois qui le signerent à leur façon , par de beaux presens qu'ils firent faire à tous les Hurons par leurs Ambassadeurs : ils leurs promirent de les aller querir dans leur petites gondoles, & donnerent commission de les aduertir de se tenir prests pour cela , sans vser plus long-temps d'excuses ou de remises. Le temps déterminé estant écheu, vne troupe de cent ieunes soldats bien resolus, partit du pays pour executer ce dessein. Le gros s'arrestant à trois ou quatre iournées de Quebec, trente s'en detacherent pour se presenter aux Hurons , & les sommer de leur parolle. Le Capitaine de cette escoüade ayant demandé audience le lendemain de son arriuée , il exposa dans l'assemblée des François & des Hurons le sujet de son Ambassade, & disant franchement qu'il

venoit querir les Hurons, il les harangua en ces termes. Mon frere, c'est à toy que j'adresse ma parolle: Il y a quatre ans que tu m'as prié que ie te prisse par le bras pour te leuer & t'emmener en mon pays, tu l'as retiré quelquesfois quand ie l'ay voulu faire, c'est pour cela que ie t'ay frapé de ma hache sur la teste. Ne le retire plus, c'est tout de bon que ie te dis leue toy. Il est temps que tu vienne, tien prends ce collier pour t'ayder à te leuer, (c'estoit vn present de porcelaine qu'il luy faisoit.) Ne crains point, ie ne te regarde plus comme ennemi, mais comme mon parent, tu seras cheri de mon pays, qui sera aussi le tien: Et afin que tu n'en doutes pas, prend cét autre collier de porcelaine pour assurance de ma parolle.

Puis retournant les yeux & la parolle vers Monsieur le Gouverneur les presents à la main, il luy dit: Onontio ouvre tes bras & laisse aller tes enfans de ton sein, si tu les tiens plus long-temps si serrez, il est à craindre qu'on ne te blesse, quand nous les voudrons frapper lors qu'ils l'auront merité. Reçoy cette por-

celaine pour élargir tes bras. Je sçay que le Huron ayme la priere , qu'il inuoque celuy qui a tout fait, qu'il ioint les mains quand il luy demande quelque chose; ie veux faire comme luy , agréé que le Pere Ondesonk vienne avec nous pour nous instruire en la Foy: Et puis que nous n'auons pas assez de Canots pour emmener tant de monde , preste nous tes chaloupes. Voilà pour attirer la robe noire , & pour mettre les canots à l'eau: c'estoit des beaux colliers dont il fit present à Monsieur le Gouverneur. Le conseil fini, chacun se retira chez soy pour penser à ce qu'il deuoit respondre. Le Huron eust sans doute bien voulu se dédire , mais il n'y auoit plus de moyen, il auoit fait la faute , il la luy falloit boire. Il n'estoit plus temps d'vser de remise , il falloit marcher ou mourir de la main de l'Iroquois. Toute la nuit se passa à consulter: les aduis estant partagez , la Nation de la Corde qui estoit l'vne des trois dont la Colonie Huronne estoit composée, refusa de quitter Quebec , & les François: la Nation du Rocher iettoit sa pensée vers Onontaghé:

72 *Relation de la Nouvelle France,*
& la Nation de l'Ours, se resolut de se
mettre entre les mains de l'Agnieronon.
La conclusion donc en estant prise, &
le Capitaine de cette Nation appellé le
Plat l'ayant dit à ses gens, le matin, on
assembla derechef le Conseil, & le Pere
le Moyne en fit l'ouverture au nom de
Monsieur le Gouverneur à peu près en
cestermes. Onontio ayme les Hurons,
ce sont des enfans qui ne sont plus au
maillot, ils sont assez grands pour estre
hors de tutelle. Ils peuvent aller où ils
voudrôt sans qu'Onontio y mette aucun
empeschement. Il ouvre ses bras pour
les laisser aller. Pour moy ie suis tout
prest d'accompagner mon troupeau,
quand celuy qui me gouverne, me l'aura
permis: Je te monstreray aussi à toy mon
frere Agnieronon comme il faut obeïr
à Dieu, & comme il le faut prier: mais
estant de l'humeur dont ie te connois, tu
ne feras pas estat de la priere. Pour nos
chaloupes on ne t'en peut pas prester,
tu voys bien qu'il n'y en a pas vne dans
nos ports, chacun en a besoin pour la
traite, & pour aller au deuant d'un nou-
veau Gouverneur que nous attendons.

Ce discours fut reccu par les Iroquois avec des acclamations de ioye & mille remerciemens.

Le Capitaine de la Nation de l'Ours se voyant obligé de parler , & de dire la conclusion qu'il auoit prise la nuit avec ceux de sa Nation, commença sa petite harangue d'un ton fort , & d'une voix robuste. Mon frere, dit-il, à l'Agnieronnon, c'en est fait, ie suis à toy. Je me jette à yeux clos dans ton Canot, sans sçauoir ce que ie fais: mais quoy qu'il en puisse arriuer, ie suis resolu de mourir. Que tu me casse la teste lors que nous serons à la portée du canon d'icy , il n'importe, i'y suis tout resolu, ie ne veux pas que mes cousins des deux autres Nations s'embarquent à cette fois avec moy, afin qu'ils voyent auparauant comme tu te comporteras à mon égard.

Vn autre Capitaine grand amy de celui qui acheuoit de parler , ietta incontinent trois presens au milieu de la place pour prier l'Iroquois de bien traiter son ami en chemin: prend garde, luy dit-il, que mon frere Atsena qui se donne à toy, ne tombe pas dans la Vase en

74 *Relation de la Nouvelle France,*
débarquant, voilà vn collier pour affermir la terre où il mettra le pied : Et quand il sera débarqué, ne permets pas qu'il soit assis à platte-terre : voilà de-quoy luy faire vne Natte où il se reposera: Et afin que tu ne te mocques pas des femmes & des enfans quand ils pleurerōt se voiant en vn pays estrange, voilà vn mouchoir que ie te donne pour essuyer leurs larmes, & la sueur de leur front.

Vn troisiéme Capitaine qui n'auoit pas enuie de s'embarquer, & qui ne s'offroit pas à l'Iroquois, ne luy cacha pas sa pensée. Ie voy toute la Riuiere, dit-il, bordée de grandes & grosses dents, ie me mettrois en danger de me faire mordre, si ie m'embarquois à present. Ce sera pour vne autre fois.

L'Iroquois se voyant frustré de l'esperance d'auoir des Chaloupes, se resolut de faire des Canots, & hasta si fort son trauail, qu'en moins de cinq ou six iours il en eut suffisamment pour embarquer ceux qui s'estoient donnez à luy.

Pendant qu'on trauailloit le iour aux Canots, les nuits se passoient à faire des

festins d'adieu, dont le plus magnifique fut celuy que le Capitaine de la Nation des Ours fit pour prendre congé de Monsieur le Gouverneur, des Robes Noires & des Sauvages. Ce fut pour lors que ce Capitaine faisant paroistre son esprit & son eloquence, monstra encore plus l'affection qu'il portoit aux François. Prends courage, disoit-il, Onontio, prends courage Ondesonk. Je vous quitte, il est vray: mais mon cœur ne vous quitte pas. Je m'en vay, il est vray, mais ie vous laisse mes cousins qui valent mieux que moy. Et pour vous tesmoigner que mon país est tousiours à Quebec; Je vous laisse la grande chaudiere où nous faisons les actes de nos plus grandes réioüissances. Les autres discours dont il vfa pour cét adieu seroient trop longs à rapporter.

Le Pere Ondesonk luy fit son petit compliment à la façon des Sauvages: En luy disant: Mon frere, mon cœur est triste de te voir partir, & n'estoit que i'espere de te reuoir bien-tost au lieu où tu vas, il n'y auroit point de breuusage capable de guerir mon affliction, & l'au-

76 *Relation de la Nouvelle France,*
rois toute ma vie le cœur de trauers, &
le visage abbatu. Pour toy prend cou-
rage, tu me verras durant tous les che-
mins de ton voyage, dans tous les lieux
où tu cabaneras, dans tous les endroits
où tu débarqueras: Car Ondefonk a
esté par tout, il a fait du feu par tout, il a
fait son giste par tout, si le feu est esteint,
tien voilà pour le r'allumer, si la Natte est
ostée, voilà pour en mettre vne autre, &
se coucher mollement. C'estoit autant
de presens que le Pere luy faisoit qui
adoucissoient la douleur de cét homme
de bien. Les festins & les adieux ayant
esté longs, on se coucha fort tard, ce qui
n'empescha pas qu'on ne vist de bon
matin sur le bord de la Riuiere tous les
Hurons prests de s'embarquer avec
l'Iroquois, commençans dés-lors à ne
faire qu'un mesme peuple avec luy.



CHAPITRE VII.

L'autre partie des Hurons va demeurer à Onontagé.

LEs Iroquois Supérieurs que nous appellons Onnontagherōnons ont voulu auoir part au debris des Hurons de Quebec, aussi bien que les Iroquois d'en bas. Tous deux pour venir à bout de leur dessein ont pris la mesme route, & se sont seruis de mesmes machines, employans la force, où l'adresse leur manquoit. Il y auoit trois ans que l'Onontageronon sollicitoit le Huron à prendre son parti, & à se retirer dans son pays pour ne faire qu'un peuple avec luy. L'année 1655. il descendit pour ce dessein iusqu'à Quebec, fit au Huron en presence des François & des Sauvages de tres-beaux presens qui furent acceptez de bon cœur, & promit d'aller faire sa demeure pour tousiours dans le bourg d'Onōtaghé, pourueu qu'il y menast aussi les Robes - Noires. Les Peres

78 *Relation de la Nouvelle France,*
y allerent en effect : Mais le Huron gagné par les presens & les menaces de l'Agnieronnon se donna à luy, manquant à la promesse qu'il auoit faite à l'Onontageronnon. Ce trait de finesse & de politique barbare de l'Agnieronnon qui auoit ainsi couru sur le marché de son voisin, & l'imprudence du Huron à se donner à deux Maistres fit naistre de la ialousie dans l'esprit de l'Onontageronnon, & luy fit prendre resolution d'empescher qu'on ne luy rauist des mains ce qu'il pensoit desia tenir : & tout ensemble vn desir de se vanger du Huron qu'il croyoit l'auoir trompé. Ce dessein fit partir d'Onnontaghé cent guerriers resolués d'enleuer de Quebec les Hurons ou de gré ou de force. Ils parurent sur nos frontieres au commencement du Printemps. Ils rodoient de tous costez pour faire quelque mauuais coup. Mais comme chacun se tenoit sur ses gardes, ne pouuans venir à bout de leur dessein, apres dix iours de peine & de fatigue, quelques-vns de la troupe pressés par la faim, se jetterent dans le fort de Sillery, & demanderent à parler

à Ondefonk, c'est à dire au Pere le Moyne & aux Hurons pour tenir conseil avec eux d'une affaire d'importance. Le Pere leur fait entendre que les Hurons sont à Quebec, que c'est le lieu du Conseil, qu'il y faut aller pour traiter d'affaire; qu'au reste il les menera en assurance, leur promettant qu'ils y seront veus de bon œil. Ils y vont, avec ce fauf-conduit, & sans differer au lendemain, le Conseil s'assemble, où ces Messieurs faisant d'abord leurs excuses, de ce qu'ils estoient venus querir les Hurons leurs freres à main armée, dirent que la nouvelle qu'ils auoient apprise l'Hyuer dernier, que le Huron s'estoit dédit & auoit changé de pensée, les auoit obligez de se comporter de la sorte. Mais qu'ayant appris depuis de la bouche d'Ondefonk la fausseté de ce bruit, ils estoient tous prests de mettre les armes bas, & de se comporter en freres avec les Hurons. Ondefonk repliquant à l'Onontageronon au nom d'Onontio luy dit. On doit te loier mon frere, de ce que tu parois icy sans armes, & avec vn esprit de paix; mais

80 *Relation de la Nouvelle France,*
tu deuois estre parti de ton pays dans
cet equipage & dans cette disposi-
tion ; tu as cru trop legerement les
faux rapports qu'on t'a fait du Huron,
cette creance precipitée t'a fait prendre
les armes trop tost, il falloit t'informer
auparauant des François qui sont avec
toy, qui t'eussent fait connoistre par les
Lettres qu'ils reçoient, la fausseté de la
nouuelle qui court dans ton pays. Que
puis-je penser quand ie te voy la hache
à la main, sans aucune Lettre de nos
François, passer en cachette pardeuant
nos habitations, sinon que nous ayant
mal-traité au pays haut, tu viens aussi
pour nous mal-traiter icy bas? As tu mis
en oubly ce beau present que ie te fis en
ton pays il y a trois ans, qu'il te disoit que
le Huron, l'Algonquin, & le François
n'estoient plus qu'une teste, & que qui
frapport l'un, bleffoit l'autre. Le Pere
finissant ces reproches, luy donna un
beau collier de Porcelaine pour les luy
faire receuoir plus paisiblement, & pour
affermir la promesse qu'il auoit faite de
ne penser plus à la guerre.

En effet l'Onnontagheronnon prenant
en

en bonne part ce qu'on luy auoit dit en ami, & se fiant sur ce qu'on l'auoit assuré que le Huron n'auoit point changé de pensée; il ne luy dit que deux mots par deux presens qu'il luy fit dans l'assemblée du lendemain. Mon frere, luy dit-il, puis que tu as resolu de venir avec moy, il ne faut pas que ie t'inuite dauantage. Ie lie cette corde à ton Canot pour t'ayder à le tirer: Ie sçay bien que Onontio ne te retiendra pas: voilà vn collier pour luy faire ouurir les bras & te laisser aller. A cela le Huron n'eut que des remerciemens à faire; tu me consoles mon frere, de ce que tu as pitié de moy, de nos femmes, & de nos enfans. Ne te fasche pas neantmoins si ie ne m'embarque point aujourd'huy dans ton Canot: c'est vn Canot de guerre qui me fait peur; le cousteau que tu as laissé dedans, pourroit blesser mes enfans, & nos femmes trembleroient à la veüe de la hache que tu n'as pas encore ostée. Estant venu & t'en retournant les armes à la main, on diroit que tu emmenes des prisonniers, & non tes amis & tes freres: mais aussi-tost que quelque Ca-

82 *Relation de la Nouvelle France,*
not des François qui sont en ton pays
descendra icy bas, ie suis à toy, mene
moy où tu voudras.

L'affaire estant en ces termes, il survint
vn accident qui pensa rompre tout le
traité. Vn ieune Onontageronon frap-
pant vn Huron de sa hache & le jettant
mort sur la place, la nouvelle de ce
meurtre allarme les Hurons, qui retien-
nent prisonniers dans vne cabane deux
Onontageronnonns qui y estoient allez
rédre visite : L'Onontageronon d'autre-
part fait son possible pour empescher
que les esprits ne s'aigrissent, & dés-
approuvant le fait du meurtrier, il le
condamne de folie, & en fait satisfa-
ction. Mais enfin voyant que le Hu-
ron, qui se vouloit rendre au plus fort,
vouloit faire le mauuais, il attrape deux
Canots de ses gens qui retournoient de
la chasse, les mene dans son fort & les
tient comme prisonniers. L'affaire al-
loit prendre vn mauuais train, si le Pere le
Moyne ne s'y fut interposé heureusemēt
& n'en eust arresté le cours par ses soins
& sa diligēce. Il fit si bien par ses allées &
ses venuës, qu'il mit toutes les choses en

leur premier estat, fit rendre les prisonniers de part & d'autre, & remit le calme dans les esprits. En suite l'Onontageronnon reitere sa demande, Il presse le Huron de s'embarquer avec luy; & le Huron perseuere à s'excuser, sur ce qu'il n'est pas bien seant qu'il s'ébarque dans vn Canot de guerre, & qu'il faut attendre vn Canot de paix. Je suis à toy dès ce moment, luy dit-il, voilà des arres de ma parolle, & de mon affection, qui sont les presens que ie te fais: Et si cela ne fuffit pour te resmoigner que ie me suis donné à toy, trois de mes gens te tiendront compagnie, & porteront aux anciens les asseurances de ma bonne volonté. Nous irons à Montreal pour t'y attendre: Enuoye nous, quand tu seras arriué dans ton pays, ta ieunesse pour nous venir querir. L'Onontageronnon content de cette parolle, s'embarque dans sa petite gondolle, & fait iouïr ses auires, pendant que les Hurons de la Nation du Rocher qui est celle qui se donne à l'Onontageronnon, se preparent pour leur voyage de Montreal, & font leurs adieux à Onontio, aux Peres

84 *Relation de la Nouvelle France,*
& aux Sauvages qui restent encores à
Quebec : Et puis le 16. de Iuin se iet-
tent dans trois Chaloupes Françoises
qui les rendent en peu de iours à la fa-
ueur d'un petit vent de Nort-est à Mont-
real, où ils attendent ceux qui les doi-
uent enleuer.

CHAPITRE VIII.

*Du voyage du P. Simon le Moyne,
aux Agnieronnons.*

LA Mission des Iroquois d'en hault,
que nous appellons des Martyrs ,
n'est encore qu'une Mission volante ,
dans l'esperance de la voir un iour fixe,
comme les autres Missions. Le Pere
Simon le Moyne y donna commence-
ment l'année 1655. par le premier voya-
ge qu'il y fit, & qu'il recommença l'an-
née 1656. Et pour lequel il se prepare en-
core cette année. Ses Superieurs pour-
roient luy dire avec verité quand ils l'y
enuoient chaque année ; ce que nostre
Seigneur disoit à ses Apostres , lors qu'il

les enuoyoit precher son Euangile par tout le monde; qu'ils l'enuoient comme vne Brebis au milieu des Loups : Puis qu'un Iesuite, un Predicateur, un Missionnaire parmy des Iroquois, c'est un Agneau parmy des Loups carnassiers. C'est vne merueille de voir un Agneau au milieu des Loups, sans estre mangé des Loups : mais c'est vne merueille plus surprenante de voir des Loups changez en des Agneaux par des Agneaux. Nous auons veu cette premiere merueille en la personne du Pere le Moyne : ie ne sçay quand nous verrons la seconde. Nous esperons que Dieu nous la fera voir par son infinie misericorde quand il rangera tous les Iroquois dans le bercail de I E S V S- C H R I S T. Nous allons dans leur pais tous les ans vne fois, pour preparer le chemin à l'Euangile, pour disposer doucement les cœurs de ces Barbares à receuoir la semence de la doctrine Chrestienne, & pour appliquer le sang de I E S V S- C H R I S T, en baptisant les enfans, les vieillards, & les moribonds. Nous y allons pour la conseruation du bien public, & de la paix qui

86 *Relation de la Nouvelle France*,
est si delicate parmy ces peuples, que
le seul deffaut d'une visite qu'ils atten-
dent de leurs alliez, est capable de la
rompre. Nous y allons pour chercher
tous les moyens de rendre cette paix
commune à toutes les Nations: Enfin
nous y allons pour empescher la ialousie
qui se pourroit glisser entre les Iroquois
d'en bas & d'en-haut, si demeurant avec
les premiers, nous manquions à visiter
les derniers.

Tout cela ioint ensemble ne merite-
t'il pas bien que nous exposions nos vies
aux travaux, à la peine, & aux dangers
de la mort?

Le Pere Simon le Moyne dans le pre-
mier voyage qu'il fit à Agnié l'an 1655.
promit qu'il en feroit vn l'année suiuan-
te, si la commodité s'en presentoit: il
s'estoit obligé de parole, il la falloit gar-
der: car vn homme qui est trouué men-
teur, perd son credit & son autorité par-
my ces peuples, aussi bien que parmi
les plus honnestes gens de l'Europe.
Mais le Pere estant sur le point de partir,
vn accident suruint qui rendit le voyage
douteux. Vne troupe d'Iroquois des-

cendus à Québec attaquâ les Hurons. Vne autre bande ayant attendu dans vne embuscade les Algonquins supérieurs qui remontoient de Québec en leur pays, fit vne decharge sur eux, les mit en déroute, & tua d'un coup de fusil vn des deux Peres qui les accompagnoient pour s'en aller hyuerner avec eux, & leur monstrent le chemin du Ciel. Ce malheur nous jeta dans vne irresolution assez fascheuse; parce que rompant le voyage, on eust irrité les esprits orgueilleux des Iroquois, qui eussent soupçonné que le François eust eu dessein de venger la mort de son frere, & l'eussent voulu preuenir: d'autre-part aller avec eux, c'estoit ce sembloit aller chercher vne mort presque assurée. On méprise ce danger plustost que de manquer de parole, le Pere entreprend le voyage & arriue au pays les presens à la main: car on ne parle iamais autrement d'affaires d'importance parmy ces peuples. Il assemble le Conseil, & parle aux anciens en ces termes. Mon frere, ie ne sçay où tu as mis ton esprit, il semble que tu l'as entierement perdu. Je te viens

§8 *Relation de la Nouvelle France,*
voir les presens à la main, & tu me visites
toujours en colere, & le visage plein
de fureur. Tu as tué tout récemment
le Huron à Quebec, tu viens de casser
la teste à coups de fusil à mon frere la
Robbe-Noire; tu auois promis que tu
me viendrois querir, & tu as manqué
de parolle, tu me fais honte par tout, &
on me reproche que j'ayme vn homme
qui nous fait mourir. A quoy penses-tu!
Tien, voylà pour r'appeller ton esprit qui
s'est égaré. Tu dis qu'Onontio retient
le Huron à Quebec, qu'il l'empesche de
venir chez toy pour ne faire qu'un pays;
Tu te plains que le Huron ne te veut
pas parler, quand tu vas le voir à Que-
bec pour traitter d'affaires: Je vien icy
pour te des-abuser. Onnontio a desia
ouuert les bras pour laisser aller ses en-
fans où ils voudront, ils sont libres, il ne
les retient pas par force. Si le Huron ne
te veut pas parler, tu en es toy mesme la
cause. Comment te parleroit-il te voiant
toujours la massüe à la main pour luy
casser la teste? quitte ta hache, & tu
verras qu'il a les oreilles ouuertes pour
t'écouter, & le cœur pour te suivre: &

afin que tu n'en doutes pas, voylà vn collier qu'il te presente par mes mains.

Vn des anciens prit la parolle , & dit au Pere, ne te fasche pas Ondefonk, ie suis ton frere, nostre ieunesse n'a point d'esprit, elle frappe à l'aueugle & à l'estourdi : prend cette emplastre que ie te donne (c'estoit vn collier de porcelaine) mets-le dessus ton cœur, & ta colere se passant, tu seras guery : assure le Huron de ma bonne volonté, & dy luy que i'ay desia estendu sa Natte pour le recevoir dans ma Cabanne, & que ie luy enuoye ce collier pour attirer son Canot. En suite de ce discours la ieunesse qui auoit resolu de descendre à Quebec pour faire vn dernier effort pour enleuer le Huron, quitte le dessein de la guerre, pour prendre celuy de la chasse.

Cependant Ondefonk comme vn bon Pasteur, visite son troupeau qui soupiroit apres luy, console les affligez, instruit les ignorans, entend les Confessions de ceux qui se presentent à luy, baptise les enfans, fait prier Dieu tout le monde, exhorte vn chacun à perseuerer en la Foy, & dans la fuite du peché.

Et s'il se presente quelque Iroquois, le Pere ne le laisse pas aller sans luy donner vn mot d'instruction sur l'Enfer & sur le Paradis, sur la puissance d'un Dieu qui void & cognoist tout, qui chastie les meschans & recompense les bons.

Vn iour vn Iroquois s'entretenant avec ce Pere, luy raconta avec estonnement la coustume d'un Huron Chrestien dans les supplices qu'on luy auoit fait souffrir; depuis peu de temps dans le village. C'estoit vn ancien Chrestien qui auoit veritablement la Foy, & dans le cœur & dans la bouche. Il estoit plein d'affection enuers la sainte Vierge, dont il estoit vn feruent Congreganiste. Cét Iroquois donc qui auoit aidé à le brûler, disoit à Ondesonk: Nous n'auons iamais veu personne qui ayme la priere comme cet homme. Il prioit Dieu continuellement sur l'echafaut, & exhortoit avec amour ses concaptifs de penser souuent au Ciel, & à Dieu qui les y attendoit. Mes freres, crioit-il tout haut, parlant aux Hurons Chrestiens: Souuenez-vous que les François s'assemblent aujourd'huy tous dans l'E-

glise pour offrir le sacrifice à Dieu. Ils prient Dieu pour nous, faisons le mesme de nostre costé: que si nos ennemis ne permettent pas que nous fassions nostre priere à nostre ordinaire, comme nous faisons à l'Isle d'Orleans à voix haute; au moins que chacun de nous prie en son particulier dans son cœur. Pour moy ie ne crains ny leurs ruses, ny leurs haches toutes rouges de feu: ils ne m'empescheront iamais de parler à Dieu, pour le prier d'auoir pitié d'un pauvre garçon qui l'a tant & si souuent offensé. En effet adioustoit l'Iroquois, cet homme auoit quelque chose de plus qu'humain, nous l'auons tourmenté dans le dessein de tirer de sa bouche quelques cris; mais au contraire il ne cessoit de soupirer doucement, & tenoit tousiours les yeux fichez au Ciel, comme s'il eust parlé à quelqu'un, nous n'entendions pas distinctemēt ce qu'il disoit: Mais il reïteroit souuent ces paroles: mes freres ie m'en vay au Ciel où ie prieray celuy qui a tout fait pour vostre salut. Enfin iusqu'au dernier soupir que nous luy arrachasmes par la violence des tout-

92 *Relation de la Nouvelle France,*
mens, il ne parla que du Paradis.

Cét exemple & ces discours & plusieurs autres semblables que les Iroquoisont veu & entendu souuent, seroient capables d'amollir leurs cœurs, & de les disposer à la Foy, s'ils n'estoient plus durs que les rochers : Nous espérons neantmoins que la continuation des soins qu'on a de leur salut, aura son effet entemps & lieu : Et que la grace distillant sur ces cœurs de pierre, y fera enfin l'impression que nous souhaitons, puisque comme dit le Poëte, *gutta cauat lapidem.*

CHAPITRE IX.

*De la residence de saint Ioseph,
en l'Ance de Sillery.*

LA Foy & la Religion ayant pris leur naissance en la Croix, il est impossible de les bien prescher, & de les bien establir, que par la Croix. C'est ce qui ne nous a pas manqué, depuis plus de trente ans, que nous trauaillons

en cette extremité du monde, pour amener des peuples à IESVS-CHRIST, & luy dresser vne nouuelle Eglise. L'eau a quelquesfois englouti par des naufrages quelques-vns de nos braues Neophytes ; l'air a causé de temps en temps, par sa corruption des epidimies , qui ont enléué vne partie de ces peuples. Les guerres ont exterminé quantité de bourgades, & consommé des Nations toutes entieres. Les ennemis de la Foy ont tué & massacré, brûlé & mangé les peres & les enfans, ie veux dire, les Predicateurs de l'Euangile, & ceux qui l'auoient receuë.

Si bien que ce n'est pas sans raison, qu'on a quelquesfois appellé ce pays-cy, le pays des Croix. Dieu nous en a enuoieé cette année de precieuses, qu'il en soit beny à iamais. Je n'en toucheray qu'vne en passant, pour venir à la consolation que nous ont donné quelques bons Neophytes. Le 13. de Iuin de cette année 1657. le feu s'estant jetté dans vn bucher , sans qu'on ayt pû sçauoir comment, on vit en peu de temps en la residence de saint Ioseph, nostre maison

94 *Relation de la Nouvelle France*,
& celle d'un bon sauvage Chrestien
toutes en flammes, & pour cõble de
nostre infortune, le feu les poussa si vio-
lemment, & si promptement vers l'E-
glise, dans laquelle vne bonne partie de
ces peuples a pris naissance en I E S V S-
CHRIST, qu'il fut impossible de la sau-
uer. Son Maistre Autel enrichi d'or, & de
ce beau rouge de corail, qui frappoit si
doucement les yeux de ces bons Neo-
phytes, & qui leur donnoit des tendres-
ses pour leur Aïamihimikiouap, c'est à
dire pour leur maison de prieres, fut pres-
que en vn moment reduit en cendres.

Cette Eglise estoit dediee à Dieu sous
le nom de S. Michel, suiuant le desir
de celuy qui auoit donné vne bonne
partie des deniers pour la bastir. C'e-
stoit la premiere de tout le pays erigée
pour les nouveaux Chrestiens. On la
pouuoit appeller la Matrice de tout le
Christianisme de ce nouveau monde,
pour ce que les Montagnais & les Al-
gonquins s'estans conuertis en ce lieu,
donnerent enuie à toutes les autres Na-
tions, qui depuis ont receu I E S V S-
CHRIST, d'écouter sa parole, à l'exem-

ple de leurs Compatriotes. C'estoit l'azyle & le refuge des François voisins qui deplorent cét incendie autant que nos bons Neophytes. Et les vns & les autres nous pressent de releuer ces ruines : mais nous n'auons pas les bras assez forts sans vn secours plus grand que celuy qu'ils nous pourroient donner pour reestablir de nous mesmes vne perte si notable.

Le braue Neophyte, de qui la maison & tout le petit bagage fut deuoré par ces flammes, estant interrogé si ce defastre ne l'auoit pas beaucoup touché, respondit sainctement : Si la Foy ne m'auoit appris que celuy qui a tout fait, est le Maistre de ses ouurages, & qu'il en dispose sagement comme il luy plaist, ce coup m'auroit attristé : mais pourquoy le quereller & se facher d'une chose qui luy appartient, puis qu'en nous donnant la Foy, il ne nous promet pas les biens de la terre, mais ceux du ciel, que le feu ne sçauoit consommer?

Vne bonne femme appelée Liduine, ayant esté instruite dans cette mesme Eglise, fit paroistre d'as vne fascheuse

96 *Relation de la Nouvelle France,*
rencontre vne confiance en Dieu tres-
remarquable : car rencontrant en son
pays avec quelques-vns de ses compa-
triotés vne trouppé d'Iroquois qui sor-
toient d'une embuscade pour venir fon-
dre sureux, Liduine épouuantee se iet-
tant dans l'espais de ces grâdes forests, y
entraigna après soy quatre de ses enfans,
& s'y voyant abandonnée de tout se-
cours humain, elle s'adressa à Dieu les
genoux enterre & les larmes aux yeux.
Mon IESVS, dit-elle, nous sommes
morts si vous n'avez pitié de nous. Je
suis malade, & à peine puis je mettre
vn pied deuant l'autre, & ces enfans ne
sçauroient marcher : Où irons nous ?
Que ferons nous sans viures & sans for-
ce ? C'est de vous seul que nous attendõs
du secours ? Vous estes infiniment bon &
tout puissant : Vous aimez les enfans qui
sont innocens, & ceux qui vous veulent
seruir de bon cœur : Ne laissez-pas mou-
rir ces petites creatures : N'abandonnez
point la mere, qui vous demande par-
don de ses pechez, & qui vous promet
de se confesser à la premiere habitation
des François qu'elle rencontrera, si elle
y peut

y peut arriuer deuant que de mourir. En
 dessus elle auance dans ces grands bois,
 sans autre prouision que de l'esperance
 en Dieu, se nourrissant l'espace de dix
 iours qu'elle marcha, de cette pensée,
 qu'elle auoit tousiours au cœur, & quel-
 ques fois en la bouche: IESVS vous estes
 bon, vous me pouuez donner la vie,
 vous seul donnez de la force à mes en-
 fans pour les faire marcher, vous seul
 les empeschez de pleurer & de mourir
 de faim. Enfin lassée de trauail & de fa-
 tigue, elle arriua heureusement aux trois
 Riuieres: Et ce qui accreut sa ioie, fut
 qu'elle y rencontra son mary qu'elle
 croyoit mort au combat. Il ne faisoit
 que d'arriuer par vn autre chemin. Et
 pour comble de benediction cet hom-
 me qui passoit pour vn grand Jongleur,
 & vn maistre Sorcier, quitta son infide-
 lité, pour embrasser par le Baptisme la
 Foy de IESVS-CHRIST: la femme s'ac-
 quitta de sa promesse par vne bonne
 confession qu'elle fit, & par les remer-
 cimens & actions de graces qu'elle
 rendit à Dieu son vnique bien-faicteur.

Vne de nos anciennes Chrestiennes

98 *Relation de la Nouvelle France,*
fit paroistre vn courage d'Amazone
dans le combat qui fut liuré à sa chaste-
té par vn François , dont elle sortit vi-
ctorieuse. Et voici comme elle raconta
le faict au Pere qui a la direction de son
ame. Tirant de son sein vn Crucifix
qu'elle portoit pendu au col : voyez-
vous ce Crucifix (luy dît-elle) il a sau-
ué autresfois mon corps du feu des Iro-
quois , & cette nuit il a sauué mon ame
des flammes de l'enfer. Je fus poursui-
uie, il y a vn an par les Iroquois qui me
vouloient rair l'honneur & la vie, pour
me sauuer plus promptement & pour
euitier leur rage , ieiettai mō bagage & la
pluspart de mes habits, & m'enfuis pres-
que toute nuë dans les bois. Je pris mon
Crucifix en main, n'ayant plus d'autre
recours qu'à celuy qu'il me representoit,
& ie luy dis du fond de mon cœur :
Mon Dieu & mon Sauueur, ie ne crains
pas de mourir , vous le sçauiez; mais ie
crains de tomber entre les mains de ces
vilains qui font vn ioüet de la pudicité
des pauvres captiues : cachez-moy dans
vos playes & dans vostre costé. Je les
baisois amoureuxment l'une apres l'autre

tre. Apres cette priere ie sentis tant de force dans mon corps, que fuiant d'un pas leger, ie me vis en peu de temps hors du danger de l'ennemi. Mon Pere, disoit-elle, ie ne t'auois pas encore dit cette merueille, en voici encore vne autre que tu ne sçais pas, & que i'ay bien de la peine à te dire: car elle est bien estrange. Cette nuict ce mesme Crucifix a sauué mon ame, qu'un François s'est efforcé de perdre, en me voulant rauer l'honneur par son impudicité. Il m'a prise par la main & me tirant à part il m'a fait entrer dans vne maison: il m'a iettée par surprise & par force sur vn liçt, aussi-tost ie me suis mise à crier, & l'ayant repoussé, i'ay tiré mon Crucifix de mon sein, ie luy ay dit dans la chaleur de ma colere: Miserable, que veux-tu faire? Veux-tu encor crucifier derechef celuy qui a donné son sang & sa vie pour toy & pour moy? Si tu ne crains point de faire tort à mon honneur, crains d'offenser celuy qui te peut damner. Quoy, voudrois-tu me perdre en te perdant par vn peché que Dieu a en horreur? A ces mots il lascha prise, &

100 *Relation de la Nouvelle France*,
moy me voyant deliurée d'un si grand
danger, ie me retiray tout estonnée
dans ma cabane, resoluë de demander
Iustice au Capitaine des François. Ce-
ci arriua le soir, & le lendemain matin
cette genereuse Chrestienne vint trou-
uer le Pere à l'Eglise vn present à la
main, pour l'offrir à Dieu en action de
grace de l'auoir retirée du precipice où
elle alloit tomber; Et pour le prier de la
fortifier dans de semblables rencontres:
elle se ietta en suite aux pieds du Pere
pour luy faire sa confession.

Cette mesme Amazone fit encore
vne action aussi sainte que genereuse.
Ayant esté sensiblement offensée par vne
sienne parente, & sentant que son cœur
se portoit à la vengeance, elle luy dît,
c'est de toy, qui és meschant que ie me
vengerai. Et là dessus elle va trouuer
celle qui luy auoit fait insulte, luy de-
mande pardon, & la prie fortement
d'oublier le passé, & de viure avec elle
comme si elles estoient sœurs.

Vne pauvre malade couchée sur le
fumier à demie pourrie d'ulceres depuis
deux mois, ne pouuoit assez tesmoigner

de recognoissance de l'assistance que luy rendoit vn de nos Peres par son soin & par ses visites. Ha ! mon Pere, disoit-elle, que tu me fais de bien, de me venir voir ! ie suis réjouie quand ie te voy, tu me fais prier Dieu ne le pouuant faire toute seule, tu m'encourages à porter mon mal patiemment, & à en faire mon profit : Enfin tu m'ouures la porte du Ciel par tes visites, & par tes instructions. Quand ie t'ay veu durant le iour, il me semble à la fin de la iournée que i'ay profité de mes douleurs.

Vne troupe de Sauvages pensa perir de faim dans les bois l'Hyuer dernier, les Sorciers & les deuins ont recours à leurs demons pour estre assistés dans leur besoin ; ils entrent dans leur tabernacle, ils ionglent, ils iouient de leurs tambours : enfin ils n'épargnent rien de leur mestier ; mais en vain. Dans cette troupe de Sauvages il se trouua vn bon Chrestien appellé Iean Baptiste, qui fut sollicité de renoncer à la priere, & de faire comme les autres pour se deliurer de la faim. Je n'ay garde de le faire, dit-il : Dieu est le seul Maistre de ma

102 *Relation de la Nouvelle France*,
vie, qui en disposera selon son-bon plaisir, j'auray recours à luy, & j'espere qu'il ne m'abandonnera pas : quand i'en de-
vrois mourir, ie ne changeray pas de resolution: car apres tout si ie le fers bien, il me donnera vne vie heureuse, apres celle-cy : Et vous qui le méprisez, ferez miserables en l'une & en l'autre.

Sa parolle s'est trouuée veritable; car vne partie de ceux qui ont eu recours au Demon, ont esté tres-miserables, & celui-cy s'estant separé des Infidelles, n'a point experimenté les effets de la faim, ny de la maladie; & vit dans l'esperance d'un bon-heur eternal.

Vn Capitaine des plus fameux entre les Algonquins fit vn festin à ses secondes nopces, où il inuita quelques François assez considerables, & les principaux de sa nation; auxquels il tint ce discours: Mes freres ie commence à vieillir, il y a tantost vingt - ans que ie suis Chrestien, & que j'en fais profession. Je suis resolu de mourir dans la Foy que j'ay embrassée, & dans la doctrine que les Peres m'ont enseignée; ie me suis marié pour la seconde fois: mais

ſelon la couſtume de l'Egliſe , pour
m'attacher plus fortement à l'obli-
gation qu'ont les Chreſtiens de ne
quitter iamaïs leurs femmes : & pour
rompre les mauuaiſes couſtumes qui re-
gnent de tout temps parmi noſtre ieu-
neſſe. Si ie viens à manquer en ce point,
ou à faire quelque choſe contraire au
Chriſtianisme , ie vous prie de me re-
prendre ; & de ne me point eſpargner.
Vous me ferez plaisir de me redreſſer :
& de me remettre dans le bon chemin.
Ce Capitaine dit bien , mais il fait en-
core mieux. Ie ne ſçay s'il aura beau-
coup d'imitateurs en ce point , puis
que la loy de l'indiffolubilité du mariage
à autresfois ſemblé bien dure , meſme
a quelques Diſciples de IESVS, CHRIST,
qui diſoient à leur Maïſtre , *Si ita eſt cau-
ſa hominis cum uxore , non expedit nu-
bere.*



CHAPITRE X.

*Des Sauvages Hurons devant leur
enlèvement de l'Isle d'Orleans.*

N Os Sauvages, écrit vn Pere qui en auoit soin, sont en fort bon train. Ils font paroistre, ce me semble, beaucoup plus de foy, & de pieté qu'à l'ordinaire, sur tout ceux qui sont de la Congregation, dont le nombre est de quatre-vingt, *probat omnes testimonio fidei & pietatis*. Ils ont passé l'Aduent dans vne ferueur toute particuliere, chacun ayant pris à tâche de s'auancer plus solidement en la vertu. Plusieurs croyant qu'une Messe estoit trop courte pour satisfaire à leur deuotion, en ont entendu deux tous les iours. D'autres sont venus salier le saint Sacrement le matin auant le temps des Pieres; d'autres sont venus à Midy reglement, sans que le froid, ou le mauvais temps peust empescher leur ferueur.

Depuis trois semaines certaines grosses fieures ayans attaqué plusieurs de nos Sauvages , dont quelques-vns ont esté fort abbatus , les principaux de la Congregation ont eu soin de visiter les malades , & de les consoler ; ce qui a esté mieux receu d'eux que mes visites. Nos Congreganistes ont fait paroistre en leurs maladies la pieté qu'ils recommandoient aux autres.

Nous en auons perdu vn , nommé André, qui estoit meur pour le Paradis. Il s'estoit disposé dès le commencement de l'Aduent , par vne ferueur qui le faisoit admirer de tous nos Congreganistes. Il estoit fort incommodé d'un coup de fusil qu'il auoit receu dans la cuisse depuis huit ou neuf mois ; ce qui le faisoit marcher avec bien de la peine. Il me dit , au commencement de l'Aduent , qu'il eust bien desiré venir trois fois prier Dieu chaque iour deuant le saint Sacrement : mais que la chose luy estant trop difficile , il preuiendroit le son de nostre Cloche le matin & le soir , & ne sortiroit point de la Chapelle que toutes les Prieres ne fussent ache-

106 *Relation de la Nouvelle France,*
uées. Il venoit le matin d'ordinaire trois
quarts d'heure avant tous les autres. Il
auoit vn zele, que ie n'ay iamais veu en
aucun Sauuage , pour me faire connoi-
stre les fautes des Congreganistes , sans
espargner ses parens : ce qui m'aidoit
beaucoup pour y apporter remede.

Nos Congreganistes ayans tous ieû-
né les quatre-Temps , & la veille de
Noël, ce bon homme le fit avec tant
d'austerité, qu'estant venu dès le soir de
la veille de Noël, à dessein de passer la
nuict en la Chapelle , pour attendre le
temps de la Messe, il refusa vn morceau
de pain que ie luy voulus donner pour sa
collation.

Ie l'auois aduertty qu'il feroit sa petite
promesse à nostre-Dame , le iour de la
feste. Il voulut se donnant foy-mesme,
y ioindre vn present de porcelaine ,
pour tesmoigner que tout ce qu'il auoit,
estoit au seruice de la sainte Vierge.

Le soir de ce mesme iour estant fort
attaqué de la maladie dont il mourut , il
me demanda congé de faire festin à vne
centaine de Chrestiens, auxquels il parla
si auantageusement de l'estime qu'il

faisoit de la Foy, qu'il en toucha plusieurs, & quelques-vns se vinrent confesser au sortir de là. Il mourut le dernier iour de l'an. Il prioit presque tousjours Dieu, & le iour de sa mort, il auoit dit quatre dixaines de son Chapelet. Vn quart d'heure auant qu'il passast, nous estions enuiron vingt en prieres aux pieds de son liect. Il repetoit tout ce que nous disions, se l'appliquant lors: que nous disions *I E S V S* ayez pitié de cét homme mourant; *I E S V S*, disoit-il, ayez pitié de moy, ie vais mourir, & ie meurs avec ioye, parce que ie suis Chrestien. Il nous tiroit les larmes de deuotion.

L'honneur qu'il a receu de tout le Bourg & sur tout la Congregation, a esté grand. Aussi-tost qu'il eut rendu l'ame, huit Chrestiens furent prier Dieu à genoux, proche de son corps, vne bande succedant à l'autre. Le lendemain les principaux de la Congregation porterent en don à sa Cabane, vne peau d'orignac, richement peinte, pour honorer son corps: & de quoy faire vn festin à tous les inuitez. Nos Musiciennes y entonnerent avec beaucoup de deuotion

les airs qui sont pour les trepassez , dans le ton de l'Hymne, *Pie Iesu Domine*. En suite on dit vne dixaine du Chapelet à deux chœurs. Tous les Congreganistes s'estant rendus dans la Chapelle au son de la Cloche , ils en sortirent deux à deux suiuis des principaux Officiers, qui se rendirent tous en bel ordre à la porte du Bourg, où le corps nous estant liuré, les Congreganistes seuls reprirent le chemin de la Chapelle , où l'ayant introduit, nous dismes deux dixaines du Chapelet, & quantité d'autres Prières. Après quoy nous portasmes le corps au lieu où il deuoit estre enterré. Le tout avec vne rare modestie , & vne deuotion qui parloit du cœur , & donnoit iusques au cœur.

Nos Chrestiens ont fait diuers petits presens de pourcelaine , huile & bled-d'inde au petit Iesvs , que nous auions mis dans la Creiche à Noël; ce qui a esté appliqué pour les pauvres. Dieu benisse ces petits commencemens. Ce sont iusques icy les termes de la Lettre du Pere, qui alors auoit le soin de cette Mission.

Vn ieune-homme d'environ trente ans , remarquable pour ses exploits de guerre , auoit eu depuis son enfance tousiours la Foy dans le cœur. Mais les débauches de la ieunesse l'auoient ietté dans le desordre, d'autant plus malheureusement qu'il auoit vn attrait de beauté si puissant sur l'esprit des femmes, mesme les plus chastes , qu'il sembloit auoir quelque charme pour enleuer les cœurs. Comme souuent il retomboit dans le peché, vn de nos Peres indigné contre ses recheutes , le menaça fortement des punitions de Dieu, qui ne tarderoient pas à paroistre sur luy. Peu de iours apres ; dans l'horreur d'une nuit obscure vn spectre espouuantable luy apparut, comme voulant l'estouffer, & le saisissant à la gorge. Il songe à Dieu en cette rencontre , & à l'excez de son peché. Et pour s'en vanger sur luy mesme, il prend vn tison enflammé, qu'il applique sur sa chair nuë, se disant à soy-mesme : Eprouue mal-heureux pecheur, si tu pourras souffrir le feu d'enfer. Cette main qui l'auoit saisi à la gorge pour l'étouffer , quitte prise , & il se

110 *Relation de la Nouvelle France,*
voit en liberté. Il passe le reste de la nuit
dans des promesses à Dieu, qu'il va
changer de vie, & il attend avec impa-
tience le point du iour, pour aller à
confesse. Ce ne fut pas sans larmes ny
sans sentimens de douleur, qui firent
bien connoistre que ce coup là estoit du
Ciel. Il demeura plus de deux heures en
oraison, où son cœur parloit plus que sa
langue. Vne maladie le saisit, qui dura
plusieurs mois, avec des douleurs ex-
traordinaires. C'estoit vne consolation
bien sensible que d'ouïr les colloques
qu'il faisoit à Dieu; iamaïs on ne l'enten-
dit pousser aucune plainte, sinon d'a-
mour, non pas mesme vn mouuement
d'impatience. Son cœur estoit à Dieu, &
il ne respiroit que luy : Quand quel-
qu'un de nos Peres l'alloit visiter, il re-
prenoit des forces, pout luy tesmoigner
qu'il s'estimoit heureux de se voir en vn
estat, où il ne pût songer qu'à Dieu : &
en l'embrassant avec amour, les larmes
aux yeux, il luy disoit : Helas, mes pe-
chez me seront-ils pardonnez? Mais tout
de bon, Mon Pere, croyez - vous que
j'aille au Ciel, nonbstant les pechez que

i'ay commis contre mon Dieu, qui doit estre mon iuge? Comme on l'en asseuroit, ses larmes couloient en plus grande abondance, lors qu'il disoit: Helas! mon Dieu, que vous estes bon, & que vous seul meritez d'estre aimé! Mon cœur vous veut aimer, & plus i'ay péché, plus ie vous veux aimer, & veux mourir, en vous aimant. Tandis qu'il eut la parole libre, il employoit vne bonne partie du iour & de la nuit en Prieres. Souuent il prenoit son Crucifix en main, & il luy parloit avec tant d'amour & de larmes, que ceux qui le voyoient, en estoient touchés au vif. Il ne pouuoit souffrir qu'on luy parlast des choses de la terre. I'ay, disoit-il, trop vescu pour la terre, il est temps, que ie viue, & que ie meure pour le Ciel. Sa mere le pria vn iour de demander pour elle, enuiron vn arpent de terre, où elle pût semer du bled, pour l'entretien de sa famille; car nos Peres font faire de grands abbatis de bois, & la terre estant disposée pour le trauail de la culture, ils en font le partage, entre ceux qui estant bons Chrestiens, n'ont pas

assez de forces, afin de se pourvoir eux-mesmes. Ce ieune homme, quoy qu'abatu de maladie, se mit presque en colere contre sa Mere. Suis-ie en estat, luy respond-il, de songer à vos champs? Pourquoi me parlez-vous de ce que dans peu de temps il vous faudra quitter? Que ne me parlez-vous du Ciel, puisque c'est là où doiuent tendre nos desirs? Puis s'adressant au Pere; Si elle n'est, dit-il, meilleure Chrestienne qu'elle n'a esté iusqu'à maintenant, il n'est pas iuste qu'elle soit preferée à ceux qui meritent plus qu'elle: fay ce qui sera pour son bien.

Cela dit, il r'entra incontinent en soy-mesme: & iugeant qu'il auoit parlé d'un tontrop aigre, il demanda pardon à son Confesseur.

Cependant la mort fait ses approches. Il est saisi de conuulsions si furieuses, & iette des cris si horribles, que tout le monde en est effrayé. Il semble qu'il combatte quelque Démon qui luy ayt apparu. Marie secourez-moy. I E S V S sauuez-moy. Mon Dieu, ayez pitié de moy, s'écrie t'il comme tout hors de
foy-

foy-mefme. Ces terreurs continuerent auffi bien que fa priere iufques au dernier fouspir. Le Pere qui l'affiftoit ne luy manqua pas au befoin, adorant en mefme temps les effets de la Iuftice & de la Mifericorde de Dieu fur ce ieune homme qui portoit iufques à la mort la peine de fes pechez, pour ne la pas porter dans l'eternité. Il fe nommoit Iacques Atohonchioanne.

Vne ieune fille qui auoit efté pres de deux ans dans le Seminaire des Vrfelines, s'oublia affez-toft apres en eftre fortie des promeffes qu'elle auoit fait fouuent à Dieu, d'euitier le peché. Les remonftrances y eftant inutiles, vne perfonne qui l'aimoit felon Dieu, demanda pour elle qu'elle tombaft en quelque griefue maladie, qui peuft arrefter le cours de fes deſbauches, & la faire r'entrer en foy-mefme. Cette priere eut bien-toft fon effet. Elle tombe malade, & incontinent les ſemences de l'Eternité, qu'on auoit iettées dans ſon ame, commencerent à pouffer des fruiſts du Paradis. Elle demandoit pardon à Dieu d'yn cœur parfaitement contrit, elle le

114 *Relation de la Nouvelle France,*
remercioit amoureusement de ce qu'il
auoit arresté les dereglemens de sa vie,
elle le prioit avec vne tendresse de cœur
merueilleuse qu'il ne luy rendit point la
santé, dont peut-estre elle auroit abusé,
mais plustost qu'il prolongeast ses dou-
leurs & sa maladie. La mort suruenant
là dessus, luy fut vne assurance de son
salut.

Elle auoit fait le mesme iour vne Con-
fession generale. Vne sienne compagne
craignāt qu'elle n'eust oublié quelque vn
de ses pechez luy en renouella la me-
moire. Elle auoit deja perdu la parole,
ses yeux parlerent par ses larmes, & sa
bouche ne peut parler que par les san-
glots de son cœur. Le Pere qui estoit là
present, luy aiant donné l'absolution
qu'elle luy auoit demandée par signe,
aussi-tost elle expira.

Vne bonne vieille Chrestienne n'auoit
i'amaïs pû apprendre d'autre priere que
quatre mots, I E S V S ayés pitié de moy,
que i'aïlle au ciel apres la mort. Mais
elle auoit vne telle habitude à les repe-
ter iour & nuit, qu'ayant perdu la parole
& le iugement pour toute autre chose,

es années 1656. & 1657. 115

elle continua cette priere iusques au dernier soupir, d'un visage si rempli de ioye, qu'à la voir leuer les yeux au ciel, on iugeoit bien qu'elle portoit là tous ses desirs.

Il y a vn an que cinq Iroquois Agnicronnōs, ayant esté pris à la guerre par les Algonquins & Hurons, furent bruslez, apres auoir receu le saint Baptesme: mais ce qui nous parut de plus aimable en leur conuersion, fut que quatre d'entre-eux se trouuerent suffisamment instruits d'abord qu'on leur parla. Nos Chrestiens dans leur captiuité, iettent par tout où ils sont des semences du Christianisme.

Vn d'eux ayant appris vne priere qui s'adressoit à I E S V S- C H R I S T, demanda de luy-mesme qu'on luy parlast de la Mere qui l'auoit enfanté estant demeurée Vierge: & la Mere & le Fils, disoit-il, sont entrez en mon cœur, ie ne veux pas les separer, & ie veux que ma langue les inuoque iusques à la mort. En effet il les inuoqua constamment iusques au dernier soupir.

L'année derniere vn François fut res-

116 *Relation de la Nouvelle France,*
moin de l'heureuse mort de deux Hurons qui furent bruslez dans le païs des Iroquois Agnieronnons, où ce François estoit captif. Il nous a asseuré que ces deux Hurons avant que d'estre attachés au poteau où ils deuoient estre bruslez, demanderēt du temps pour prier Dieu, ce qui leur fut accordé. Le plus ieune des deux ayant apperceu ce François; Mon Frere, luy dit-il, si iamais tu vois Outsisfont(c'est le nom que les Hurons donnent à Monsieur de Becancourt, chez lequel ce ieune Huron auoit demeuré deux ans) tu luy diras que ie meurs Chrestien, que les tourmens ne m'estonnent point, à cause qu'ils ne me peuuent oster l'esperance du Paradis.

Vne pauvre Chrestienne Algonquine qui auoit esté faite captiue en mesme temps, estant sur le point d'estre brûlée, fit aussi ses prieres avant que de mourir, & inuita le mesme François à prier avec elle: Le Dieu qu'adorent les Chrestiens n'estant pas moins adorable au milieu des feux & des flammes, & au milieu d'un peuple infidele & barbare, que dans les Eglises les plus augustes de la terre.

Vne Chrestienne fuyant au bruit des Iroquois, avec deux petits enfans, qui à peine la pouvoient suivre; ils furent six iours égarez dans les bois. A leur retour vn de nos Peres interrogeant cette pauvre femme dequoy elle auoit vescu dans les bois. I'ay vescu de prieres, respondit-elle tout simplement. Quand ie me sentoys foible, ie disois mon Chapelet, & aussi-tost sentant mes forces reuenir, ie poursuiuois mon chemin. Pour mes enfans, ie leur cherchois de petites racines, & quelques bouts de branches de petits arbrisseaux, dont les bestes viuent dans les bois. La nuit, ie faisois dormir mes enfans, & moy ne pouuant m'endormir, ie les passois presque toutes entieres en prieres, & à dire mon Chapelet. C'est la sainte Vierge qui seule m'a sauué la vie, & c'est elle que ie veux seruir de tout mon cœur iusques à la mort. La deuotion de cette pauvre femme, & sa pieté depuis plusieurs années meritoit ce secours du Ciel.

Vne ieune femme disoit il y a quelque temps, il me tarde dés le grand matin que ie ne sois à l'Eglise, & quand il faut

118 *Relation de la Nouvelle France,*
sortir, il me semble que nous ne faisons
que d'y entrer.

Vn bon vieillard, ancien Chrestien,
estant niurié & n'en tesmoignant tou-
tes-fois aucune indignation, comme
on luy demanda d'où luy venoit cette
égalité d'esprit: Si ie pechois, respondit-
il, lors qu'on me calomnie, & que l'on
me charge d'iniures, i'en deurois estre
fasché. Mais n'y ayant point de ma fau-
te, i'ay plus sujet de m'en réjouir, que
de m'en attrister. Dieu qui voit le fond
de mon cœur, sçait bien mon innocen-
ce, & c'est cela qui me console.

Vne veufue estant sollicitée au mal,
par vn ieune homme riche, qui luy pre-
sentoit vne chose de prix, & luy pro-
mettoit de l'aider en sa pauvreté. Mal-
heureux que tu es, retire toy, & laisse
moy ma pauvreté, luy respond cette
femme; Pourueu que ie meure Chre-
stienne, sans m'engager dans le peché,
ie serai en peu de temps, mille fois plus
riche que toy. Dieu m'en promet bien
plus que toy, & me tiendra parole. Je
serois folle de prendre moins, & de
m'engager dans le peché.

Vne autre veufue qui n'auoit point d'autre appuy au monde que son fils vnique, qu'elle aimoit tendrement; l'ayant perdu, & l'ayant veu enleuer à ses yeux par les Iroquois Agnieronnons, eut son recours à Dieu avec vne resignation vrayment Chrestienne. Mon Dieu, luy disoit-elle, vous auez voulu esprouuer ma fidelité, & si c'estoit de cœur que ie vous disois que ie vous preferois à toutes choses. Vous le voyez maintenant. Il est vray que ie songe à mon fils, & que ie le pleure nuit & iour: mais il est vray aussi que ie songe bien plus à vous, & qu'en pleurant ie vous dis que ie suis contente, à cause que ie sçay que c'est vous qui l'avez permis.

CHAPITRE XI.

De la nature & de quelques particularitez du pays des Iroquois.

LE pays des cinq Nations des Iroquois auant leurs conquestes estoit entre le 40. & le 50. degré d'eleuation:

120 *Relation de la Nouvelle France,*
maintenant on ignore l'estenduë de leur domination, qui s'est accruë de tous costez par leur valeur militaire. Nostre demeure est entre le 42. & 43. degré sur les riues du petit Lac de Gannentaa, qui seroit vn séjour des plus commodes & des plus agreables du monde, sans le ceder mesme à la leuée de la Riuiere du Loire, s'il auoit des Habitans aussi polis, & aussi traitables.

Il a des auantages qui manquent au reste du Canada: car outre les raisins, les prunes, & plusieurs autres fruits qui luy sont communs avec les belles Provinces de l'Europe, il en possède quantité d'autres qui surpassent les nostres en beauté, en odeur, & en saueur. Les forêts sont presque toutes composées de chasteigners & de noyers. Il y a deux sortes de noix, dont les vnes sont aussi douces & agreables au goust, que les autres sont ameres: mais leur amertume n'empesche pas qu'on n'en tire d'excellente huile, en les faisant passer par les cendres, par le moulin, par le feu, & par l'eau, de la mesme façon dont les Sauvages tirent l'huyle du tournesol. On y

voit des cerises sans noyau, des fruits qui ont la couleur & la grosseur d'un abricot, la fleur du lys blanc, l'odeur & le goût du citron : des pommes de la figure d'un œuf d'oye, dont la graine apportée du pays des Chatseft semblable aux fèves, le fruit en est delicat, & d'une odeur tres-soüefue, & le tronc de l'arbre de la hauteur & de la grosseur de nos arbres nains, se plaist aux lieux marecageux & en bonne terre. Mais la plante la plus commune, & la plus merueilleuse de ces contrées, est celle que nous appellons la plante vniuerselle, par ce que ses feuilles broiées referment en peu de temps toutes sortes de playes : ces feuilles de la largeur de la main ont la figure du lys peint en armoire, & ses racines ont l'odeur du laurier. L'écarlate la plus viue, le vert le plus riant, & le jaune & l'oranger le plus naturel de l'Europe, cedent aux couleurs diuerses que nos Sauvages tirent des racines. Je ne parle point des arbres aussi hauts que des chesnes, dont les feuilles sont grandes & ouuertes comme celles des choux, non plus que de quantité d'autres plan-

122 *Relation de la Nouvelle France*,
tes particulieres à ce pays, parce que
nous en ignorons encore les proprietéz.

Les sources qui y sont aussi frequentes
que merueilleuses, sont presque toutes
minerales. Nostre petit Lac qui n'a
que six ou sept lieues de circuit, est pres-
que tout environnée de fontaines salées,
de l'eau desquelles on se sert pour saler
& assaisonner les viâdes, & pour faire de
fort bon sel, qu'on voit souuent se for-
mer de soy-mesme en belles glaces, dõt
la nature se plaist à environner ces sour-
ces. Ce qui se forme d'une autre sour-
ce éloignée de deux journées de nostre
demeure vers le pays d'Oïogoen à bien
plus de force que ce sel des sources de
Gannentaa; puis que son eau qui pa-
roist blanche comme du lait & dont
l'infection se fait sentir de fort loin,
estant bouillie laisse vne espece de sel
aussi mordicant que la pierre Causti-
que: & les roches qui environnent cet-
te fontaine sont couuertes d'une escu-
me qui n'a pas moins de solidité que la
cresme. La source qui se rencontre du
costé de Sonnontoïan n'est pas moins
merveilleuse: car ses eaux tenant de la

nature de la terre qui les endironne , qu'il ne faut que lauer pour en auoir du souffre tout pur ; s'enflamment estant remuées avec violence , & rendent du souffre quand on les fait boüillir. Approchant dauantage du pays des Chats on voit vne eau dormante & espaisse , qui s'enflamme comme l'eau de vie, & qui s'agite par boüillons de flamme aussi-tost qu'on y a ietté du feu : aussi est-elle si huileuse qu'elle fournit à tous nos Sauvages dequoy s'oindre & se graisser la teste & le reste du corps.

Il ne faut pas s'estonner de la fertilité de ce païs , puis qu'il est par tout arrosé de Lacs , de Riuieres & de Fontaines, qui se trouuent mesme sur les plus hautes montagnes. Mais si ces eauës rendent la terre féconde, elles ne manquent pas elles-mesmes de la fécondité qui leur est propre. Les poissons qui y sont les plus communs , sont l'Anguille & le Saulmon, qu'on y pesche depuis le Printemps iusques à la fin de l'Automne ; Nos Sauvages pratiquant si bien leurs digues & leurs escluses , qu'ils y prennent à mesme temps l'Anguille qui descend & le

124 *Relation de la Nouvelle France,*
Saul mon qui monte tousiours. Ils prennent le poisson d'une autre façon dans les Lacs, le dardant avec vn trident à la lueur d'un feu bitumineux, qu'ils entretiennent sur la pointe de leurs canots.

La temperature de l'air approchant de celuy de France, iointe à ces avantages, que l'eau & la terre nous fournissent, facilitent beaucoup la conuersion des Sauvages; en sorte que nous auons lieu d'esperer que leur humeur phantasque & bizarre, dont nous allons parler, sera le seul obstacle à leur bonheur.

CHAPITRE XII.

Du naturel & des mœurs des Iroquois.

LEs Iroquois dont nous n'auons encore découuert que quatorze Bourgs, sont partagez en Superieurs & Inferieurs. Les premiers ne contiennent que les Ahniehronnons qui sont les plus cruels, & avec lesquels nous

avons moins de cōmunication; & sous le nom des Iroquois Inferieurs sont compris les Sennontouachronnons, qui sont les plus nombreux; Les Onnontagehronnons, qui sont les plus considerables & nos plus fideles allies; Les Oiogoenhronnons, qui sont les plus superbes; & les Onneionthronnons qui sont les plus foibles de tous.

L'humeur de toutes ces Nations est guerriere & cruelle; & faute d'avoir des voisins à combattre, pour les avoir tous subiugez, elles vont chercher dans d'autres contrées des nouveaux ennemis. Il n'y a que fort peu de temps qu'ils sont allez porter la guerre bien loin au delà du pays des Chats à des peuples qui n'ont pas la connoissance des Europeans, de mesme qu'ils leurs sont inconnus. La vertu de ces pauvres Infideles estant la cruauté, comme la mansuetude est celle des Chrestiens, ils en font eschole dès le berceau à leurs enfans, & les accoustument aux carnages les plus atroces, & aux spectacles les plus barbares. Leurs premieres courses ne sont que pour répandre du sang humain

126 *Relation de la Nouvelle France,*
& se signaler par des meurtres, & leurs troupes enfantines armées de haches & de fuzils, qu'elles ont de la peine à soustenir, ne laissent pas de porter par tout l'épouuante & l'horreur. Ils vont à la guerre à deux & trois cents lieuës loin de leurs pays par des rochers inaccessibles, & des forests immenses, n'estant munis que d'esperance; & ne laissant dans leurs Bourgs pendant des années entieres que leurs femmes & leurs petits enfans. Mais quelques cheuelures qu'ils remportent, ou quelques prisonniers de guerre destinez à leur boucherie, sont les trophées dont ils croient leurs travaux heureusement recompensez.

Cependant ces victoires leur causant presque autant de perte qu'à leurs ennemis, elles ont tellement depouplé leurs Bourgs, qu'on y compte plus d'Estrangers que de naturels du pays. Onnontaghé à sept nations differentes qui s'y sont venuës establir, & il s'en trouue iusqu'à onze dans Sonnontouïan; en sorte que leur ruïne causée par leurs conquestes, nous donnent l'auantage de prescher la Foy à quantité de Nations diuerses que

nous ne pourrions aller instruire chacune dans son pays.

Leurs mariages ne rendent que le lit commun au mari & à la femme, chacun demeurant pendant le iour chez ses propres parents, & la femme allant le soir trouver son mari pour s'en retourner le lendemain de bon matin chez sa mere, ou chez son plus proche parent: sans que le mari ose aller dans la cabane de sa femme deuant qu'elle ait quelques enfans de luy. La seule communication de biens qui est entre l'un & l'autre, est que le mari donne tous les fruits de sa chasse à sa femme, qui luy rend en recompense quelques seruices, & est obligée de cultiuer ses champs, & d'en faire la recolte.

Ils rendent ridicules les plus fascheuses de leurs maladies par la superstition grossiere qu'ils apportent à leur guérison. Car se persuadant que toute leur incommodité vient de ce que l'ame manque de quelque chose quelle souhaite, & qu'il ne faut que luy donner ce qu'elle desire pour la retenir paisiblement dans le corps; C'est à qui se mon-

128 *Relation de la Nouvelle France*,
strera le plus liberal , faisant au malade
les presents qu'il souhaite , & auxquels il
croit que sa vie est attachée. On voit vn
moribond enuironné d'alesnes , de ci-
seaux, de cousteaux, de sonnettes, d'ai-
guilles, & de mille autres bagatelles, de
la moindre desquelles il attend la santé.
S'il se laisse enfin mourir on attribüé sa
mort au defaut de quelque chose qu'il
desiroit : il meurt, dit-on, parce que son
ame desiroit manger d'un chien , ou de
la chair d'un homme; parce qu'on ne
luy a pastrouué vne certaine hache qu'il
desiroit, ou parce qu'on n'a peu luy re-
trouuer vne belle paire de chausses qui
luy ont esté derobées : si au contraire le
malade recouure sa santé, il attribüé sa
guerison au present qu'on luy a fait de la
derniere chose qu'il souhaitoit pendant
sa maladie, & le cherissant tousiours par
apres , le conserue soigneusement iuf-
qu'à la mort. En sorte que comme ils
croient que toutes leurs maladies ont la
mesme cause , ils ne reconnoissent aussi
qu'un seul remede pour les guerir.

Les Morts ne sont non plus exempts
de leurs superstitions que les malades.

Aussi-

Aussi-tost que quelqu'un a expiré dans vne cabane, on y entend des cris & des lamentations de la parenté assemblée, de tout âge & de tout sexe, si effroyables qu'on prendroit ce tintamarre lugubre, qui dure les mois & les années entieres pour les hurlemens de l'Enfer. Cependant apres que le mort est enterré, qu'on a comblé son tombeau de viures pour la subsistance de son ame, & qu'on luy a fait vne maniere de sacrifice, en brûlant vne certaine quantité de bleds, les anciens, les amis & les parents du defunct sont inuitez à vn festin, où chacun porte ses presents pour consoler les plus affligez. C'est ainsi qu'ils en vserent en presence d'un Pere de nostre Compagnie, qui representoit dans vne de ces ceremonies la personne de Monsieur le Gouverneur. Vn Ancien des plus considerables se demarchant graue-
ment, s'escrie d'un ton lugubre ai, ai, ai, agatondichon, hélas, hélas, hélas, mes chers parents, ie n'ay ny esprit ny parole pour vous consoler, ie ne peux autre chose que de mesler mes larmes avec les vostres, & me plaindre de la rigueur

130 *Relation de la Nouvelle France* ;
de la maladie qui nous traite si mal, ai,
ai, ai, agatondichon. Je me console
neantmoins de voir Onnontio & le re-
ste des François pleurer avec nous: mais
courage mes parens ! n'attristons pas plus
long-temps vn hoste si honorable, ef-
fuyons les larmes d'Onnontio en ef-
fuyant les nostres; voilà vn present qui
en tarira la source. Ce present qu'il fit
à mesme temps, fut vn beau colier de
Pourcelaine, qui fut suiuy des presens
& des condoleances de tous les autres;
la liberalité des femmes n'estant pas
moindre que celle des hommes en cet-
te rencontre. La ceremonie se termine
par le festin, dont on tire les meilleurs
morceaux pour les malades considera-
bles du Bourg. Tout cela ne pouuant
arrester les pleurs & les cris d'une mere,
quelqu'un des parens, pour donner des
marques de sa pieté, en la consolant, de-
terre le mort, & le reuestant d'un habit
neuf, iette au feu son habit mortuaire:
ce qu'il fait iusqu'à deux ou trois fois en
diuers temps; iusqu'à ce que ne trou-
uant plus que les os nuds, il les enuelop-
pe dans vne couuerture pour les presen-

ter à l'affligée. Enfin quelque temps apres ces ceremonies, on reconnoist la liberalité de ceux qui auoient fait des presens de consolation, en leur distribuant les meubles du mort, auxquels on en adiousté d'autres, si ceux-là ne suffisoient pas.

Il n'y a rien que ces peuples ayent plus en horreur que la contrainte: les enfans mesme ne la peuuent souffrir, & vivent à leur faitaisie dans la maison de leurs parents, sans crainte de reprimende ny de chastiment. Ce n'est pas qu'on ne les punisse quelquefois en leur frottant les leures & la langue d'une racine fort amere; mais on le fait rarement, de peur que le depit ne les porte à se faire mourir, en mangeant de certaines herbes venimeuses, qu'ils sçauent estre un poison, dont les femmes mariées vsent beaucoup plus souuent, pour se venger du mauuais traitement de leurs maris, en leur laissant ainsi le reproche de leur mort.

Au reste parmy tant de deffauts causez par leur aueuglement & leur education barbare, il ne laisse pas de s'y ren-

contrer des vertus capables de donner de la confusion à la pluspart des Chrétiens. Il ne faut point d'Hospitaux parmy eux, parce qu'il n'y a point de mendiants ny de pauvres tant qu'il s'y trouue des riches, leur bonté, humanité & courtoisie ne les rend pas seulement liberaux de ce qu'ils ont; mais ne leur fait presque rien posséder qu'en commun. Il faut que tout vn bourg manque de bled deuant qu'un particulier soit réduit à la disette: Ils partagent leurs pesches en égales portions avec tous ceux qui suruiennent, & ils ne nous font reproche que de nostre reserue à y enuoier souuent faire nos prouisions.

Nous auons dit dans nostre derniere Relation combien leur superstition les attachoit scrupuleusement à leurs songes; mais les exemples que nous en auons veu depuis, sont trop rares pour les omettre. Vne femme fort malade dans Onnontaghé auoit resué qu'il luy falloit vne robbe noire pour la guerir, mais le massacre cruel de nos Peres que ces Barbares auoient fait tout recemment, leur ostant l'esperance d'en pou-

voir obtenir de nous, ils eurent recours aux Hollandois, qui leur vendirent bien cher la pauvre suture du Pere Poncet, qui en auoit quelque temps auparauant esté dépouillé par les Annienhronnons. Cette femme luy attribuant sa guerison, la veut conseruer toute sa vie comme vne precieuse relique, & c'est entre ses mains que nous l'auons reconnüe. Il ne leur faut que refuser à vne chose pour leur faire entreprendre de grands voyages à sa recherche. L'Esté dernier vne femme n'ayant pas trouué à Kebec vn chien François qu'elle y estoit venu chercher, parce qu'un sien neveu l'auoit veu en songe, entreprit vn second voyage de plus de quatre cens lieuës par les neiges, les glaces & les chemins les plus rudes, pour aller chercher cét animal si desiré, au lieu où on l'auoit transporté. Pleust à Dieu que nous fissions autant d'estat des inspirations du ciel que ces Barbares en font de leurs songes!

CHAPITRE XIII.

*Des tesmoignages reciproques d'amitié
entre nous & les Iroquois.*

IL est difficile de trouver d'exemple où Dieu se soit montré Maître plus absolu des cœurs que dans nostre reconciliation avec les Iroquois. Nous en receuons autant de caresses & de tesmoignages de bien-veillance que nous craignons d'effets funestes de leur cruauté. Nous logeons & nous mangeons en toute seureté avec ceux dont l'ombre il y a peu de temps, & le seul nom nous donnoit de la frayeur. La durée de cette vnion, qui semble croistre tous les iours, nous a fait perdre la crainte que nous eussions peu auoir au commencement, qu'un premier accueil si ioyeux ne fust suiuy d'une issue également funeste. Ce n'est pas l'interest temporel qui cimente cette amitié; puis qu'elle ne leur a encore produit aucuns fruidts de la terre: mais c'est sans doute l'amour

Diuin qui leur donne ces douces pen-
tes, ces complaisances & ces tendresses
pour nous, dont il doit tirer leur salut. Il
n'y a iamais de plus grande ioye, ny de
plus grande feste dans leurs cabanes &
leurs bourgs, que quand ils peuuēt nous
yposseder. S'ils ne peuuent nous y rete-
nir assez long-temps, ils tesmoignent ne
pouuoir souffrir nostre absence, en nous
suiuant par troupes iusques dans nostre
habitation, pour y viure avec nous; &
s'y comportent de telle sorte, que si
Dieu leur fait trouuer des charmes dans
nostre entretien, il ne nous laisse pas
sans aucun sentiment de ioye dans leur
compagnie.

Aucun de nous n'a esté malade cēt
hyuer qu'ils ne luy ayent témoigné pren-
dre part à sa douleur, luy faisant lar-
gesse de leur gibier, comme ils témoi-
gnoient en suite par leurs presens de
conjouyissance prendre part à sa gueri-
son.

Les alliances que nous contractions à
la façon du pays avec les Sauvages, est
vn des plus excellens moyens que Dieu
nous ait inspiré pour nous maintenir, &

136 *Relation de la Nouvelle France,*
auancer la foy parmy eux : ces pauvres
Barbares prenans pour nous des senti-
mens de peres, de freres, d'enfans &
de neveux, lors que nous leur en accor-
dons les noms. La plus aduantageuse
de ces alliances est celle que le Pere Su-
perieur appellé Achiendafé a contra-
ctée avec Sagochiendagesité, qui a la
puissance & l'autorité Royale sur tou-
te la Nation d'Onontaghé, quoy qu'il
n'en ait pas le nom : Le contract de leur
vnion qu'il se fit en presence des depu-
tez des cinq Nations leur ayant fait tou-
siours depuis considerer les François
comme vne partie de leur peuple, qu'ils
sont obligez de cherir & de defendre
de tout leur pouuoir.

Aussi nous ont-ils tousiours depuis
rendu les mesmes offices dont ils vsent
enuers leurs plus fideles amis. Les prin-
cipaux d'entr'eux estant venus avec de
grands cris lugubres pour nous conso-
ler de la mort de deux de nos François,
celuy qui portoit les presens de condo-
leance adressant son discours au Pere
Superieur luy dit: Les Anciens de nostre
pays ayant coustume de s'entr'essuyer

les larmes , quand ils sont affligez de quelque malheur ; Nous venons Achiendafé, pour te rendre ce deuoir d'amitié : Nous pleurons avec toy , parce que le malheur ne te peut toucher sans nous percer du meſme coup ; & nous ne pouuons ſans vne extreme douleur te voir ſi mal-traité en noſtre pays , apres auoir quitté le tien où tu eſtois parfaitement à ton aife : La maladie iette tes neuveux dans le fond d'une terre dont tu ne connois pas encore la ſuperficie. Ah ! que le Demon cruel prend bien l'occafion pour affliger ceux qu'il hait ! Il ſe ſert iuſtement, pour faire ce mauuais coup , du temps auquel tu auois plus beſoin de tes neuveux, pour baſtir tes cabanes, te fortifier , & cultiuer tes champs. Les ayant en vain harcelez ſans relafche pendant tout l'Eſté, & ſe reconnoiſſant trop foible pour t'attaquer , il a fait ligue avec les Demons de la fièvre & de la mort , afin de ioindre noſtre perte à la voſtre , exerçant ſes rauages chez nous encore plus que chez vous. Mais prens courage , noſtre frere, nous eſſuyons les larmes de tes yeux, afin que

138 *Relation de la Nouvelle France,*
tu voyes que tous les neveux ne sont pas
morts ; nous t'ouvrons les yeux par ce
present, afin que tu consideres ceux qui
te restent, & que par tes agreables re-
gards tu leur rende la vie & la ioye à
mesme temps. Pour nos deux neveux
qui sont morts, il ne faut pas qu'ils ail-
lent nuds en l'autre monde, voicy vn
beau drap mortuaire pour les couvrir.
Voilà aussi de quoy les mettre dans la
fosse, de peur que leur veuë ne renouel-
le ta douleur ; & pour t'oster de deuant
la veuë toute sorte d'objets lugubres. Ce
present est pour applanir la terre dans
laquelle ie les ay mis, & cet autre pour
dresser vne palissade alentour de leur
tombeau, afin que les bestes & les oy-
seaux carnassiers n'inquietent point leur
repos. Enfin ce dernier est pour remet-
tre ton esprit dans son repos & son as-
siette, afin que nostre paix continuant
dans la mesme fermeté, aucun Demon
ne la puisse alterer.

Ce furent les propres termes de la ha-
rangue de ce graue Barbare, qui fut ac-
compagnée de huit beaux presens de
coliers de Porcelaine qu'il nous fit au

nom du public. Plusieurs particuliers ont vſé des meſmes ciuilitéz & de la meſme liberalité que nous auons recon-
nuë avec aduantage dans toutes les oc-
caſions que nous en auons pû trouuer.

L'vnion que nous auons contractée avec Sagochiendageſité nous faiſant auſſi freres des Sonnontouaehronnons, & peres des Oiogoenhronnons, ces trois Nations nous en ſont venuës faire leurs remerciements: mais les Sonnontouaehronnons en ont plus témoigné de reconnoiſſance que les autres, nous ayant preſenté, pour nous poſſeder chez eux, vne demeure fort auantageuſe pour ſon abondance de toutes ſortes de vi-
ures, & pour la communication qu'elle peut auoir facilement avec celle d'On-
nontaghé.

CHAPITRE XIV.

*Des diſpoſitions que les Iroquois ont
à la Foy.*

L'Insolence, la ſuperſtition, & la diſſolution extreme de ces peuples

140 *Relation de la Nouvelle France,*
iointes à la cruauté qui les a fait les vni-
ques persecuteurs de la primitive Egli-
se de ces contrées, nous donnoient lieu
d'attendre vn succez de cette Mission
tout different de celuy que la protection
de Dieu nous y a fait éprouuer. Ces
meurtriers des Predicateurs de l'Euan-
gile, ces loups carnassiers qui auoient
exercé leur rage sur le bercail de IESVS-
CHRIST avec plus de fureur & des tour-
mens plus atroces que les Nerons & les
Diocletians, embrassent nostre sainte
Religion avec plus de ferueur que ceux
qu'ils ont exterminé, & prennent le
ioug de cette mesme foy dont ils estoient
il y a peu d'années les Tyrans. Ils repeu-
plent l'Eglise que leur cruauté auoit de-
peuplée: ils bastissent chez eux plus de
Chapelles qu'ils n'en auoient destruit
chez leurs voisins. La prouidence de
Dieu leur fait prendre la place des pau-
ures Chrestiens qu'ils ont exterminé:
& les exhortations de nos Martyrs plus
ardentes que les flammes & les brasiers
du milieu desquels ils preschoient, ont
maintenant de si merueilleux effets par-
my leurs bourreaux, qu'il s'est fait plus

de Chrestiens Iroquois en deux mois, qu'il ne s'estoit conuerti de Hurons en plusieurs années : Ils demandent avec autant de ferueur & de veneration les eauës du Baptisme, qu'ils les auoient mesprisées avec insolence, versans de l'eau bouillante sur la teste des Predicateurs en derision de ce Sacrement. S'ils demandent avec instance d'entrer au nombre des Fideles & de porter l'Illustre nom de Chrestiens, ils n'apportent pas moins de soin à ne s'en pas rendre indignes & à en faire les fonctions. Leur ferueur feroit prendre cette Eglise naissante pour vne Eglise formée & establie par plusieurs années, ou par plusieurs siecles : encore feroit-il assez difficile de trouuer dans les anciennes Eglises vn aussi grand empressement pour assister aux prieres & aux Instructions publiques, iointe à vne aussi grande modestie, & vne aussi parfaite soumission à tous les deuoirs d'un Chrestien.

Deux Peres de nostre Compagnie qui ne quittent point la Mission d'Onontaghé où la ferueur du Christianisme est plus grande, reconnoissent dans

142 *Relation de la Nouvelle France*,
les Onnontagehronnons vne douceur
de conuersation, & vne ciuilité qui n'a
presque rien de Barbare. Les enfans y
sont dociles, les femmes portées à la
deuotion la plus tendre, les anciens af-
fables & respectueux, les guerriers
moins superbes qu'ils ne le paroissent.
Et en general la complaisance que le
peuple témoigne pour nostre doctrine
& nos pratiques ne nous fait pas esperer
de petits progres de nostre sainte Foy.
Dieu se sert de leurs superstitions & de
leur fausse pieté pour en tirer sa gloire,
nous donnant le moyen de sanctifier
l'inclination qu'ils ont à pratiquer quel-
que culte Diuin, & à vser de quelques
ceremonies de Religion, en leur fai-
sant changer d'obiet, & leur faisant
adresser au vray Dieu les inuocations &
les termes d'adorations dont ils se ser-
uoient auparauant dans leurs sacrifices,
quand ils offroient ce qu'ils croioient
auoir de meilleur à quelque Diuinité
inconnüe.

La coustume qu'observent ces Na-
tions de se faire chaque année recipro-
quement des presens d'amitié dans les

Conseils & les Assemblées publiques, nous donnera dans ces occasions, en y faisant & receuant les presents publics, vne fauorable ouuerture pour leur expliquer nos mysteres; au lieu d'y faire le recit des choses passées & les plus reculées de la memoire, ainsi qu'ils le pratiquent dans ces ceremonies.

C'est aussi de cette mesme façon que nous nous seruons de la coustume que les parens & les anciens ont de se tenir assemblez pendant la nuit qui suit le iour des funerailles, pour raconter des histoires anciennes: car nous leur rendons leur curiosité vtile dans ces rencontres, & iettons insensiblement & à loisir dans leurs ames les semences de la Foy, en leur expliquant dans ces recits d'histoires nos mysteres, & les merueilles de nostre Religion.

Qui n'admireroit la bonté de Dieu qui se sert pour le bien de ces pauures Infideles, des mesmes moyens que le diable employoit pour les seduire? Le songe qui estoit le Dieu & le grand Maistre de ces peuples en ayant souuent porté plusieurs deuant la Predication de

144 *Relation de la Nouvelle France;*
l'Euangile à la pratique des vertus Morales, a mesme fait embrasser la Foy à quelques-vns; & vn des deux Peres employez à Onnontagé mande qu'une ieune fille, sur l'esprit de laquelle ses exhortations ne pouuoient auoir aucun effect, a esté conuertie par vn songe, qui luy a, dit-elle, fait voir dans le Ciel la verité des choses qu'on leur presche.

Cependant nos traux ne sont pas sans obstacles, & l'Euangile trouue là ses ennemis qui la combattent, afin que les victoires de la Foy soient de veritables victoires. Car outre que l'humeur guerriere & bouillante, l'extreme libertinage & les courses continuelles de la ieunesse retardent la conuersion de ce pais; le diable y renouelle toutes les calomnies dont il s'estoit autres-fois serui avec plus de succez, pour nous mettre mal dans les esprits des Hurons, & frustrer les traux des Peres de nostre Compagnie des fruits qu'ils en attendoient.

Nostre Compagnie qui tâche d'imiter celuy dont elle a l'honneur de porter le nom, & au seruice duquel elle s'employe

ploye par toutes les contrées du monde, fait gloire d'estre comme luy attaquée de calomnies. Aussi s'en trouue-t'il par tout en grand nombre qui luy procurent cét honneur, qui, quoy qu'il luy soit d'ordinaire auantageux, empesche neantmoins quelques-fois les fruiçts qu'elle fait dans l'Eglise. Mais il est assez difficile de trouuer des calomnies plus grossieres que celles que l'esprit de mensonge suggere à ces pauvres Sauuages. On nous y accuse de les exhorter souuent au Paradis pour les y brûler à nostre aise : & il s'en trouue quelques-uns qui disent estre ressuscitez, & auoir esté tesmoins de tout cela.

Mais vne seule femme en a peu trouuer, quoy qu'en petit nombre, d'assez foibles, pour estre intimidez par ces sortes de refueries. Nous taschions de disposer au Baptisme & à la mort cétte pauvre Infidelle qui auoit la machoire démise, lors qu'elle tomba en syncope, & bien-tost apres reuenant à foy, conta des nouuelles de l'autre monde. Elle auoit, disoit-elle, esté menée au pays des ames des François, mais estant

146 *Relation de la Nouvelle France,*
preste d'entrer, elle vit vne fumée blua-
stre qui s'eleuoit du milieu du Paradis,
& qui luy donna de la defiance de ce
qui s'y passoit : regardant en suite par
deux diuerses fois plus attentiue-
ment, elle auoit veu plusieurs de ses compa-
triotés que les François brusloient avec
de grandes huées : ce qui l'auoir obli-
gée de s'eschaper des mains de ceux qui
la conduisoient au ciel, & de reuenir en
vie, pour euitter vn pareil traitement, &
donner aduis au public du danger qu'il
y auoit de croire les François.

Nous n'auons pas tant de peine à nous
purger de ces reproches ridicules, qu'à
détromper le peuple des bruits que font
courir quelques Hurons Apostats qui
attribuent à la Foy toutes les guerres, les
maladies & les ruynes du pays; & ap-
portent leur propre experience pour
confirmation de leurs impostures, as-
seurant que leur changement de Reli-
gion a causé le changement de leur
fortune, & que leur Baptême a esté sui-
uy aussi-tost de toutes les miseres possi-
bles. Les Hollandois, disent-ils, ont
maintenu les Iroquois, en les laissant vi-

urè à leur mode, comme les Robbes noires ont perdu les Hurons en leur preschant la foy. Enfin ils apportent pour la meilleure de leurs preuues l'exemple d'une Cathecumene d'Onnontaghé, qu'ils disent estre tombée malade à nostre abord, & auoir esté enforcelée avec du poil d'un chien de Kebec, ainsi que le Sorcier du pays l'auoit enfin decouvert, apres auoir long-temps examiné les causes de sa maladie.

Cette calomnie fit moins d'impres-
sion sur les esprits que celle que le Dia-
ble suscita contre le Pere qui partit
l'Hyuer dernier d'Onnontaghé pour
nous venir querir : car son voyage fit
croire que la grande mortalité qui estoit
alors en ce pays-là, estoit causée par la
recherche des ames qu'il faisoit, en vou-
lant emporter vne caisse toute pleine.
Neantmoins, quoy que l'opinion qu'ils
ont par tradition que les Ames sortent
de temps en temps de leurs corps, sur-
tout un peu deuant la mort, semblaist
fauoriser cette imposture, ce bruit se
dissipa bien-tost de soy-mesme, & n'eut
aucune suite fascheuse.

Ainsi peut-on voir que les obstacles sont bien moindres que les moyens que nous auons là d'auancer la Foy, qui seroient plus grands, si la compassion & la charité des gens de bien estoit plus grande : car vn des fruiçts les plus remarquables qu'on pourroit faire en ce pays, seroit de racheter des captifs Chrestiens qui sont entre les mains des Iroquois; ce qui seroit vtile non seulement au salut des Ames & des corps de ces pauvres esclauues, mais aussi à la conuersion des Iroquois; qui sont ravis par ces exemples. Il ne faut que decouurir aux personnes zelées la misere des Hurons & des autres captifs, pour les porter à vne liberalité proportionnée à la pitié qu'ils en auront.

Les Iroquois ont trois sortes de captifs, dont les premiers ayant subi de leur gré le ioug des vainqueurs, & pris parti parmi eux, sont deuenus chefs de famille, apres la mort de leurs Maistres, ou se sont mariez. Quoy qu'ils meinent vne vie assez douce, ils sont considerez comme esclauues & priuez de voix actiue & passiue aux Conseils publics: Les

autres décheus dans l'esclavage apres auoir esté les plus opulents & les plus confiderez de leurs bourgs, n'ont de leur Maistre pour recompense de leurs trauaux & de leurs sueurs continuelles, que la nourriture & le couuert. Mais le sort des derniers est bien plus déplorable : ce sont la pluspart des ieunes femmes ou filles, lesquelles n'ayant peu trouuer party parmy les Iroquois, sont incessamment exposées au danger de perdre l'honneur ou la vie par la lubricité brutale, ou par la cruauté de leurs Maistres ou de leurs Maistresses. Tous les moments leur sont à craindre ; leur repos n'est iamais sans inquietude & sans danger, leurs moindres fautes n'ont point d'autre chastiment que la mort ; & leurs actions les plus innocentes & les plus saintes peuuent passer pour fautes : Quand vn Barbare a fendu la teste à son esclau d'vn coup de hache, c'est vn chien mort, dit-on, il ne faut que le ietter à la voirie. C'est ainsi qu'une pauvre Chrestienne captiue appelée Magdelaine fut guerie d'une maladie qui la faisoit languir, par sa Mai-

150 *Relation de la Nouvelle France,*
stresse, qui la massacra avec autant d'in-
humanité qu'elle auoit auparauant fait
paroistre de bonté, en l'adoptant pour sa
mere. Nous n'auons que trop d'exem-
ples de cette nature, & Dieu veuille
tellement exciter la compassion de
ceux à qui il a fait largesse des biens de
la terre pour acquerir ceux du ciel, que
leur liberalité tirant ces pauvres captifs
de ces dangers si grands & si manifestes,
nous ne puissions plus les années pro-
chaines en raconter de semblables.

CHAPITRE XV.

*Des premieres semences de la Foy
parmi les Iroquois.*

QVoy que les deux Peres qui hy-
uernerent à Onnontaghé dès l'an-
née 1656. y fussent allez comme Am-
bassadeurs, plustost que comme Predi-
cateurs de l'Euangile : ils ne laisserent
pas dés lors de ietter les diuines semences
dans ces terres en friche, & de les dispo-
ser à faire la paix avec Dieu, en les por-

tant à se reconcilier avec les hommes. Ils se seruirent de la facilité qu'ils trouverent de pouuoirs sans choquer les esprits, enseigner la doctrine Chrestienne, faire les prieres dans vne petite Chapelle, & baptiser les enfans. Mais ils n'y-
soient que modérément de leur zele, pour gagner les occasions de l'exercer par apres avec plus de liberté, & ouvrir vne plus grande porte à l'Euangile, en moyennant l'accord avec les François.

Ce fut donc l'Esté suiuant que les Peres s'estant establis, declarerent ou-
uertement la guerre à l'Infidelité non seulement dans Onnontaghé, mais aussi dans tous les autres pays des Iroquois, où ils ont peu auoir accez. En sorte que seize ou dix-sept Nations différentes de pays, de mœurs & de langage, auxquelles ils ont porté le flambeau de la Foy, ont ouuert les yeux aux veritez qu'ils leur ont annoncées: & Dieu qui a ramassé de quatre cens lieuës loin des enuironns ces captifs de plusieurs nations pour leur faire part de la liberté de ses enfans, leur rend l'Iroquois, qui est la langue seule dans laquelle on les pres-

152 *Relation de la Nouvelle France*,
che, assez intelligible pour en estre in-
struits dans nos mysteres.

Mais on remarque dans les Onnon-
tagheronnons plus de ferueur que dans
tous les autres, & plus d'inclination pour
le Christianisme, auquel ils se main-
tiennent avec autant de constance qu'ils
ont eu de zele en s'y attachant; les me-
naces & la crainte de la mort ne les en
pouuant separer. Ainsi vne fille des plus
considerables d'Onnontaghé, qui estoit
fort malade, mesprisant les discours
d'une meschante femme, qui vouloit
luy persuader que son baptisme ayant
causé sa maladie, les visites de la Robe
noire acheueroient de la faire mourir;
attendit à declarer au Pere cette ten-
tation, apres auoir receues Instructions
& acheué ses prieres.

Vne captiue Huronne nommée The-
rese, qui auoit deuant son esclauage esté
de bonne famille, & tenu rang de Prin-
cesse, fit encore paroistre plus de gene-
rosité, lors qu'une indisposition ne luy
ayant pas permis d'obeir au comman-
dement que son Maistre luy auoit fait
d'aller querir de la viande à vne iournée

loin, & attendant d'heure en heure le coup de la mort, dont le Barbare furieux l'auoit menacée, & dont elle sembloit si asseurée, que chacun la confideroit déjà comme morte; elle eut tant de courage & de confiance en nos mysteres, qu'apres s'estre confessée avec les sentiments d'une Ame tout à fait Chrestienne, elle s'en alla aussi-tost pleine de joye trouuer son tyran & le prier qu'il hastast la mort qu'il luy auoit destinée, puis qu'il ne luy pouuoit rendre vn meilleur office. Le Barbare surpris aussi bien que tous les assistans de cette hardiesse, eut dès lors plus de confusion de son mauuais dessein que d'enuie de l'exécuter: tant la magnanimité Chrestienne a d'ascendant sur les esprits.

Il n'est pas croyable combien les exemples de generosité sont puissants pour gaigner ces Infidelles. La hardiesse que les Peres qui les instruisent témoignent, allant sans changer de visage dans les bourgs & les cabanes, où on leur dit que la mort & les supplices les attendent; cause autant de fruit dans les Ames que d'admiration dans les es-

pris, & a eu tant de pouuoir sur les cœurs des Anciens & des Capitaines, qui témoignoient au commencement toute l'indifference possible pour nos mysteres, qu'il y en a maintenant quelques-vns d'entre eux; Catechumenes cachez, & quelques autres qui font profession ouuerte de la Foy, sans qu'aucun d'eux s'oppose au progrez de l'Euangile. Il est vray que l'exemple funeste de Hondiatarase doit les en destourner. Ce pauvre mal-heureux estoit vn homme d'esprit & d'intrigue, qui faisoit vne partie des affaires du pays, parloit le mieux dans les Conseils, & auoit seul d'entre tous les Anciens osé s'opposer ouuerte-ment à l'Euangile, entrer en dispute sur nos mysteres, & deffendre les Fables du pays. Mais Dieu sceut bien renuerfer cet obstacle de sa gloire, & punir les blasphemes de cet insolent. Vn sien neveu qui croioit en auoir receu quelque iniure luy fendit la teste d'vn coup de hache, au lieu mesme où on deuoit planter la Croix qu'il vouloit renuerfer, & au temps que les Peres par- toient de Kebec, pour y venir establir leur demeure.

Si Dieu a fait paroistre sa Iustice en cet exemple , il a fait voir sa misericorde infinie en plusieurs autres. Le Pere ne pouuant rien depuis long-temps sur l'esprit d'une femme superbe & hautaine aussi difficile à conuertir que son frere Jean-Baptiste Achiongeras s'estoit monstre docile aux lumieres de l'Euangile , ayant eu l'honneur d'estre le premier Chrestien de son pays : il eut recours à Sainte Magdelaine avec tant de succez , que la Pecheresse conuertie dès le second iour de la neufuaine , venant demander le Baptesme , y receut le nom de sa bien-faictrice.

Le mesme Pere ayant aduis qu'une Huronne Chrestienne fort malade estoit depuis vingt quatre iours dans le milieu d'un bois où elle auoit esté conduite par quelques personnes qui luy estoient affectionnées , pour la sauuer de la cruauté de son Maistre ; il s'y transporta aussi-tost & n'y trouua pas la Chrestienne , mais une autre pauvre femme Infidelle aussi fort malade , qu'il luy fut si aisé de conuertir & d'instruire , qu'elle demanda & receut aussi tost le Baptes-

156 *Relation de la Nouvelle France,*
me. Heureuse ! d'auoir fait vne rencontre si impreueuë de la vie de l'ame deux ioursauant sa mort corporelle, & d'auoir appris si à propos le moyen de reparrer la petite perte qu'elle alloit faire, par le gain du plus grand thresor, ou plustost de l'vnique thresor qui soit au monde.

Vne autre pauvre femme de la Nation des Chats, condamnée par ses Maistres à estre deliurée par vne mort sanglante d'une espee d'hydropisie dont elle estoit trauaillée depuis quelque temps, receut presque à mesme temps la guerison du corps & de l'Ame; car vne de ses parentes ayant prié le Pere de l'aller voir, il la deliura du danger de sa maladie & de la cruauté de ses Maistres, la guerissant en deux heures, en luy faisant prendre des pignons d'Inde, & la disposa en suite au Baptisme.

Dieu qui tourne tout à l'auantage de ses Eleuz, se seruit d'une façon aussi admirable de la curiosité d'une femme d'Onnontaghé, laquelle ne s'estant transportée à Gannentaa que pour voir nos François, entra par rencontre dans

la maison avec les Catechumenes, & prenant part aux petites charitez que nous y faisons, en prit encore dauantage à nos Instructions : en sorte qu'elle presenta sa fille pour estre baptisée, & demanda à prier Dieu parmy les Catechumenes.

CHAPITRE XVI.

De la publication de la Foy aux Iroquois Oiogoenhronnons.

Aiant adopté incontinent apres nostre arriuée au pays, les Onnontagehronnons pour freres, & les Oiogoenhronnons, & les Onneiouthronnons pour enfans, il fallut pour garder les formes de cette alliance, nous transporter chez eux, pour leur faire nos presens ; ainsi que nous serons obligez de faire tous les ans, pour leur rendre nostre parenté plus vtile & plus souhaitable. Cette necessité ne nous peut estre que tres-agreable, puis qu'elle nous fournit les moyens de leur annoncer

158 *Relation de la Nouvelle France*,
l'Evangile en leur faisant nos presents,
ainsi que nous auons heureusement
commencé.

Ce fut à ce dessein que les Peres Chau-
mont & Menart partirent sur la fin du
mois d'Aoust de l'année 1656. pour Oio-
goen, où estant arriuez deux iours apres,
& y ayant fait quelque sejour, le Pere
Chaumont en partit pour Sonnontoïan,
y laissant le Pere Menart, qui trauaille
aux fondemens de cette Eglise nais-
sante. Voici ce qu'il nous en mande.

L'auersion de la Foy & de nos per-
sonnes que les Hurons auoient donnée
aux naturels du pays., leur persuadant
que nous portions avec nous la maladie
& le malheur du pays où nous entrions,
nous fit ici receuoir avec vn accueil as-
sez froid, & rendit méprisables les pre-
sents que nous fismes pour la Foy. Ce-
pendant les Anciens qui pour leur inte-
rest temporel ne vouloient pas rompre
avec nous, croyant que l'essay de la
Foy ne seroit pas dangereux sur la vie
de leurs esclaves, nous firent bastir qua-
tre iours apres nostre arriuée vne Cha-
pelle, à laquelle ils s'emploierent eux-

mesmes de telle sorte, qu'elle fut en deux iours en estat d'y recevoir les Chrestiens. L'ayant tapissée des plus belles nattes, i'y exposé l'Image de nostre Seigneur, & celle de Nostre-Dame : Ce fut vn spectacle dont la nouveauté surprit si fort nos Barbares, qu'ils venoient en foule pour le considerer, & remarquer le visage & l'action des deux Images. J'eus sans cesse alors occasion de leur expliquer nos mysteres, lors qu'ils me faisoient diuerfes questions sur les Images, en sorte que ie ne faisois chaque iour qu'un Catechisme, qui duroit depuis le matin iusqu'au soir. Ce qui appriuoisa les esprits de telle sorte, que nous eusmes en peu de iours plusieurs Neophytes, non seulement des Hurons & des esclaves, mais aussi des naturels du pays.

Plusieurs m'apportoient leurs enfans pour les baptiser, & m'aiderent à leur apprendre les Prieres en les leur repétant avec moy : Et la grace fit en peu de temps de si merueilleux changemens, que les petits enfans qui m'auoient au commencement pour le plus ordinaire

160 *Relation de la Nouvelle France*,
objet de leurs railleries & de leurs huées,
me rendoient par apres les offices de
bons Anges, me conduisant dans les ca-
banes, m'attendant aux lieux où ie m'ar-
restois ; & me disant les noms des en-
fans que ie baptisois, aussi bien que ceux
de leurs parens ; ce que ces Barbares ont
coustume de nous celer soigneusement,
croiant que nous escriuons leurs noms,
pour les auoir en France, & y procurer
leur mort par magie.

La prouidence de Dieu me pourueut
de trois Maistres excellens pour appren-
dre la langue : ils estoient tous trois fre-
res, originaires du pays, & d'un excel-
lent naturel : la bonté avec laquelle ils
m'inuitoient souuent chez eux, & la pa-
tience & l'assiduité avec laquelle ils
m'instruisoient, me mirent bien-tost en
estat de les instruire eux mesmes, & de
leur apprendre nos mysteres, en leur
faisant voir quelques Images, dont ils
estoient curieux au possible.

Le premier adulte que ie iugé capa-
ble du Baptisme, fut vn vieillard âgé
de quatre-vingts ans, lequel ayant esté
touché de Dieu, en m'entendant in-
struire

és années 1656. & 1657. 161

fruire vn Chrestien , me fit appeller deux iours apres, estant, ce sembloit malade à l'extremité. Je ne fis pas de difficulté de luy accorder le Baptesme, trouuant en luy toutes les dispositions d'une Ame choisie pour le ciel, au chemin duquel il a encore eu depuis loisir de se disposer.

Le second que ie baptisay, fut vn estropiat qui auoit le visage couuert d'un chancre, qui faisoit horreur à la veüe. Ce pauvre affligé receut ma visite avec autant de ioye qu'il l'auoit souhaitée avec ardeur, & s'appliqua de si bonne sorte à retenir les prieres & les instructions; que ie luy conferay peu de temps apres le Baptesme dans nostre Chapelle. Peut-estre que ces graces que Dieu luy a fait, sont des fruiets de la charité qu'il eut autresfois pour les Peres Brebeuf & l'Allemand. Il m'a dit qu'il auoit esté tescmoin de leur mort, & que s'estant acquis du credit par sa vaillance parmy ses compatriotes en cette iournée, où il auoit tué huit Hurons de sa main, & en auoit fait cinq autres prisonniers, il auoit eu compassion de ces

162 *Relation de la Nouvelle France*,
deux Peres captifs; & qu'il les auoit obtenu des Anniehronnons moyennant deux beaux colliers de Pourcelaine, à dessein de nous les renvoyer; mais que bien-tost apres on luy auoit rendu ces presents, pour retirer les deux prisonniers, & les brusler avec toute la fureur imaginable.

Ce pauvre Lazare que j'ay ainsi nommé au Baptême, est fort considéré dans le bourg, & le premier appuy que Dieu a voulu donner à cette petite Eglise, qu'il augmente sans cesse, en attirant d'autres à la Foy, par la ferueur de ses discours & de ses exemples.

L'ennemi de l'Evangile ne pouuant en souffrir les progres, n'a pas manqué de calomnies pour le troubler. On accuse nostre Foy d'estre homicide de tous ceux qui la professent: & la mort de quelques Chrestiens d'Onnontagé ayant seruy d'occasion à cette erreur des Barbares, le discours qu'un Capitaine ennemi de nostre Religion fit dans vne assemblée seruit à les abuser dauantage: en sorte que non seulement plusieurs des naturels du pays, iugeant qu'il

estoit plus seur de croire ce que disoit cet homme d'autorité parmi eux, que d'adjouster foy à l'experience toute contraire, dont se seruoient nos anciens Hurons, me prièrent de trouuer bon qu'ils cessassent d'assister aux prieres, iusqu'à ce que la crainte qu'ils auoient de moy, fust diminuée : mais encore on accusoit la Foy des François de tous les maux dont le public ou les particuliers sembloient estre affligez. C'est ce qu'un Apostat taschoit de persuader à ces Barbares, nommant les Hollandois pour les garands de ce qu'il disoit, quand il asseuroit que les enfans des Iroquois mouroient deux ans apres leur Baptisme, & que les Chrestiens, ou se rompoient la iambe, ou se bleissoient le pied d'une espine, ou deuenoient ethiques, ou vomissoient l'ame avec le sang, ou estoient attaquez de quelque autre malheur insigne.

Si nostre reputation est ici maltraitée, nostre vie n'y est pas plus en seureté. Vn guerrier de ma connoissance estant venu loger dans nostre cabane, ne nous donna pas peu d'exercice : car

164 *Relation de la Nouvelle France,*
estant entré trois nuits de suite dans vne
espece de possession qui le rendoit fu-
rieux, il témoignoit en vouloir à ma vie,
& il m'eust sans doute mal-traitté, s'il
n'en eust esté empesché par nostre ho-
ste.

Je fus menacé de la mort d'une fa-
çon plus fiere par vn ieune homme, le-
quel apres m'auoir entendu instruire vn
Catechumene fort malade, que ie vou-
lois disposer à la mort ; me dit que i'e-
stois vn Sorcier dont il se falloit deffaire,
que ie faisois viure & mourir qui ie vou-
lois, & qu'il m'estoit aussi facile de gue-
rir cet homme que de le mener au ciel.
Ce reproche n'estoit-il pas agreable?

Toutes ces difficultez que le Diable
nous suscite n'empeschent pas neant-
moins que la Foy n'acquiere de iour en
iour plus de credit parmi les peuples,
que ie ne fois par tout bien escouté, que
nostre Chapelle ne se remplisse de Ca-
techumenes, & qu'enfin ie n'aye bap-
tisé tous les iours des enfans ou des adul-
tes.

Voilà ce que nous a mandé le Pere
qui eut alors soin de cette Mission pen-

dant deux mois, & qui fut obligé de la quitter pour retourner joindre ses travaux à ceux de deux autres Peres à Onnontaghé, où ils établissent le fondement & le Seminaire de toutes les autres Missions des Iroquois.

Mais depuis ce temps-là mesme le Pere y estant retourné accompagné de cinq ou six François, & du plus considerable du Bourg, qui l'estoit venu prier de retourner chez eux, il y fut receu avec tout l'accueil imaginable. Ayant trouué la Chapelle en mesme estat qu'il l'auoit laissée, il y fit commencer les prieres le iour de son arriuée, & les nouveaux Chrestiens & les Catechumenes firent bien-tost paroistre tant de zele, que le Pere escrit que cette Eglise n'est pas moindre dans sa naissance que celle d'Onnontaghé.



CHAPITRE XVII.

*De la publication de la Foy aux Iroquois
Sonnotouaehronnons.*

LE pays de Sonnotoüan beaucoup plus fertile & plus peuplé que les autres Prouinces des Iroquois, contient deux gros bourgs & quantité de bourgades, outre le Bourg des Hurons, appelé de Saint Michel, qui s'y est réfugié, pour euitier le malheur commun de leur Nation. Ils y gardent leurs coustumes & leurs façons particulieres, & viuent separément des Iroquois, se contentant d'estre vnis de cœur & d'amitié avec eux. N'ayant pas vn nombre suffisant d'ouuriers pour cultiuer vne vigne si spacieuse, nous nous contentons de leur prescher l'Euangile, quand ils nous apportent leurs presens de ceremonie, & d'alliance, ou quand nous leur portons les nostres. Car aussi-tost que le Pere Chaumont vn peu apres nostre arriuée en ce pays, eut adopté les Oio-

goenhronnons pour enfans d'Onnonrio, il alla à Sonnontouïan pour adopter ces peuples pour freres, & les faire nos freres en effet par le moyen de la Foy, à laquelle il les vouloit disposer.

Ayant assemblé tous les Anciens de Gandagan principal bourg de Sonnontouïan, & fait les presens d'alliance à l'ordinaire : Il commença d'expliquer avec vn ton feruent & esleué les veritez principales de l'Euangile, qu'il scela des trois plus beaux presens qu'il auoit reservez pour cela. Et pour les presser dauantage, moy-mesme, dit-il, ie me donne avec ces presens pour garand des veritez que ie vous presche, & si ma vie que ie vous consacre, ne vous semble pas assez considerable, ie vous offre celle de tant de François qui m'ont fuiui iusqu'à Gannentaa, pour estre les témoins de la Foy que ie vous presche. Ne vous ferez-vous pas à ces presens viuans, & à ces braues courages ? Et seriés-vous bien assez simples pour croire qu'une si leste trouppes eust quitté son pays natal le plus beau & le plus agreable du monde, & souffert tant de fati-

168 *Relation de la Nouvelle France,*
gues, pour porter si loin vn mensonge.
L'euenement fit voir que ces Barbares
furent touchez par le discours du Pere:
Car apres auoir bien deliberé, ils firent
responce qu'ils croioient volontiers, &
embrassoient la Foy qu'on auoit la bon-
te de leur presenter; & prierent avec
instance le Pere de s'habiter chez eux,
pour les mieux instruire de nos mysteres.
Il y en eut vn touché plus viuement que
les autres, qui ne voulut pas laisser
partir le Pere, qu'il ne s'en fust fait in-
struire & baptiser, & qu'il n'eust procu-
ré le mesme bon heur à sa femme. Dieu
benit les traualx de ce Pere des mesmes
sucez dans les autres Bourgs.

Annonkenritaoui, qui est le Chef de
ces peuples, a voulu les surpasser tous
en ferueur, & a esté vn des premiers
Chrestiens. Vn chancre qui luy man-
geoit la cuisse l'ayant alité, le Pere, quoy
qu'indisposé, le fut voir, & le conuer-
tit à la Foy, dont il sera sans doute vn
grand appuy dans son pays, puis que
Dieu semble ne l'auoir gueri que pour
ce dessein d'vn mal, que tout le monde
croioit incurable.

Entre plusieurs Hurons qui ont là conserué leur Foy dans la captiuité, ce Pere y fit rencontre d'une femme qui auoit conserué toute la ferueur d'une bonne Chrestienne, de laquelle il apprit que les Hurons de l'Isle d'Orleans continuoient dans l'exercice de nostre Religion avec autant de zele que iamais, & qu'un d'eux appelé Iacques Otsiaouens auoit estonné par sa constance les Iroquois qui le brusloient, n'obmettant rien de ses prieres ordinaires, & inuoquant incessamment le nom de IESVS dans ses tourmens.

Les Hurons de Saint Michel ne témoignèrent pas moins de pieté, estant ravis d'aïse de reuoir vn de leurs chers Pasteurs, & chacun demandant d'abord ou l'absolution pour soy, ou le Baptesme pour ses enfans. Les vieillards mesme qui auoient mesprisé la lumiere de l'Euangile pendant que leur pays estoit florissant, la recherchoient alors soigneusement, demandant instamment le Baptesme : Tant il est vray que l'affliction donne de l'entendement, & que l'aduersité ouure les yeux de ceux que la

170 *Relation de la Nouvelle France,*
prosperité auoit aucuglez. Cependant
quelques doux que fussent ces fruiçts
de l'Euangile, le Pere fut obligé de s'en
seuer bien-toist, des affaires plus pressan-
tes l'appellant ailleurs.

Il eut vne belle occasion en chemin
de se mocquer de la superstition des In-
fidelles, son guide luy ayant présenté
vn morceau de bois pour ietter sur deux
pierres rondes qu'on rencontre en che-
min enuironnées des marques de la
superstition de ces pauvres peuples; qui
iettent en passant vn petit baston sur ces
pierres en façon d'hommage, & y ad-
ioustent ces paroles Kouë askennon-
eskatongot, c'est à dire, tien, voilà pour
payer mon passage, afin que i'auance en
seureté.

Je ne peux omettre la mort de Daud
le Moyne, qui doit sembler pretieuse
aux yeux des gens de bien, comme nous
croyons qu'elle l'a esté aux yeux de
Dieu. C'estoit vn ieune-homme de
Diepe âgé d'environ vingt ans, que son
zele auoit mis à la suite du Pere dans
cette Mission, apres s'y estre disposé par
vne confession generale. Vn flux de

sang qui fit languir long temps son corps, ne pût attiedir vn moment sa deuotion, & il mourut sur le bord du Lac de Tlohero avec vne douceur & vne resignation de Predestiné, benissant Dieu de ce qu'il mouroit sur les terres des Iroquois, & dans l'employ du zele pour l'augmentation de la Foy. Cette mort n'estoit-elle pas vne belle recompense d'une vie employée au salut des Ames, & vn effet illustre de la protection de la Sainte Vierge, à laquelle ce ieune homme auoit vne deuotion tres-particuliere?

CHAPITRE XVIII.

De la publication de la Foy aux Iroquois Onneiouthronnon.

ON se preparoit à partir pour le voyage d'Onneiout, lors qu'on receut nouuelle qu'il n'y faisoit pas seur, & qu'on y tramoit la mort des François. Ce bruit estoit fondé sur ce qu'un guerrier reuenu recemment des Trois Riuieres, où il auoit tué quelques Hurons par

172 *Relation de la Nouvelle France,*
trahison, receuant des siens reproche de
cette action, & quelques-vns luy ayant
dit qu'il eust autant valu tuer les Fran-
çois, puis que l'vnion estoit si estroite
entre le François & le Huron, qn'ils ne
faisoient qu'une mesme chose: ce Bra-
ue respondit, que s'il ne tenoit qu'à cela
il trouueroit bien le moyen d'en tuer, &
que les Ambassadeurs François ne luy
pouroient échapper.

Nous ne laissâmes pas de passer outre,
apres en auoir delibéré avec les Anciens
d'Onnontaghé, qui deuoient auoir part à
l'Ambassade. Les Peres Chaumont &
Menart accompagnez de deux François,
furent ceux qui entreprirent ce voyage.

Leur premier giste fut dans vne fo-
rest, où le Capitaine harangua toute la
bande à l'ordinaire. Ah mes freres, di-
soit-il, que vous estes las! que de peine
de marcher sur la neige, sur la glace &
dans l'eau! Mais, courage, ne nous
plaignons pas de ce trauail, puis que nous
l'entreprenons pour vne si belle cause.
Demos qui habitez ces forests, gardez-
vous de nuire à aucun de ceux qui com-
posent cette Ambassade. Et vous Ar-

bres chargez d'années, & que la vieilleſſe doit bien-toſt ietter par terre, ſuſpendez voſtre cheute, & n'envelopez pas dans voſtre ruine ceux qui vont empêcher la ruine des Prouinces & des Nations. Il fit auſſi vne harangue de complimens aux femmes qui portoient les prouiſions du voyage, loſiant leur courage & leur conſtance.

A leur arriuée au Bourg apres les harangues & les complimens de part & d'autre, on les fit entrer dans les cabanes qui leur auoient eſté deſtinées; où on leur dit d'abord, que l'Onnouhouaroia, qui eſt vne eſpece de Carnuaſal parmy ces peuples, empêchoit qu'on ne peuſt leur preſenter quelque choſe à manger, & qu'on taſcheroit d'abreger cette ceremonie en leur faueur: ce qu'on fit bien-toſt apres, les Anciens ayant obtenu qu'on la remiſt à vn autre temps.

Le premier iour ſe paſſa à receuoir les viſites des anciens Chreſtiens Hurons, & les ciuilitéz des Onneiouthronnon, qui repetoient ſouuent ce compliment aux François. O mes Peres que vous

174 *Relation de la Nouvelle France*,
auez pris de peine de venir voir vos enfans ! Ils firent & receurent ce mesme iour diuers petits presens de peu d'importance , & qui ne se faisoient qu'entre des particuliers.

Le iour suiuant estant destiné aux presens solennels , le Pere qui portoit la parole, en estala vingt, adioustant l'explication à chacun , sur tout aux trois plus beaux, dont l'un se faisoit pour adopter les Onneiouthronnons pour enfans d'Onnontio , & les deux autres pour les instruire de la Foy. Ce fut à lors que le Pere leur expliqua nos mysteres , les exhortant à reconnoistre la belle lumiere de l'Euangile qui venoit les éclairer : ce qu'il fit au long, sans estre interrompu; ceux qui parlent dans ces Assemblées, ayant droit de dire tout ce qu'il leur plaist, sans qu'aucun ait droit de les interrompre. Cette semence fut si heureusement receüe, qu'on auoit lieu d'en esperer vne heureuse recolte, si les Anciens d'Onnontaghé, qui craignoient encore quelque surprise, n'eussent trop pressé le depart des Peres.

Il ayma-mieux toutesfois leur laisser

és années 1656. & 1657. 175
prendre le deuant, que de manquer à
baptifer deux vieillards qu'il auoit déjà
disposez à receuoir ce Sacrement, qu'il
confera à plusieurs petits enfans avec
eux, apres auoir bien payé son escot à
son hostesse, en l'instruisant & la con-
fessant.

CHAPITRE XIX.

*De la publication de la Foy aux Iroquois
Onnontagehronnons.*

IL suffiroit, pour faire entendre au
Lecteur quels sont les progres de
l'Euangile dans cette Nation, chez la-
quelle est nostre principale Mission des
Iroquois, de dire qu'on y fait l'Office
diuin, qu'on y administre les Sacremens,
qu'on y pratique les vertus Chrestiennes
avec autant de modestie, autant de
soin, & autant de ferueur, que dans les
Prouinces les plus Catholiques & les
plus deuotes de l'Europe. Plus de deux
cents baptisez en peu de temps, entre
lesquels il y en a cinq des plus confide-

176 *Relation de la Nouvelle France*;
rables de cette nation , sont les pierres-
vives qui composent les premiers fon-
dements de cette Eglise : en sorte que
ces peuples sont maintenant si éloignez
d'avoir honte de l'Evangile , ou de la
persecuter , qu'ils sont tous gloire de la
suiure , ou de la desirer ; & si l'un ou l'autre
des deux Peres employez à cette Mis-
sion demande entrant dans les caban-
nes , qui sont les Chrestiens , on luy res-
pond qu'il n'y a plus parmy eux que des
Chrestiens , depuis que les anciens sont
devenus Predicateurs de la Loy Chre-
stienne ; tant l'exemple des premiers des
Prouinces & des villes , a de pouvoir sur
les esprits , & sur la conduite des peup-
les.

Pleust à Dieu que tous ceux qui ont
autorité parmi les peuples , éclaircz de
la lumiere de la Foy , depuis plusieurs sie-
cles , eussent le mesme zele pour porter
à la vertu par leurs exemples , par leurs
actions , & par leurs discours , ceux au
dessus desquels la puissance de Dieu
les a éleuez ! Voici comme s'acquitta de
ce deuoir vn des principaux Iroquois
dans vne nombreuse assemblée , l'ex-
hortant

liortant en ces termes à la pieté.

Courage , mes neveux , courage :
 croyons tous, qu'il n'y ait pas vn Infide-
 le parmi nous : & puis qu'il ne faut que
 quitter le peché pour estre bon Chre-
 stien, il faut cesser , ieunes hommes, de
 vous demarier ; il ne faut plus, ieunes
 femmes , fausser la foy à vos maris.
 Qu'on n'entende plus parmi nous parler
 de larcins , plus de meurtres , plus de
 sacrileges. Ah que nostre bonheur seroit
 grand , si nous auions banni de nostre
 paystous ces vices, qui nous ont consom-
 mé si grand nombre de guerriers, & qui
 nous ont fait vne plus cruelle guerre que
 tous nos autres ennemis ! Croyons dono
 mes neveux , mais croyons tout de bon,
 puis qu'il n'y a que la Foy, qui puisse nous
 faire heureux en cette vie & en l'autre.
 Ce genereux Chrestien fut escouté avec
 vne attention merueilleuse , en sorte
 que son discours ne fut interrompu que
 par des acclamations , par lesquelles ses
 auditeurs temoignoient leur approba-
 tion vniuerselle.

Les femmes ayant beaucoup d'au-
 thorité parmi ces peuples , leur ver-

178 *Relation de la Nouvelle France*,
tu y fait d'autant plus de fruit qu'autre - part , & leur exemple en trouvent d'autant plus d'imitateurs. La sainte mort de Madeleine Tiotonharafon, précédée de la profession de Foy qu'elle auoit esté faire à Kebec , en a esté vne heureuse preuue : puis qu'ayant méprisé dans sa maladie les discours de ceux qui luy vouloient persuader de quitter nostre Religion pour guerir , & ayant conserué iusqu'au dernier soupir cette Foy , à laquelle on attribuoit sa mort, son fils, sa mere, ses oncles, & ses tantes conuerties vn peu deuant leur decez, dans vne extreme vieillesse , & plusieurs autres de ses proches ont suivi son exemple mourans peu de temps apres elle, avec le mesme zele pour la Foy, les mesmes tendresses pour le ciel, & le mesme mépris de la mort & de la superstition.

L'empressement, les cris, & les larmes avec lesquelles les petits enfans obligent leurs meres de les mener ou de les porter à la Chapelle , pour y faire leurs prieres, nous font assez voir que le Royaume des cieux est pour les enfans, & que Dieu tire sa gloire de ces petites

creatures , aussi bien que de ceux qui sont dans des âges plus auancez.

Il n'y à personne qui ne doive estre touché de ce que mande vn des deux Peres qui trauaillent à Onnontaghé. Voicyles termes de sa Lettre. La bonne Chrestienne Huronne dont ie vous mandé hier la mort , ayant laissé au berceau vn enfant de trois ou quatre mois, que nous auions baptisé dans nostre Chapelle; nous n'auons peu empescher qu'on ne l'enterrast tout vif avec le corps mort de sa mere , par vn motif de compassion trop ordinaire à nos Sauvages, qui aiment mieux faire mourir tout d'vn coup vn enfant à la mammelle, que de luy laisser traifner vne vie languissante & miserable apres la mort de sa mere, qui seule luy doit seruir de nourrice. On a eu plus de compassion de l'enfant d'vne autre Chrestienne captiue , morte depuis quelque temps : car on l'a nourri depuis , en sorte neantmoins qu'il est tombé en chartre , ayant trop tost esté priué du lait de sa mere. Ce pauvre petit predestiné donne tous les marques possibles de ioye quand il me voit : on

180 *Relation de la Nouvelle France,*
diroit à luy voir ioindre les mains, quand
on l'exhorte à prier Dieu, qu'il dit de
cœur les prieres qu'il ne peut encore dire
de bouche: luy voyāt vn iour donner vne
espece de consentement des yeux & des
levres, pendant que ie l'exhortois à pren-
dre le chemin du ciel, pour y suivre sa
mere; ie me persuadé facilement qu'il
auoit quelque chose par dessus la portée
de son âge, & que comme il pouuoit
concevoir ce que ie luy disois, il pou-
roit aussi reconnoistre & inuoyer son
Sauueur: Ce fut pourquoy ie luy dis,
Charles, prions Dieu ensemble, repe-
rez avec moy ces paroles; *IESVS* ayez
pitié de moy, & me faites aller au ciel.
Mais que ie fus ravi d'oïr cet inno-
cent encore à la mamelle, qui n'auoit
iamais parlé auparauant, repeter intel-
ligiblement ces mots, *IESVS* ayez pitié
de moy, & acheuer le reste en beguayant
du mieux qu'il pouuoit. Que cet en-
fant moribond me sembloit heureux,
quand ie le comparois avec tant d'au-
tres enfans nais dans la soie, dont les
premieres paroles sont souuent les blas-
phemes, & les mots infames qu'ils ont

ouy de la bouche de leurs parens ou de leurs domestiques !

Ceux qui ont veu dans les Relations des années passées, qu'elle estoit la ferveur de la Congregation, erigée pour les Hurons de l'Isle-d'Orleans, admiroient ce fruit de plusieurs années de travaux : mais personne n'eust osé esperer que le semblable se peust faire en peu de temps parmi les Iroquois. Dieu a commencé d'operer cette merueille, nous donnant de la facilité à establir trois Congregations, entre lesquelles nous voyons naistre la sainte emulation que nous y souhaitions, les faisant des trois Nations differentes, des Hurons, de la Nation neutre, & des Iroquois. Ceux qui y ont esté admis qui sont tous des plus anciens & de probité connue, firent paroistre leur ferveur dès le iour des Rameaux de l'année 1657. qui fut celuy de leur premiere Assemblée ; se trouvant tous dans la Chapelle vne heure avant le iour, & y recitant publiquement le Chapellet devant qu'on commençast la Messe.

Enfin pour iuger des heureux progres

182 *Relation de la Nouvelle France,*
de la Foy dans la nouvelle Eglise d'On-
nontaghé, il ne faut que sçauoir qu'il
n'y a dans Onnontaghé aucune famille
qui ne nous reçoie avec ioye, & ne se
plaise à nous oïr parler de nos myste-
res: Qu'aucun des Anciens ne s'oppose
ouuertement à la Foy. Qu'il n'y à aucun
esclauue pauvre ou estranger qui ne se
fasse instruire: Qu'il y a fort peu d'en-
fans dans le bourg qui ne sçachent le
Catechisme: Que les calomnies n'ont
pas empesché que la plus part de ceux
qui sont morts n'ayent profité de nos
soins mourât dans le Christianisme: Que
dans vne grande mortalité qui a esté
dans le pays depuis que nous y sommes,
d'vn grand nombre d'enfans qui en ont
esté enleuez, il n'en est mort que deux
sans Baptisme: Que nous auons le bon-
heur d'auoir mis dans le ciel, depuis que
nous sommes icy des Ames de plus de
douze sortes de Nations: Enfin qu'il n'y
a point de cabane dont on ne vienne
tous les iours prier à la Chapelle, & qu'il
n'y a presque personne qui n'ait quelque
connoissance des articles de nostre Foy,
& quelque disposition au Baptisme.

Ces fruits de l'Euangile qui surpassent tout ce qu'on en peut exprimer, n'auroient peut-estre pas esté moindres parmy les autres Nations Iroquoises, si nous eussions pû nous transporter en mesme temps en diuers lieux, ou si nous eussions eu le secours de bons ouuriers Euangeliques que nous esperons.

CHAPITRE XX.

*Des nouvelles e'perances du progrez de
la Foy dans les Missions de la
Nouvelle-France*

VNe recolte si abondante faite en si peu de temps, par vn si petit nombre d'ouuriers, suffiroit pour donner lieu d'en esperer vne beaucoup plus grande, les dispositions de la Foy estant déjà dans les esprits de tous ces peuples, & le nombre de ceux qui y trauailleront deuant croistre dans peu de temps, ainsi que nous l'esperons; leur ayant déjà préparé vn Dictionnaire Iroquois pour leur rendre la langue plus facile.

Il n'y a rien qui gaigne & rauisse davantage en admiration les Sauvages, que le zele, qui a fait quitter à vn bon nombre de François les commoditez & les douceurs de la France, pour embrasser leurs miseres, & s'abandonner à leur merci. Le peu de crainte que nous témoignons leur entendant dire: c'est moy qui ay massacré vne telle Robbe-noire, c'est moy qui ay brulé cette autre, leur fait prendre vne idée auantageuse des veritez que nous annonçons, & qui nous font ainsi mépriser les dangers de la mort & des supplices.

Il y a fort peu de nos Sauvages qui aillent à Kebec qui n'en reuiennent avec plus d'estime & d'affection pour nos mysteres, & avec vn desir de se faire instruire, & d'embrasser la Foy, experimentant à ce qu'ils disent des sentimens tout contraires quand ils reuiennent des habitations des Hollandois. Mais sans aller si loin: la pieté qui regne ici parmi les François, qui nous y ont accompagné, a donné de la pieté & de l'inclination pour la Foy à plusieurs Iroquois, qui nous l'ont depuis auoué: en sorte

qu'une bonne Chrestienne disoit il y a peu de temps : quel contentement devons-nous esperer dans le ciel de la veuë de Dieu & des Bien-heureux , puis que nous ressentons tant de ioye, voyant la pieté des François !

Nostre situation au centre de ces Nations est fort aduantageuse pour la conuersion des Sauuages , tant à cause des Missions qui se peuuent facilement faire de là dans les Prouinces voisines, qu'à cause du grand abord de passans , qui rendent incessamment ce lieu fort peuplé. Ceux qui n'ont pas encore la hardiesse de se declarer Chrestiens chez eux , y viennent faire leur apprentissage des vertus & des deuoirs d'un Chrestien , ils ne manquent pas de moyens pour le bien faire ; puis qu'on y fait tous les iours le Catechisme commun à tout le monde, les prieres, les ceremonies de l'Eglise , les Instructions publiques ; & on y presche les Festes en Iroquois.

Il y a de bons Hurons qui viennent en ce lieu de trente & de quarante lieues loing pour se renoueller , & reprendre leur ancien esprit de ferueur , tant par

186 *Relation de la Nouvelle France*,
les instructions qu'ils y reçoivent, que
par l'exemple des François & des Iro-
quois conuertis. Il y en a mesme qui s'y
arrestent le plus long-temps qu'ils peu-
uent, pour auoir part à nos aumosnes
spirituelles & corporelles; du nombre
desquels sont de pauvres esclauues, dont
la Foy a esté bien éprouuée par les mi-
sères qu'ils ont souffertes; qui esperent
que la liberalité & la charité des Fran-
çois sera assez forte pour rompre les liens
de leur esclauage. Nous les assistons le
mieux qu'il nous est possible, en atten-
dant qu'on leur procure ce bon heur, en
en sorte qu'avec l'entretien d'un bon
nombre de François, qui nous ont ac-
compagné dans ce pays, nous soula-
geons la misere de tous ces pauvres mi-
serables, tenant pour ainsi dire table ou-
uerte aux Sauvages. Nous auons tout
suiet de reconnoistre que c'est la seule
liberalité de Dieu, qui nous donne le
moyen de faire paroistre la nostre, &
attirer les Sauvages à la Foy par ces au-
mosnes, puis que nous n'auons appor-
té aucunes subsistances dans ce pays, où
nous ne possedons pas encore vn poul-

ce de terre qui soit en estat de nous nourrir. Si nous pouuions nous habituer dans le pays des Sonnontouachronnons, qui nous en sollicitent, & y vser de la mcsme liberalité, nous auriõs tout suiet d'esperer que tous les Sauuages, non seulement de cette Nation, mais aussi de toutes les autres contrées circonuoisines donneroient bien-tost les mains aux veritez de l'Euangile, la voyant publiée avec cet éclat. Nous irions par ce moyen establir la Croix de I E S V S- C H R I S T en d'autres pays au delà de ceux des Iroquois, & parmy des Nations; qui semblent nous tendre les bras, & nous inuiter à leur aller aussi rompre & distribuer le pain de vie.

Car nos Iroquois ont decouuert au delà de la Nation du Chat, d'autres Nations nombreuses, qui parlent la langue Algonquine. Il y a plus de trente bourgs qui n'ont iamais eu connoissance des Europeans, & qui ne se seruent encore que de haches & de couteaux de pierre, & des autres choses dont vsoient les Sauuages auant leur commerce avec les François. Puis que

188 *Relation de la Nouvelle France,*
les Iroquois leur vont porter le feu &
la guerre, pourquoy n'irions nous pas
leur porter le feu & la paix que IESVS
CHRIST a apporté au monde? Nous
esperons le secours necessaire pour ces
entreprises, pour lesquelles nous serions
heureux de pouuoir respendre nostre
sang iusqu'à la derniere goutte, & vser
nostre vie iusqu'au dernier soupir. Nous
auons lieu d'esperer que la France
ne manquera pas de nous fournir les
moyens d'executer ces desseins, & de
nous ayder à accomplir de si glorieuses
expeditions; puis qu'on doit attendre
d'un Royaume tres-Chrestien, tout le
zele possible pour l'accroissement de la
Foy & de la Chrestienté.



CHAPITRE XXI.

*Lettre écrite au R. P. Louys Cellot
Provincial de la Compagnie de IESVS de
la Province de France, par le P. Fran-
çois le Mercier de la mesme Compagnie.*

LA sainte curiosité du Lecteur aura beaucoup de satisfaction voyant vne Lettre qui ne pût estre imprimée l'année passée, parce qu'elle fut receüe trop tard, aussi bien que les Memoires dont les premiers Chapitres de cette Relation ont esté tirez. Le Pere qui estoit alors superieur de ces Missions escriuit cette Lettre de Montreal, y passant pour aller aux pays des Iroquois.

MON R. P.
Pax Christi,

Après auoir dressé tous nos vœux au Ciel pour implorer son ayde, nous auons recours à vostre R. pour luy demander sa sainte benediction, auant que de nous embarquer dans la plus dangereu-

190 *Relation de la Nouvelle France*,
se, mais aussi la plus glorieuse de toutes
les entreprises qu'on puisse faire en ce
païs. Nous sommes sur les termes de
nostre depart pour aller ramasser le reste
du sang du Fils de Dieu parmi des peu-
ples, où nous auons eu le bon-heur de
verser le nostre; & leur porter le flam-
beau de la Foy; quoy qu'ils n'ayent eu
iusqu'à present autre dessein que de l'e-
steindre: c'est pour nous aller establir
chez les Iroquois: ie crois tous dire en
nommant ces Barbares, & leur nom
seul monstre assez le danger que nous
courons, & la gloire qui reuiet à Dieu
de l'execution de ce dessein.

Nous n'ignorons pas que ce sont des
Sauuages, qui nous ont mangés avec
delices, & beu avec plaisir le sang des
Peres de nostre Compagnie, qu'ils en
ont encore les mains & les leures tein-
tes, & que les feux dont ils ont rostis
leurs membres, ne sont pas tout à fait
esteins: nous n'auons pas oublié les em-
brasemens qu'ils ont allumez dans nos
maisons, & la cruauté qu'ils ont exercée
sur nos corps, qui en portent encore les
marques: Nous sçauons que toute leur

politique consiste à sçauoir bien tramer
vne trahison, & en couvrir tous les des-
seins; que les Nerons & les Diocletians
ne se sont pas tant declarez contre les
Chrestiens, que ces sanguinaires contre
nous; que la Foy seroit à present receuë
parmy plusieurs Nations Infideles, s'ils
n'eussent pas surpassé en rage & en fu-
reur les plus grands persecuteurs de IES-
VS-CHRIST: Nous n'auons encore pû
secher nos larmes, qui baignent nos
yeux depuis six ans, quand nous les iet-
tons sur l'estat florissant, ou estoit l'E-
glise Huronne auant que ces Tyrans en
eussent sappé les fondemens, faisant
des Martyrs de ses Pasteurs, & des Saints
de la pluspart de ses membres, & n'en
laissant que des restes bien pitoyables,
qui se sont refugiez sous l'aisle des
François, qui est l'vnique azile qui leur
est resté dans leur mal-heur: Nous
voyons que depuis ce premier debris ils
ont tousiours auancé leurs conquestes,
& se sont rendus si redoutables dans ce
païs, que tout plie sous leurs armes: Ils
ont encore la force en main, & peut-
estre la trahison au cœur, & nos alliez

191 *Relation de la Nouvelle France,*
font affoiblis & diminuez de telle sorte,
qu'à peine en reste-t'il assez pour conser-
uer les noms de quantité de nations tres
nombreuses, & tres considerables. No-
n obstant tout cela, nous croyons estre
tellement conuaincus de la volonté de
Dieu, qui a fait autre-fois ses plus il-
lustres Apostres, de ses plus grands per-
secuteurs, que nous ne doutons point
qu'il n'ouure à present la porte à ses
Predicateurs, pour aller planter la foy
iusques dās le sein de ses ennemis, triom-
pher de leur barbarie, & changer ces
Loups, & ces Tygres, en Agneaux,
pour prendre leur place dans le ber-
cail de I E S U S-CHRIST.

Ce n'est pas sans fondement que
nous conceuons de si belles esperances,
les traits de la prouidence Diuine, & les
ressorts de sa conduite, qui a sçeu si
bien conduire les affaires iusqu'au point
où elles sont, nous font auoüer qu'on
ne peut sans vne extreme lâcheté, man-
quer aux attentes que Dieu nous fait
naistre du costé que nous pensions le
moins. Si nous n'auions pas remarqué le
doit diuin, dans le commencement, dās
le

le cōmencement & dans la suite de cette
 entreprise, nostre zele nous seroit suspect,
 & nous pourrions craindre d'agir avec
 plus de ferueur que de prudence, puis
 que toutes les apparences humaines
 semblent combattre nostre resolution.
 Mais Dieu opere si manifestement dans
 toute cette affaire, qu'on ne peut dou-
 ter qu'elle ne soit vn ouurage de sa main,
 dont l'execution & la gloire luy appar-
 tient uniquement. Car quelle puissan-
 ce autre que la sienne auroit obligé ces
 peuples enflés de leurs victoires, non
 seulement de nous venir rechercher
 d'une paix dont ils sembloient n'avoir
 aucun besoin, mais aussi de se mettre
 sans armes entre nos mains, & de se iet-
 ter à nos genoux pour nous conjurer de
 les agréer pour nos amis, lors que nous
 estions si foibles que nous ne pouvions
 plus les avoir pour ennemis? Il ne tenoit
 qu'à eux de continuer à massacrer le re-
 ste de la Colonie Françoisse, ne trou-
 vant presque point de resistance, ny du
 costé des François, ny du costé des
 Sauvages nos Confederez, & nean-
 moins depuis plus de trois ans, ils nous

194 *Relation de la Nouvelle France,*
enuoyent sans cesse des presens & des
ambassades pour entrer dans nos esprits
& nous solliciter à la paix. Les anciens
& les ieunes, les femmes & les enfans
se mettent à nostre discretion : ils en-
trent dans nos forts, agissent confidem-
ment avec nous, & n'épargnent rien
pour nous ouurir leur cœur, & nous y
faire lire que toutes les poursuites qu'ils
font, sont autant sinceres que pressantes.

Ils ne se contentent pas de venir chez
nous ; mais ils nous inuitent depuis long
temps d'aller chez eux, & nous font of-
fre de la plus belle terre qu'ils ayent, &
qui soit en ce Nouveau monde. Ce n'est
ny la necessité de la traite, ny l'esperan-
ce de nostre protection qui les oblige à
tout cela, puisqu'ils ont eu iusqu'à pre-
sent, & ont encore du costé des Hollan-
dois l'un & l'autre bien plus avantageu-
sément qu'ils ne le peuuent esperer des
François ; mais c'est vn coup de Dieu,
qui sans doute a presté l'oreille au sang
des Martyrs, qui estant la semence des
Chrestiens, en fait germer maintenant
sur ces terres, qui en sont arrosées. Car
outre que ces plus grands ennemis de la

Foy ont fait des presens pour declarer qu'ils vouloient l'embrasser, outre qu'ils ont demandé des Predicateurs pour estre instruits, & qu'ils ont fait profession publique en plein Conseil d'estre Croyans; les Peres de nostre Campagnie qui ont passé cet hyuer chez eux, ont remarqué tant de belles dispositions pour y planter vne nouvelle Eglise, non seulement par les choses miraculeuses qui s'y sont passées, comme Vostre R. verra dans le Journal, mais aussi par les premices nōbreuses qui en ont esté déjà consacrées au ciel, que c'est avec toute assurance que nous parons pour aller faire retentir le nom de IESVS-CHRIST dans ces terres, où le Diable a tousiours esté le maistre depuis le commencement du monde.

Si ces peuples font tant les empressez pour nous auoir en leur pays, nous n'auons pas moins de passion de quitter le nostre pour aller chez eux; & c'est vne autre marque de la volonté de Dieu, qui dispose toutes choses si à propos, que ie me vois egalelement & agreablement importuné de deux costez bien differents; d'une part des Iroquois qui pressent; de l'autre,

196 *Relation de la Nouvelle France*,
de nos Peres & Freres qui font instance
pour estre de la partie. Le desir des pre-
miers & le zele des autres m'oblige à les
contenter tous, & quoy que ceux-là n'ayēt
iusqu'à present fait paroistre que de la
cruauté, ceux-cy n'ont pour eux que de la
tendresse qui leur fait mépriser leur vie,
& la prodiguer genereusement pour le sa-
lut de ceux qui ont si souuent tasché de
leur donner la mort. Je ne doute pas que
Dieu qui gouuerne luy mesme son ouura-
ge & inspire cet esprit de ferueur aux Pe-
res de nostre Compagnie qui sont en ces
contrées, ne le fasse aussi en nos Maisons
de France, & n'en porte plusieurs à venir
prendre part à de si belles Conquestes,
quoy qu'avec des trauaux incroyables, &
de tres grands dangers, ou plustost de
belles esperances de mourir dans le liēt
d'honneur. Je m'imagine bien qu'on se
iette aux pieds de Vostre R. comme ie
vois qu'on embrasse icy les miens pour
obtenir la plus grande grace que puisse es-
perer vn veritable membre de la compa-
gnie de Iesvs, qui n'aura iamais plus d'hon-
neur que de se consommer, pour porter
dans la barbarie le nom de son chef & le

faire adorer par des Iroquois.

C'est encore vn trait de la prouidence diuine de nous donner maintenant bon nombre de nos Peres qui n'ont pas seulement le courage de s'exposer à tout mais aussi la capacité d'instruire ces Barbares dont la langue aussi bien que de plusieurs autres Nations plus éloignées n'est pas beaucoup differente de celle des Hurons: & c'est ce qui r'anime leur ferueur & donne le courage à des vieillards casscz de glorieux trauaux, de vouloir aller parmi ces peuples vser le reste de leurs iours avec le mesme zele qu'ils faisoient paroistre il y a quinze ou vingt ans, quand ils trauailloient dans les Missions Huronnes. Il n'est pas iusqu'à ceux de dehors qui ne ressentent en eux des étincelles de cette ardeur, & qui ne s'offrent à mettre la main à vn si bel ouurage: & qui voudroit les croire, ou la Nouvelle France seroit presque toute Iroquoise, ou nous n'aurions plus de François que parmy les Iroquois: tant est grand le preiugé qu'en a de la sincerité de ces peuples, qui fait qu'apres auoir bien imploré l'assistance du S. Esprit, & deliberé sur toutes les circonstan-

ces de cette paix, il n'y a personne qui puisse raisonnablement douter que ce ne soit tout de bon qu'ils font tant d'instance pour l'obtenir.

Il est vray que la pierre d'achoppement qui pourroit arrester nostre dessein, nous vient de la part des Iroquois d'en-bas nommez Anniengchronnons, chez qui nous n'allons pas nous habiter, & qui peuvent presumer que si nous nous lions si estroitement avec les quatre Nations Supérieures, ce sera pour nous mettre en estat de ne les plus craindre : mais quand ils s'opposeroient à nostre establissement nous aimons bien mieux les avoir seuls pour ennemis que les quatre Nations ensemble, qui seroient irritées par le refus que nous leur ferions de nostre amitié, & nous feroient ressentir de funestes effets du depit qu'ils auroient de se voir decheus de leurs iustes pretensions, & trompez si manifestement apres de si solennelles promesses tant de fois reiterées icy & chez eux, d'aller nous establir en leur pays : En sorte qu'un refus ou un delay seroit suivi de la ruine totale de cette nouvelle France, laquelle ayant esté reduite aux abois

par vne seule Nation , ne pourroit longtemps soustenir l'effort des cinq ensemble , si elles conspiroient contre elle. Le bien de la paix que nous commençons à goustier est si doux & si necessaire pour la publication de la Foy, que quand il y auroit beaucoup de danger, nous nous immolerions volontiers comme des victimes publiques pour conjurer l'orage qui foudroieroit infailliblement sur nos François, & pour detourner les miseres qui accompagneroient vne guerre plus dangereuse que celles d'auparavant. Mais quand nous n'aurions pas toutes les assurances morales que Dieu a touché les cœurs des Iroquois , nous nous croirions suffisamment obligez à d'exposer iusques à la dernière goutte de nos sueurs & de nostre sang , voyant qu'en peu de temps qu'on a esté chez eux , on en a desia mis quantité dans le ciel & dans l'Eglise ; qu'on y a presché l'Euangile à cinq ou six peuples differents qui s'y trouuent ; que plusieurs scauent déjà les principaux mysteres de nostre Religion ; que leur grande plainte est qu'on ne peut estre par tout pour les enseigner ; & enfin que ce n'est pas seu-

200 *Relation de la Nouvelle France*,
lement à eux que la Foy se va publier,
mais qu'ils font l'entrée & comme le pas-
sage pour aller porter la Foy à quantité
d'autres Nations qui n'ont jamais eu la
connoissance de I E S U S - C H R I S T, ny de
ses Apostres.

Voilà l'estat des affaires & les effets de
tant de prieres, de mortifications, de
jeûnes, d'aumosnes & de bonnes œu-
res qui se font dans les deux Frances, &
qui ont fait clore vn si beau dessein: mais
l'entreprise en tant epineuse & l'ex-
ecution tres difficile, nous conjurons ces
saintes Ames de continuer leur ferueur,
afin que Dieu continuë ses benedictions
sur ce pays. Et pour mon particulier ie
prie Vostre R. & tous nos Peres & Freres
de sa Prouince de leuer les mains au ciel,
pendant que nous allons declarer la guer-
re à l'infidelité & liurer le combat au Dia-
ble iusque dans le cœur de ses terres. Je
suis avec tout le respect & la soumission
possible

De Vostre R.

*Le tres humble & tres-obeyssant
seruieur en N. S.*

FRANÇOIS LE MERCIER
de la Compagnie de Iesus.

A Montreal le 6. Iuin 1696.

CHAPITRE XXII.

*Dernieres Nouvelles de ce qui s'est passé
en la Nouvelle France.*

IE ne puis differer de faire part de
nostre ioye au Lecteur , luy appre-
nant l'heureuse nouvelle que nous auons
reccuë par le vaisseau arriuë le dernier,
lors qu'on trauailloit à l'impression du
dernier cahier de cette Relation. C'est la
conuersion de plus de quatre cens Bar-
bares , pour laquelle Dieu s'est serui du
zele du P. Menard Religieux tres-fer-
uent de nostre Compagnie. Mais com-
me il n'est point de ioye sans meslange:
nous auons receu par la mesme voie vne
Lettre qui ne nous donne pas peu d'af-
fliction , nous apprenant la perfidie des
Sonnontoucronnons , ainsi que vous
verrez lisant avec douleur cette mesme
Lettre , dont ie n'ay pas creu deuoir
differer l'impression à l'année prochaine.

*Du chemin de Kebec à Onontaghé
ce 9. d'Aoust 1657.*

MON R. P.
Pax Christi.

Je puis dire avec verité, *propter verba labiorum tuorum ego custodiui vias duras.* Depuis nostre depart de Montreal le 26. Iuillet, en compagnie de quinze ou seize Sonnontoerronnons, de trente Onontagheronnons, & d'environ cinquante Chrestiens Hurons tant hommes que femmes & enfans; Le chemin d'Onontaghé a esté semé de croix bien fascheuses pour nous : mais l'obeyssance m'y ayant engagé, j'ay éprouué que I E S V S-CHRIST est en la Croix, & qu'il la rend aymable à ceux qui la veulent rechercher. Je conçeus que ie deuois auoir beaucoup de peines en ce voyage par le peu d'affection que ie remarquay d'abord en nos Onontagheronnons pour l'embarquement tant de nos François que des pacquets, dont nous fusmes obligez de quitter la plus grande partie à cinq lieues au dessus de Montreal. J'eus de la peine à trouuer qui voulust

m'embarquer moy-mesme, & ie me vis contraint de me ietter dans vn dernier canot abandonné sur le riuage, avec nostre Frere Louis de Boesme, deux François & deux Sauvages, qu'il me fut difficile de gagner: Pour toutes provisions ie ne pris qu'un petit sac de farine. Chaque iour j'ay eu de nouvelles difficultez, voyant ou quelques-vns de nos François degradez en chemin, ou des pacquets laissez: à quoy il falloit que ie pourueusse; & n'eust esté nos bons Chrestiens Hurons, qui estoient mon refuge, ie ne trouuois par tout que des froideurs. Nous craignons la rencontre de cent Agnierronons, qu'on disoit nous attendre à l'entrée du grand Lac des Iroquois, pour se rendre les Maistres de nos Chrestiens Hurons, & les faire captifs. Je les auois disposez à tout ce qui pouuoit arriuer de ce costé-là: tous s'estoient confessez, & leur cœur y estoit préparé. Les voyes de Dieu sont adorables, quoy qu'elles nous soient inconnuës. Le malheur de nos Hurons est arriué de la part de nos Ononragheronons mesmes, ausquels ils s'estoient

204 *Relation de la Nouvelle France,*
confiez, & qui leur auoient promis vne
fidelité si inuiolable partant de pourpar-
lers de paix, tant d'ambassades de part
& d'autre, & partant de presents si so-
lemnels.

Le troisiéme iour de ce mois sur les
quatre à cinq heures du soir, nos canots
estant arriuez à vne Isle où nous deuons
nous arrester, vn Capitaine qui venoit
dans le dernier canot, commença le
premier Acte de cette Tragedie, fen-
dant d'un coup de hache le derriere
de la teste à vne Huronne, parce qu'el-
le auoit refusé conttamment de consen-
tir à son impudicité, en ayant esté solli-
cité pendant quatre iours. La nouvelle
en estant venuë où nous estions, les
Onnontagheronnons se mirent sous les
armes, comme s'ils eussent eu volonté
de se battre contre les Sonnontouerro-
nons, pour vanger cet assassinat. Ce
Capitaine lascif des Onnontagheronnons
fait ranger les Hurons au milieu de ses
gens, hommes, femmes & enfans, al-
lant de part & d'autre, comme pour ap-
paizer les esprits. J'allois & ie venois aussi
tantost aux vns, tantost aux autres; ayant

aduerti nos François de ne point s'engager en toute cette affaire; mais de demeurer paisibles. Ce Capitaine & moy nous auions des desseins bien differents: ie taschois de calmer l'orage, & ce malheureux l'excitoit, & y dispoit malicieusement toutes choses, iusqu'à ce qu'enfin le foudre qui auoit causé ce tonnerre, sortit de la nuë où il estoit caché, & tomba sur ces pauvres victimes innocentes qu'on massacra à la veuë des femmes & des enfans: il y eut sept Chrestiens assommez à coups de haches & de cousteaux: les femmes & les enfans furent faits captifs, & on les despoüilla de tout leur butin, des Robes de castor, peaux d'Orignac Matachiées, colliers de Pourcelaine, & des aumônes qu'on leur auoit fait à Kebec: Mes yeux furent contraints de voir ce spectacle d'horreur, & mon cœur en estoit transpercé. Ce fut alors que ie vis combien la Foy a de fortes consolations au milieu des douleurs les plus ameres. Il n'y eut aucunes de ces pauvres captiues qui ne receust avec amour les aduis que ie leur donnois, les faisant resouuenir

266 *Relation de la Nouvelle France,*
que Dieu n'auoit pas promis aux Chre-
ftiens les ioyes pour cette vie, mais pour
l'eternité, & que souffrans en patience
les miseres sur terre, nous serons heureux
dans le ciel. Elles offroient à Dieu leurs
peines & leurs craintes, le benissant de
ce qu'on ne pouuoit pas leur oster la
Foy, ny l'esperance qu'elles auoient
de mourir. La nuit estant venue l'as-
semblay en vn Conseil public les On-
nontagheronnons & les Sonnontoïer-
ronnons pour leur parler sur ce qui estoit
arriué: ie leur declaray hautement que
les coups qui estoient tombez sur la te-
ste de nos Hurons, auoient fendu mon
cœur, & que ie ne pouuois retenir mes
larmes dans vn tel obiet de pitié; qu'un
pere & vne mere ne pouuoient voir leurs
enfans massacrez, & reduits en capti-
uité, sans souffrir dans leurs souffran-
ces; que ie voulois bien qu'ils sceus-
sent que i'auois vn cœur de Pere & des
tendresses de mere pour ces pauues
Chrestiens Hurons, que ie conduisois
depuis vingt ans, qui auoient de l'amour
pour moy, & pour lesquels ie conserue-
rois vne amitié inuiolable iusqu'à la mort.

Oüy, leur disois-je, tuez-moy, bruslez-moy, & qu'ils vivent, si par ma mort ie les puis ressusciter : mais puis que ces souhaits ne peuvent pas auoir d'effect, j'ay trois paroles à vous porter.

La premiere, que vous arrestiés vòtre fureur & vòtre hache, & que vous ne continués pas vòtre cruauté sur ceux qui sont restés. C'est desia trop de sang innocent respádu; Dieu quil'a veu, en tirera vengeance, si vous l'irrités dauantage.

La deuxiême, afin que vous traitiez fauorablement ces pauures femmes & ces enfans captifs, ne les considerant plus comme vne nation differente de la vòtre, mais comme vn mesme peuple avec vous.

La troisiême, afin que nous continuions nostre voyage, comme si rien n'estoit arriué. I'employay pour cela six milles grains de Porcelaine. Ils me firent responce qu'ils y auroient esgard.

Mais ce Capitaine mal-heureux & perfide eut bien le front de me dire publiquement, que Monsieur le Gouverneur, le P. Mercier & le P. Chaumonot leur auoient donné commission de faire ce coup de cruauté: ie luy repartis hau-

208 *Relation de la Nouvelle France,*
tement, que cela estoit faux, & que ces
trahisons estoient éloignées de nostre es-
prit, autant que le ciel de la terre : sur
quoy il n'eut point de replique, sinon que
ie ne sçauois pas tout ce qu'il sçauoit.

On nous auoit donné secretement
aduis que cette nuit là mesme, on de-
uoit acheuer sur nous le dernier acte de
la tragedie : toutes choses y sembloient
disposées, & nous y estions préparés :
mais il a plu à Dieu se contenter ius-
qu'à present, de nostre volonté ; ce sera
quand il luy plaira : mais nous voyons de
tous costés des tempestes qui se prepa-
rent, & des orages qui semblent ne de-
voir fondre que sur nous. Trop heu-
reux que nos vies soient consommées
au seruice de Dieu, & que nous mou-
rions pour sa gloire : car à la vie & à la
mort, nous sommes tous à luy.

Je recommande aux prieres de tous
nos bons amis cette Eglise captiue, &
cette Eglise souffrante, avec les Pasteurs
& le troupeau.

M. R. P.

De V. R.

Le tres-humble & obeysant
seruiteur en N. S.

Paul Ragueneau de la Comp. de IESVS.

Extrait

*Extrait d'une autre Lettre enuoyée
par la mesme voye.*

IE louë Dieu de ce que V. R. continuë encore dans le soin de nos affaires; mais ie suis vn peu surpris de ce que vous nous parlez neantmoins d'vn autre air qu'à l'ordinaire. Où est le temps que vous nous escriuiez que nous n'auions rien à craindre, & que Dieu vous enuoyoit dequoy nous secourir en ce bout du monde? D'où vient que maintenant vous vous plaignez de nos dépenses excessiues? Nous sommes en vn pais où les frais sont bien plus grands qu'aux Hurons, où nous ne deuons attendre aucun soulagement de ces contrées, parmy des traistres & des fourbes qui sont en possession de nous mal-traitter depuis long-temps. C'est vn ramas de captifs amenez de tous costez, qui apres tout sont capables d'estre faits enfans de Dieu. I'en ay baptisé pour ma part plus de quatre cens depuis vn an. Nous marchons, la teste

210 *Relation de la Nouvelle France,*
leuée au milieu des dangers, au trauers
des iniures, des huées, des calomnies,
des haches & des couteaux avec les-
quels on nous pourfuit assez souuent
pour nous mettre à mort. Nous sommes
presque tous les iours à la veille d'estre
massacrez : *Quasi morientes, & ecce uiui-*
mus. Et vous nous dites que vous ne
sçauriez plus soustenir cette Mission.
J'ayme mieux, mon Reuerend Pere,
me tenir aux dernieres parolles de vo-
stre Lettre, qui dit qu'apres tout si nous
faisons bien de nostre costé, Dieu fera
du sien ce qu'il faut. Oüy assurement
il nous secourra, si nous cherchons sa
gloire, si nous exposons nos vies pour
l'application de son sang sur ces pau-
ures Ames abandonnées. C'est ce que
font icy tous nos Peres avec des peines
& des traux incroyables. Si Dieu
qui nous a amené en cette Barbarie,
nous y fait égorger, qu'il soit beny à
iamais, c'est IESVS-CHRIST, c'est son
Euangile, c'est le salut de ces pauvres
Ames qui nous tient & qui nous arre-
ste presque au milieu des flames. Nos
yeux sont accoustumez à voir brusler &

és années 1656. & 1657. 211
manger les hommes. Priés Dieu qu'il
face des Chrestiens de ces Antropo-
phages & qu'il nous fortifie de plus en
plus; & nous le prierons de toucher les
cœurs de ceux qui l'ayment, afin qu'ils
vous aydent à nous secourir.


F I N.





o o o

o n b



Handwritten cursive text, possibly a signature or name.



la m a o n
na it

Selicut

o r d d d
c c n c



yu

II

ESTABLISHED 1650

vala don

ddddd